

Usif Yesus In Rais Reko natuin nai' Markus in tuis

¹ Ia rais reko anmatoom nok Uisneno In Anah.*
In kaan ne Yesus Kristus, re' Uisneno nruur ma
nreek nain Je na'ko un-unu'. In retan ia, na'uub
on on nai:

*Nai' Yohanis Asranit anfei ranan neu Usif Yesus
(Nai' Mateos 3:1-12, Nai' Lukas 3:1-18, Nai'
Yohanis 1:19-28)*

² Nahuun na'ko Nai' Yesus nait In mepu,
Uisneno anreek haefan atoin es neem nahuun.
Atoni' re' naan, kaan ne nai' Yohanis. Nai'
Yohanis re' ia, ro he neem nahuun he nfei ranan
neu Nai' Yesus. Mes nahuun na'ko nai' Yohanis
he neem, Uisneno ansonu' nahunun In mafefa
kninu' tuaf es, kaan ne nai' Yesaya. Na'ko afi
ahunut, nai' Yesaya antui nrair, nak on nai:

“Amneen, oo! Au of a'reek haefan Au tuaf es, he
nnao nfei ranan neu Ko.”[☆]

³ Haef naan of annao neu baer ruman, he
nhunun ma ankoa' am nak:

‘Usi' he nkoen On neem! Bifee-atoni', iim he
tabarab ranan ma taroitana bare!

Iim he takninu' ranan, ma atseun Goe.”[☆]

⁴⁻⁶ Sin biasa nteek nai' Yohanis ate, nak ‘Asrain
Atoni’”. In natua nbi baer ruman. In paekn ee
anmoe' je na'ko bikaes unta in funun. In pasu

* **1:1** Tuis-tuis Suur Akninu' uab Yunani ahun-hunut ka ntui fa
‘Uisneno In Anah’. ☆ **1:2** Nai' Meliaki 3:1 ☆ **1:3** Nai' Yesaya
40:3

'futu' nmoe' je na'ko pasu. In naah sisi knamat ma niun oin hau. [Nai' Yohanis in a'moin ii, nahuum on re' mafefa kninu' ka'o nai' Elia afi unu'.][☆]

Oras naan, too mfaun na'kon kota Yerusalem, ma propinsi Yudea in afan nanan, sin neman ma natefan nok nai' Yohanis anbi in baran. Sin neman he nitan nok sin maatk ein ma annenan nok sin ruik ein noni'-taru' na'ko nai' Yohanis. In nsaksii ma natoon neu sin am nak, “Hi ro he mmanaku' ma misaitan hi sanat ma penu sin ok-oke', maut he Uisneno nnoes nain hi saant ein naan. Rarit hi ro he misrain fe', he anjair tanar am nak, hi mmarama' mfaim jen mok Uisneno.

Oras sin nneen anrarin on naan ate, sin nmanaku' sin saant ein, rarit sin nana'at sin tuak ein neun nai' Yohanis, ma in nasrain sin anbin noe Yarden.

⁷ In na'uab neu sin am nak, “Noka'-nmeu te, Atoin es of he neem. In ma'tani' nneis na'ko kau. Au ka maso'ik kau fa, maski bait au 'jari haa In aan renu ma aan reka', au ka umnees 'ok Ne fa.†

⁸ Au 'manoe'k ii suma es re' he usrain ki 'paek oe, mes Atoni' naan of anmo'e nneis na'ko kau. Fin In of natuab ma namonib ki nok Uisneno In Asmaan Akninu'.”

*Nai' Yohanis nasrain Nai' Yesus
(Nai' Mateos 3:13-17, Nai' Lukas 3:21-22)*

⁹ Rarit Nai' Yesus neem na'ko kuan Nasaret et pah Galilea, he nateef nok nai' Yohanis. Ma

☆ **1:4-6** 2 Uisf ein sin Reta' 1:8 † **1:7** Tuis uab Yunani ahun-hunut ntui mnak, 'u'ruri' he 'seif In sapaut goe msa', au ka pantas fa.' In oetn ii nak, nai' Yohanis naan in njair haa Usif Yesus In aan renu ma aan reka', mes in ka namnees nok Ne fa, ma in ka maso'ik fa.

nai' Yohanis nasrain Je anbi noe Yarden. ¹⁰ Ma oras Nai' Yesus anpoi na'ko noe, nok askeken ate, neon goe natfe'i. Rarit Uisneno In Asmaan Akniun' ee ansaun neem neu Ne, mamnita' on re' kor-kefi. ¹¹ Ma hanaf Uisneno npoi neem na'ko neon goe mnak,

“Ho re' ia, Au Aan neka'.

Ho es re' ammarineb Au nekak.”✧

Niut reu'f ein sin a'naak kou' goe ansoba' Usif Yesus anbi baer ruman

(Nai' Mateos 4:1-11, Nai' Lukas 4:1-13)

¹² Rarit Uisneno In Asmaan ee nheer neik Nai' Yesus neu baer ruman. ¹³ Anbi bare naan, anmui' kaun fui sin. Nai' Yesus natua nbi bare naan fai bo' haa ma neno bo' haa. Anbi bare naan amsa', niut reu'f ein sin a'naak ko'u neem ma nsoba' Usif Yesus he natuin in uaban, mes ka nabei' Je fa. Rarit Uisneno In ameput na'ko sonaf neno tunan neem he natuta' ma nabhae' neu Ne nbi rasi aof ma smanaf.

Usif Yesus annao neu propinsi Galilea he nsak-sii ma natoon Uisneno In romin

(Nai' Mateos 4:12-22, Nai' Lukas 4:14-15, 5:1-11)

¹⁴ Anbi oors es, re' sin nataam anrair nai' Yohanis Asranit anbi bui, Nai' Yesus annao neu propinsi Galilea, he natoon Rais Reko na'ko Uisneno anbi naan. ¹⁵ In na'uab am nak, “Amneen, oo! Oras ia, Uisneno In oors antea goen.

✧ **1:11** Reta' Ahun-hunut 22:2, Siit Pures-Bo'is sin 2:7, Nai' Yesaya 42:1, Nai' Mateos 3:17, 12:18, Nai' Markus 9:7, Nai' Lukas 3:22

Oras ia, are' bifee-aton'i bisa nahinin nak,
 Uisneno nnaa' aprenat.
 Onaim hi ro he mi'piis ma mi'te'un hi sanat
 ma penu sin,
 he mtebi mfain ma mituina' Uisneno.
 Rarit ampirsai meu In Rais Reko ia
 nai!"[☆]

*Usif Yesus no'en a'kiif kai ika' he natuin Ee
 (Nai' Mateos 4:18-22, Nai' Lukas 5:1-11)*

¹⁶ Neot es, Nai' Yesus annao nreuk nefo Galilea in ninin. In niit atoni' nua. Es in kaan ee nai' Simon, nok in oirf ee nai' Anderias. Sin nua sin an'ookr ein jala he nheken ika'. Mepu naan, sin meup goe neno-neno. ¹⁷ Nai' Yesus no'en sin am nak, "Hoe, ba'e sin! Iim he mituina' Kau nai! Hi amnaim ika' ki, mes anbi oras ia, Au he unoni' ki he mjair amnaim tuaf meu pukan Uisneno." ¹⁸ Anneen anrarin on naan ate, sin nua sin nasaitan jala naan, ma annao natuin Ee.

¹⁹ Rarit Nai' Yesus annao nkono kre'o. In niit nai' Sebedius in aanh ein tuaf nua. Aan unu in kaan ee nai' Yakobus, ma in oirf ee, kaan ee nai' Yohanis. Sin nua sin nabarab sin pukat anbi koof es in nanan. ²⁰ Nai' Yesus no'en sin am nak, "Hoe, ba'e sin! Iim he mituina' Kau nai!" Onaim sin nua sin annao nasaitan sin amaf nok in ameupt ein anbin kofa' naan, ma sin natuin Ee.

*Usif Yesus anriu' napoitan niut re'uf na'ko
 atoin es anbi kota Kapernaum
 (Nai' Lukas 4:31-37)*

²¹ Rarit Nai' Yesus nok tua haa' ein naan, sin neman ntean kota Kapernaum. Neno naan

[☆] **1:15** Nai' Mateos 3:2

nateef nok atoin Yahudis sin neon onen.† Onaim Nai' Yesus antaam anbi uim onen ma nanoni' tuaf anbi naan. ²² Oras sin nneen In uaban naan, sin nsanmakan, fin In nahiin batuur-batuur noni' naan in afan. Naan a'teta' na'ko atoin Yahudis sin tunggur agaam ein.☆

²³ Oras naan, anmui' atoin es, re' anniut sae. In ntaam nok anbi uim onen amsa'. Rarit nitu re' anbi atoni' naan anhunun am nak, ²⁴ “Hoe! Yesus, atoin Nasaretas! Ho uum he msero' saa' mok kai? Ho uum he mureu' kai, ai'? Hai mihiin Ko. Ho re' ia, Atoni' re' Uisneno anba'an nain je he nreek Ee neem na'ko un-unu'. Ho re' ia, Uisneno In Atoni Kninu' re' ka mmui' fa sanat.”

²⁵ Mes Nai' Yesus naskara' atoni' naan am nak, “Kaisa' mufef! Ho mpoi nai mu'ko atoni' ia!”

²⁶ Rarit niut re'uf naan, anhasu' atoni' naan naher-heer. Ma in npoi na'ko atoni' naan nok haan hunun. ²⁷ Onaim abitan uim onen naan ansanmakan. Rarit sin na'uab ein am nak, “Amoo! Saa' na es re' ia! In naprenat niut re'uf ein he npoin, ma sin nneen Ee ma natuin In uaban. Ia noin fe'u, ai'? A'naef ee na'uab ate ro ma'tani'!”

²⁸ Onaim sin nmurain nsaksiin ma natonan 'mo'et na'ko Nai' Yesus, na'ko kuan neu kuan annono mnateef anbi propinsi Galilea.

Usif Yesus nareko' nai' Simon Petrus in ain babaf, ma bian antein

(Nai' Mateos 8:14-17, Nai' Lukas 4:38-41)

²⁹ Oras sin npoin na'kon uim onen naan, Nai' Yesus annao neu nai' Simon ma nai' Anderias

† **1:21** Atoin Yahudis sin neon onen, ai' neno snasat na'ko mepu, sin nteek ete nak 'neon sabat'. ☆ **1:22** Nai' Mateos 7:28-29

sin umi. Nai' Yakobus nok nai' Yohanis nokan amsa'. ³⁰ Nai' Simon in ain baabf ee anmaniin, ma antuup anbi harak. Oras Nai' Yesus nok In atoup noin' ein antaman nbin umi naan, atoin es neem ma natonan nai' Simon am nak, “Ho ain baba' anmainiin.”

³¹ Onaim Nai' Yesus annao nasneku' bifee mnais amaininit naan. In nnaa' in a'niman, ma anfiit nafeen ee. Oras naan, in nareok nain. Rarit bifee mnasi' naan, anpoi ma ntuthae sin.

³² Oras maans ii he noi nmouf, too mfaun ein neikin are' amenat, ma are' tuaf re' anniut saen. Sin neik sin neun Nai' Yesus ma antotin turun-babat he nareko' sin. ³³ Are' too mfaun anbin kota naan neman ma nauban naan anbin uim jaan in enon. ³⁴ Too mfaun ein naan, amenat huma'-huma', ma Nai' Yesus nareko' sin ok-oke'. Ma In nriu' napoitian niut re'uf amfaun. Mes In ka nfee fa mainuan neu niut reu'f ein na'uab ein, natuin sin nahiin Je.

*Usif Yesus annao nfuun am nateef neu kuan bian, ma natoon Rais Reko na'ko Uisneno
(Nai' Lukas 4:42-44)*

³⁵ Neis noi nmeu re' meis'okan, Nai' Yesus anfeen ma annao nasaitan umi naan. In nnao neu baer ruman ma ma'koro', he n'onen ma na'uab nok Uisneno. ³⁶ Oras nai' Simon nok in aok-bian ein anfenan, sin ka niit Ee fa. Onaim sin nnao naim Je. ³⁷ Oras sin nateef nok Ne te, sin na'uab neu Ne mnak, “Aam! Too mfaun ein naim Ko. Atkoen ok he tfain nai, tua.”

³⁸ Mes In nataah am nak, “Reko msa'. Mes reko nneis, hit tnao teu kuan bian anteni' fe', re' anpaumakan etan re' ia. Au he utoon Rais

Reko 'eu sin imsa'. Natuin Au meup uuf ii, es re' naan.”

³⁹ Rarit In nnao nfuun am nateef anbi propinsi Galilea, he nsaksii ma natoon Rais Reko na'ko Uisneno anbi uim oen ein mese'-mese'. Anbi naan amsa', In nriu' napoitán are' kanan niut reu'f ein na'kon ameent ein.✧

Usif Yesus nareko' atoin ameen nui-atroki' tuaf es

(Nai' Mateos 8:1-4, Nai' Lukas 5:12-16)

⁴⁰ Oras naan, anmui' atoin ameen nui-atroki' tuaf es neem neu Nai' Yesus. In nri'tuu ma antoit turun-babat na'ko Nai' Yesus am nak, “Aam! Ambaab maan kau, tua! Au uhiin 'ak Ho bisa mureko' au menas, henati' atoni' kaisa' nmai'nisin anteni' kau. Asar Ho mroim, tua.”

⁴¹ Ma Nai' Yesus ankasian atoni' naan, onaim In annona' In a'niman ma nreo' goe. In na'uab am nak, “Au 'roim! Onaim Au ureko' ko nai!”

⁴² Nok askeken ate, menas naan namneuk nain, ma in nareko nfain anbi oras re' naan. ⁴³ Rarit Nai' Yesus anreun atoni' naan he nfain, ma namnaub ee, ⁴⁴ mnak, “Amneen murek-reko'! Au he 'ba'an ko! Ho mureko mfain jen, mes ka nabei' fa he mutoon meu sekau-sekau. Ho ro he mutuin ka'o Musa in aprenat. Onaim ho mnao muhuun meu a'naak rais pirsait Yahudi henati' in nparikas ho aom, he in nahiin batuur-batuur nak, ho mureko mfain jen, ai' kaah? Rarit ho meik fua'-turu' he anjair tanar nak, ho mtoit makasi, hena' too mfaun ein nahinin am nak ho mureko mfain batuur-batuur een.”✧

✧ **1:39** Nai' Mateos 4:23, 9:35 ✧ **1:44** A'naak Rais Pirsait ein sin Atoran 14:1-32

⁴⁵ Mes atoni' naan anpoi nnao ma nsaksii na'ko baer jes neu baer jes anbi mee-mee. Es naan ate, too mfaun ein namin ranan he natefan nok Nai' Yesus, tar antea In ka bisa nakrira' fa In tuan ee anbi kota. Onaim In natua nbi bare-bare re' ruman ma ma'koro', re' na'roo na'ko kota. Ma too mfaun ein na'kon mee-mee, neman ma naim Je he nateef nok Ne.

2

*Usif Yesus nareko' atoin abuat tuaf es
(Nai' Mateos 9:1-8, Nai' Lukas 5:17-26)*

¹ Ankoon neno fauk on naan ate, Nai' Yesus annao nfani ntein neu kota Kapernaum. Ma abitan bare naan anmaktoon ein anbin mee-mee mnak, In et umi. ² Es naan ate, too mfaun ein neman na'kon mee-mee. Sin nauban naan Ee tar antea umi naan na'keek nok too. Ma umi naan in eon' ee ma'eka' nok too msa'. Anbi naan ate, Nai' Yesus natonan sin Uisneno In Kabin ma Prenat.

³ Oras In na'uab fe'e te, anmui' atoni' haa nroi neik atoin abuat es, he neik je neu Nai' Yesus.

⁴ Mes, natuin too mfaun ein naan, sin ka bisa neik fa atoni' naan ntea Nai' Yesus In matan. Onaim sin nsaen neun uim je tunan, ma sin npukai umi naan in tefin, nataib on anbi Nai' Yesus In a'nakan. Oras sin npukai narair uim naan in teifn ate, na' sin nasanut abuat naan nok nain in a'nahek.* ⁵ Oras Nai' Yesus niit sin nmo'en on naan ate, In nahiin nak, sin npirsain batuur-batuur neu Ne. Onaim In nak neu abuat naan am nak, "Ba'e! Ho saant ein masako' nrair."

* **2:4** Sin a'nahek naan, nakaon nggoe na'ko aab ma'tani'.

⁶ Anbi naan, tunggur agama rais pirsait Yahudi tuaf fauk nok antokon. Oras sin nneen Nai' Yesus In uaban naan, sin nnaben ate ka reko fa. ⁷ Rarit sin na'uab ein es nok es am nak, "Airoo. Atoni' ia, ro In nabrain he na'uab on re' nee, joo! Suma Uisneno es re' bisa nsaok atoni' sin sanat. Mes atoni' ia In uabn ii naiks on, on re' In es re' Uisneno. In na'akan Uisneno es re' nee!"

⁸ Mes Nai' Yesus nahini nrair sin neek ein. Rarit In nak sin am nak, "Hi kais mitenab on re' naan, tua! ⁹⁻¹⁰ Mee es ma'kafa' nneis ji? Karu Au 'ak 'eu atoin abuat re' ia m'ak, 'Ho saant ein masako' nrair,' hi ka mihiin fa neu he njari oo, ai' kaah? Mes karu Au 'ak 'Amfeen nai! Mait ho 'nahek ma mfain nai!' Karu in nfeen oras naan ate, of na' hi miit ma mihini mmak, Au es re' Mansian Batuur-Batuur. Fin Au 'mui' kuasat ma hak he 'saok sanat."

Rarit Nai' Yesus nak neu atoin abuat naan am nak, ¹¹ "Amneen, oo! Oras ia, ho mureok goen! Onaim amfeen nai, mait ho 'naehk aan ma mfain nai."

¹² Anneen on naan ate, abuat naan anfeen nain. In nnuun ma nait in a'naehk ee, rarit anpoi nnao. Are' too mfaun ein re' nitan nok sin maatk ein, ansanmakan, onaim na'uab ein am nak, "Amoo! Hit fe' tiit rasi re' ia, joo! Uisneno ro mapina'-makraha!"

*Usif Yesus no'en nai' Lewi he natuin Ee
(Nai' Mateos 9:9-13, Nai' Lukas 5:27-32)*

¹³ Rarit Nai' Yesus annao nfani ntein neu nefo Galilea in ninin. Too mfaun ein neman na natefan nok Ne, ma In nanoni' sin anmatoom nok Uisneno In Kabin ma Prenat.

¹⁴ Anbi bare naan, anmui' tuaf es, kaan ee nai' Lewi, nai' Alfius in aan mone. In meupn ii es re' he nhoik beo he nfee je neu anaa' aprenat pah Roma. Oras Nai' Yesus annao npeo' naan ate, In niit nai' Lewi. Onaim In nak ee mnak, “Ba'e! Uum he mutuina' Kau nai!”

Anneen on naan ate, nai' Lewi anfeen am natuina' nain Je.

¹⁵ Rarit Nai' Yesus sin antokon ma nbukaen nbin nai' Lewi in umi, nabua nok nai' Lewi in partei ahoik beo ngguin. Anbi naan amsa', anmui' tuaf bian re' atoin Yahudis nakan sin atoin amoe' re'uf, nok anbukaen. Too mfaun ein re' antokon ma nbukaen nbin naan, anromin he nnenan Nai' Yesus In uaban.

¹⁶ Oras naan, tunggur agama tuaf fauk na'kon partei pirsait Farisi, sin niit Nai' Yesus antook ma anbukae nok ahoik beo ngguin, ma are' amoe' reu'f ein. Onaim sin nataan In atoup noin' ein am nak, “Nansaa' am es hi Tunggur goe naah-niun nabua nok ahoik beo ngguin ma amoe' reu'f ein?”

¹⁷ Mes Nai' Yesus anneen sin haan tanas naan, rarit In nataah sin am nak, “Atoin amenat naim areko' menas, mes atoin ao-mina' ka naim fa areko' menas. Au 'uum he 'païroir atoni' re' namreu'. Mes Au ka 'uum fa he 'païroir atoni' re' annaben in tuan ii te, namneo.”

Usif Yesus In noni'-taru' fe'u, a'teta' na'ko atoin Farisis sin noin' ein

(Nai' Mateos 9:14-17, Nai' Lukas 5:33-39)

¹⁸ Neot es, tuaf na'kon partei pirsait Farisi, sin nanaah ok. Sin niit nai' Yohanis in atoup noin' ein nanaah ok amsa'. Mes sin ka niit nitan fa

Nai' Yesus in atoup noin' ein nanaah ok on re' sin. Es naan ate, tuaf bian na'ko sin, neman ma natefan nok Nai' Yesus, he natanan am nak, “Aam! Hai minaah om. Nai' Yohanis in atoup noin' ein nanaah ok amsa'. Mes nansaa' am es Ho atoup noin' ein ka nanaah ok fa?”

¹⁹ Nai' Yesus nataah sin am nak, “Hi mihini mrair, karu anmui' fesat kabin, taumn ein sin ka nanaah ok fa, mes sin nbukaen tar namsenan. Karu nai moen ji nbi naan fe', sin of anbuken bu'-bua'. ²⁰ Mes anbi oors es, karu tuaf nabaak neik nai mone naan ate, in aok-bian sin neek ein ansusan, na' sin nanaah ok.”

²¹ Rarit Nai' Yesus nareta' uab manporin es, am nak, “Ka tiit fa tuaf es he npaap sii fe'u neu baru mnaa'. Fin karu tsaef baru naan, sii fe'u naan of an'uuk gon am anpisu nteni' baru mnaa' naan. ²² On naan amsa', ka tiit fa es, re' narai tua miin fe'u neu 'saap arapu'. Natuin a'sapa' naan of natboor, ma tua mina' naan of nasturun npoi oke'. Onaim tua miin fe'u, ro he tarai je neu 'saap fe'u.”† [Nok uaba' naan, Nai' Yesus nanoni' sin am nak, In noni'-taru' fe'u, kaisa' sin nseor goe nok atoin Farisis sin noni' amnaa'.]

Usif Yesus In atoup noin' ein anhetun maak-gandum nateef nok neno snasat

(Nai' Mateos 12:1-8, Nai' Lukas 6:1-5)

²³ Neot es, nateef nok atoin Yahudis sin neon onen, Nai' Yesus sin nnaon npe'-pe'on reen ein sin niink ein. Ma In atoup noin' ein anhetun

† **2:22** Tuis uab Yunani ahun-hunut nak 'kaisa' mirai anggur oef fe'u meu tas pasu mnaa', henati' kais-kaisa' anpee' ma natpisu'.

maak-gandum he sin nnahan.✧ 24 Atoin Farisis niit sin nmo'en on naan ate, sin nak neu Nai' Yesus am nak, “Nansaa' am es Ho atoup noin' ein antanhai hit atoran rais pirsait? Sin nhetun maak-gandum nateef nok neno snasat! Ka nabei' fa he hi mmoe' on re' naan!”

25-26 In nataah am nak, “On mee? Hi ka mimnau fa reta' na'ko nai'-ka'o nai' Daut? Oras naan, nai' Abiatar anjair a'naak pirsait Yahudi sin a'naak ko'u. Nai' Daut nok in tuaf ein sin taik ein na'roton tar namnahan nmaten. Onaim sin ntaman anbin Uisneno In Tenar Onen, ma nait utunu' re' a'naak pirsait ein nafuat ma nana'at anrair sin neun Uisneno, ma sin nbukaen. Te kaah, amneon ii, suma a'naak pirsait ein esan re' bisa nbukae sin, mes tua 'teta' na'ko naan ate, ka bole fa. Rarit nai' Daut sin nbukae utuun ein naan, mes ka tiit fa es, re' nakaina' sin.”✧

27 Rarit Nai' Yesus na'uab neu sin antein am nak, “Nati' kaisa' mnikan, mak Uisneno napara' neno snasat he nfee arekot re' he nturun ma nbaab mansian arkit. Mes In ka nmoe' fa mansian ii he natuin ahaa neno snasat in atoorn ein. 28 Au re' ia, Mansian Batur-Batur. Au 'mui' hak he 'reek mansian he bisa nmeup saa'-saa' anbi neno snasat. Ma Au 'mui' hak amsa' he 'penan mansian he kaisa' nmeup saa'-saa' anbi neno snasat.”

3

Usif Yesus nareko' atoin amenat nateef nok neno snasat

(Nai' Mateos 12:9-14, Nai' Lukas 6:6-11)

✧ 2:23 Surat re' Nareta' Nafani' Raan A'honis 23:25 ✧ 2:25-26
1 Nai' Samuel 21:1-6, A'naak Rais Pirsait ein sin Atoran 24:9

¹ Rarit Nai' Yesus anfani nteni' nbi uim onen. Anbi naan, In niit atoin es, re' in a'niman bian ee nmaet. ² Anbi naan amsa', anmui' tuaf bian re' namin ranan piut-piut, he nasaan Nai' Yesus. Es naan ate, sin nsuntuur Goe, he nahinin nak, In nareko' atoin amenat nok neno snasat, ai' kaah.

³ Rarit Nai' Yesus no'en atoni' re' in a'niman bian amates naan, am nak, "Ba'e! Uum he mhaek meu matan ia."

⁴ Rarit In nataan sin ok-oke' mnak, "Karu tatuina' hit atoran rais pirsait, hit bole tmoe' saa' nateef nok neno snasat? He tareko', ai' tareu'? He tareko' atoin amenat, ai' he troor tisan?" Mes sin ka ntonin fa saa'-saa'.

⁵ Onaim Nai' Yesus In neekn ee nsuus anmaet, natuin sin npe'en sin roenk ein he npairoir sin harat anneis na'ko he npairoir atoni' 'niim amates naan. Rarit In natoo' ma In na'kena' In maatk ein neu sin. Rarit In nak atoni' naan am nak, "Ba'e! Amnona' ho 'nimam naan neem!" Onaim atoni' naan annona' in a'niman. Nok askeken ate, in a'niman nareok nain. ⁶ Rarit atoni' na'kon partei pirsait Farisi anpoin nnaon nasaitan uim onen naan. Ma sin annao natefan nok atoni' na'kon partei purtik Herodes, he sin bu'-bua' namin ranan he na'maet Nai' Yesus.

Usif Yesus nareko' too mfaun anbin nefo Galilea in ninin

⁷⁻⁸ Neot es, Nai' Yesus nok In atoup noin' ein annaon he nasnasan akre'o anbin nefo Galilea in ninin. Mes, natuin too mfaun ein anneen saa' re' In anmo'e nrair sin, es naan ate, too na'kon kuan-kuan neman he natuin Ee. Sin neman na'kon propinsi Galilea, Yudea, ma Idumea. Bian anteni' neman na'kon kota Yerusalem, Sidon, ma

Tirus. Bian anteni' neman na'kon noe Yarden in panin et pasa' neon-saet. Sin arsin namin ranan he natefan nok Ne. ⁹ Nai' Yesus anreek In atoup noin' ein he nami nfeen Ee koof es, natuin amneemt ein naan, sin namfaun. In nroim he na'uaba' anbi koof' ee in tunan, henati' In mamnita' ma sin neen In hanan.

¹⁰ Neon goes ii, In nareko' niit amenat amfaun. Etun oras ia, are' amenat bian sin anmabe'un he nreo' naan Ee. ¹¹ Oras tuaf ein re' anniut saen sin niit Ee, sin ntoofn ok anbin Nai' Yesus In matan. Ma sin anhuun ein am nak, "Ho re' ia, batuur Uisneno In Anah!"

¹² Mes In ntaar sin batuur-batuur am nak, "Kaisa' mitoon meu sekau-sekau saa'-saa' re' anmatoom nok Kau!"

Usif Yesus anpiir In atoup noni' tuaf bo'es am nua

(Nai' Mateos 10:1-4, Nai' Lukas 6:12-16)

¹³ Rarit Nai' Yesus ansae nbi 'toe'f es. In no'en naan atoni' fauk he natuin Ee. Onaim sin neem natuin Ee. ¹⁴ Rarit In nruur naan ahaa atoni' bo'es am nua. In nak sin am nak, "Au 'ruur ki he hi mituina' Kau piut-piut. Au he 'reek ki he mnao mitoon Uisneno In Rais Reko neu mansian arsin. ¹⁵ Ma Au of a'fee ki kuasat he mriu' niut reu'f ein mi'ko mansian ein."

¹⁶⁻¹⁹ Atoup noni' tuaf bo'es am nua' ein naan, esan re':

nai' Simon (re' Nai' Yesus anteek ee te nak, nai' Petrus),

nai' Yakobus, nok in orif,

nai' Yohanis, (sin nua sin, nai' Sebedius in aanh ein. Nai' Yesus anteek nanesa' sin

☆ **3:10** Nai' Markus 4:1, Nai' Lukas 5:1-3

nua sin nak, 'Boanerges', re' neik hit uab
 ii te nak 'roots ee na'punu'.)*
 nai' Anderias,
 nai' Felipus,
 nai' Bertolomeos,
 nai' Mateos,
 nai' Tomas,
 nai' Yakobus (nai' Alfius in aan mone),
 nai' Tadius,
 nai' Simon (atoni' na'ko partei purtik Selot),†
 ma nai' Judas Iskariot (re' of he na'sosa' Nai'
 Yesus).

*Tunggur agaam ein nasaan Usif Yesus nak,
 niut reuf ein sin a'naak kou' goe es re' anfee
 kuasat neu Ne
 (Nai' Mateos 12:22-32, Nai' Lukas 11:14-23,
 12:10)*

²⁰ Rarit Nai' Yesus nok In atoup noin' ein
 ansanun nfanin na'kon a'to'ef naan. Ma sin
 ntaman anbin umi. Too mfaun ein neem nauban
 antein Ee, tar Nai' Yesus sin ka napenin fa
 mainuan he nbukaen. ²¹ Ankius on naan ate,
 tuaf na'uab ein am nak, "Amkius miit Nai' Yesus.
 In nnika' nain In tuan, ma ka mapairori' fa." In
 ba'aasr ein sin anneen uaba' naan, onaim sin
 neman he nok Ne nfain.

* **3:16-19** a: Tuis uab Yunani mnaa' nak 'roots ee in anah', ma
 in a'moufn ii es re' 'sin a'moe'k ein ka nsaan fa 'rotos'. Atoin
 ahiin Suur Akninu' bian sin natenab am nak, nai' Yakobus nok
 nai' Yohanis sin haank ein on re' 'roots ee na'punu' karu na'uab
 ein; ai' natuin sin nua sin biasa naskara' on re' 'roots ee na'punu'.
 † **3:16-19** b: Parte purtik pukan 'Selot' ai' 'Patriot', sin namin
 ranan he nafeitn ok na'ko anaa' aprenat Roma.

22 Oras naan, tunggur agama fauk na'kon kota Yerusalem, neman ma natonan abitan re' naan am nak, “Hi kais mituina' Nai' Yesus. Natuin niut reu'f ein sin a'naak kou' goe, re' anteek ee te nak Balsebul, antaam anrair et In tuan, ma nfee Ne kuasat he In nriu' niut reu'f ein.”✠

23 Oras Nai' Yesus anneen on naan ate, In nhaman nabuaba' sin am nak, “Rasi naan, ka matopu' reko fa, tua! Nok ranan mee, niut reu'f ein sin a'naak kou' goe bisa nriu' nafani in tuan?

24 Karu anbi pah es, in too goe nmatoen ma nmabanan piut, nok ranan mee henati' pah naan bisa nhaek nabaar? 25 Ma nbi uim jes in nanan, karu sin es-es ate anmanau nanan, nok ranan mee henati' sin bisa nhaek nabaran? 26 On naan amsa', karu niut reu'f ein sin anmamusun es nok es, ro sin of anbait ok. Karu njair on naan ate, sin namre'un nmaten.

27 Karu atoin es he neem nabaak ai' nasiik bare' anbi atoin ma'tani' es in umi, in ro he nfuut naheran atoin ma'tani' naan nahuun fe'. Rarit na' in napein mainuan he nait atoni' naan in baer' ein.†

28 Onaim Au utoon 'ain ki: Uisneno nabarab ma npao he nnoes nain are' mansian ein sin saant ein. Ma karu sekau na'uab na're'uf tuaf es, Uisneno nabarab fe' he nsaok sanat naan. 29 Mes karu sekau-sekau na'uab na're'uf Uisneno In Asmaan Akninu', Uisneno ka nsaok fa in sanat naan, tar antea nabar-baar!”✠

✠ 3:22 Nai' Mateos 9:34, 10:25 † 3:27 Nok ranan naan, Nai' Yesus natoon neu sin am nak, In ma'tani' nneis na'ko niut reu'f ein sin a'naak kou' goe, re' sin biasa nteek ee te nak, 'Balsebul'.

✠ 3:29 Nai' Lukas 12:10

³⁰ Nai' Yesus na'uab on naan, natuin sin na'uab na'reu'f Ee mnak, “Tuaf re' ia, anniut sae!”

Tuaf re' natuina' Uisneno In a'romin, sin re' naan esan re' anjarin Usif Yesus In nonot-asar amneot ein

(Nai' Mateos 12:46-50, Nai' Lukas 8:19-21)

³¹ Rarit Nai' Yesus In ainf ee nok In oirf ein sin neman neun umi naan, he natefan nok Ne. Sin nhaken nbin mone' ma anrekan tuaf he noe'n Ee. ³² Oras naan, Nai' Yesus antook ma na'uaba' nok too mfaun anbi uim je nanan. Rarit tua reek ein naan antaman ma natoon Ee mnak, “Aam! Ho aina' nok Ho oirf ein etan mone'. Sin he natefan nok Ko, tua.”

³³ Mes Nai' Yesus nataah neik haan tanas am nak, “Au aina' ma Au ori'-tata' amneot, esan re' sekau?”

³⁴ Rarit In nait matan ma nkius too re' antokon nibun naan Ee. In na'uab am nak, “Hi ar-arki re' ia, amjair Au aina' ma Au ori'-tata' amneot. ³⁵ Fin sekau-sekau re' natuina' Uisneno In a'romin, sin njarin Au nonot-asar amneot.”

4

Usif Yesus nareta' anmatoom nok fini nbi afu huma'-huma'

(Nai' Mateos 13:1-9, Nai' Lukas 8:4-8)

¹ Neot es, Nai' Yesus annao nfani ntein nbi nefo Galilea. Ma too mfaun ein neman ma naub naan Ee. Anmui' koof es anhake nbi naan. Rarit In ansae ma antoko nbi kofa' naan in tunan, ma nanoni' sin. Too mfaun ein re' anbin nefo naan in ninin, anneen In uaban.* ² Onaim In nanoni' sin anmatoom nok rasin mfaun, neik reta' mnak,

* 4:1 Nai' Lukas 5:1-3

³ “Hi mneen mirek-reko'! Anmui' naan akani' fini tuaf es annao ma nkani' fini nbi in rene. ⁴ Oras in nkani' fini te, bian anmoufun anbin ranan. Es naan ate, koorn ein neman ma nteonsiun nain finin naan. ⁵ Ma fini bian anmoufun anbin auf mafatu' re' in auf goe mainihas. Finin naan natoron rabah. Mes natuin afu naan mainihas, ⁶ es naan ate, oras maans ee nsae, fiin atoors ein naan namnenen ma nmaten, natuin sin a'baa'k ein ka ntaman ntean fa auf goe in a'pinan.

⁷ Fini bian anteni' nmoufun anbin huu ma'aika'. Rarit huu ma'aika' naan anneo niis finin naan, tar antea ka bisa napunin fa. ⁸ Ma fini bian anmoufun nbin auf afa'. Finin naan natoron, ma na'naen tar napunin. Fini bian nasuuf no bo' teun, bian no bo' nee, ma bian no nautn es.

⁹ Onaim sekau nneen ma nheek naan reta' ia in a'moufun, maut he in nateenb ee nnao nkoon.”

Nansaa' am es Usif Yesus nfee noni' te, anpaek reta'?

(Nai' Mateos 13:10-17, Nai' Lukas 8:9-10)

¹⁰ Rarit oras Nai' Yesus anmes-mees, In atoup noin' ein tuaf bo'es am nua, nok atoni' bian antein re' anneen niit In reta' naan, neman he natefan nok Ne. Sin antotin henati' In natoon neu sin reta' naan in a'moufun. ¹¹ Nai' Yesus nataah sin am nak, “Natuin hi mroim he mihiin Uisneno In Aprenat batuur-batuur, es naan ate, Au utoon ki reta' naan in a'moufun. Mes neu tuaf bian, Au unoni' sin 'eik reta'. ¹² Atoni' bian sin nahuum on re' saa' re' Uisneno In mafefa kninu' antui niit am nak,

‘Sin nitan nrarin, mes ka nromin fa he nahinin.

Sin nnenan nrarin, mes sin ka nromin fa he ntoupun.
 Maut he sin kais anpirsain neun Uisneno,
 henati' Uisneno kais anperluu he nfeen sin saok sanat antein.'”✧

Usif Yesus anfei oten na'ko reta' anmatoom nok fini naan

(Nai' Mateos 13:18-23, Nai' Lukas 8:11-15)

¹³ Rarit Nai' Yesus anfei oten na'ko reta' naan am nak, “Karu hi ka mheek fa reta' ia in a'moufun, nok ranan mee, he hi bisa mheek reta' bian sin a'moufk ein? ¹⁴ Onaim reta' ia in a'moufn ii on nai: akani' fini naan, es re' tuaf re' nsaksii ma natoon Uisneno In Kabin ma Prenat. ¹⁵ Finin re' anmoufun anbin ranan, tar antea koorn ein anteo-nsiun nain sin naan, esan re' tuaf-tuaf re' anneen Uisneno In Kabin ma Prenat. Mes ka 'roo fa te, niut reu'f ein sin a'naak kou' goe neem ma nasiik naan Kabin ma Prenat naan na'ko sin neek ein. ¹⁶ Finin re' anmoufun nbin auf mafatu', esan re' tuaf-tuaf re' anneen ma antoup Kabin ma Prenat naan nok neek marinet. ¹⁷ Mes Kabin ma Prenat naan ka na'baa' fa. Es naan ate, in ka ntahan fa 'roo anbi sin neek ein. Ma oras atoni' bian nasusab sin, natuin sin antoup Kabin ma Prenat naan, sin nporin nain Kabin ma Prenat re' naan. ¹⁸ Finin re' anmoufun nbin huu ma'aika' in a'tnanan, esan re' tuaf ein re' anneen anrair Kabin ma Prenat naan. ¹⁹ Mes sin ntaisibun mainenu' nok rasi huma'-huma', he sin nharineb sin tuak ein. Es naan ate, taisibu huma'-huma' naan, es re' ansiu' napoitana Kabin ma Prenat naan na'ko sin neek ein, onaim Kabin ma Prenat naan ka nafua fa saa'-saa'. ²⁰ Ma

✧ 4:12 Nai' Yesaya 6:9-10

finin re' anmoufun neu auf afa', esan re' sin re' anneen ma antoup Kabin ma Prenat naan, rarit natuin Uisneno In a'romin. Rarit sin nmoe' 'moe' areokt ein, on re' finin re' nafuan. Mo'et bian nasuuf no bo' teun, bian no bo' nee, ma bian no nautn es.”

Kaisa' amtoeb paku ampake 'kora'
(Nai' Lukas 8:16-18)

²¹ Nai' Yesus na'uab piut na'ko koof' ee in tunan. In nfee reta' es anteni' mnak, “On mee! Hi miit miit, ai' kaah, karu atoni' nout pauk ana', rarit antoeb je npaek a'kora'? Ai' natuun ee nbi haark ee in nupun. Ka tiit fa fe', ai'? Karu natuun ee nbi naan, in ka npiin fa goen. Atoni' ro he natunu' paku nbi bare 'ratan he npiin.✠

²² Nok ranan naan, rasi re' nahunu te ma'koro', of mamnita'. Ma saa' re' oras ia ka mahini' fa, of mahini'.✠ ²³ Sekau es re' anneen ma anheek naan reta' ia in a'moufun, maut he nateenb ee nnao nkoon.

²⁴ Mitenab mirek-reko'! Karu hi mnilei atoni' in a'mo'en, atoni' bian of annilei ki on naan msa'. Uisneno of annilei ki nneis na'ko naan amsa'.✠

²⁵ Karu sekau he naim Uisneno In romin batur-batur ate, in mahiin ee of nafaof gon piut. Mes tuaf re' ka nrae natuin fa Uisneno In romin, in moon goe of nafaof gon piut amsa'.”

Reta' anmatoom nok fini re' anmoin kuun

²⁶ Rarit Nai' Yesus na'uab antein am nak, “Uisneno In Apreent ii anhainua ntein on, on re' finin re' mapone' anbi atoni' in rene. ²⁷ Maski

✠ **4:21** Nai' Mateos 5:15, Nai' Lukas 11:33 ✠ **4:22** Nai' Mateos 10:26, Nai' Lukas 12:2 ✠ **4:24** Nai' Mateos 7:2, Nai' Lukas 6:38

atoni' naan anfaen neu in umi, ma fai-manas in ntuup ma nfeen, in nnikan nain finin naan. Mes finin naan natoor ma na'naen piut. ²⁸ Finin naan anmonin kuuk anbin afu, anmurai na'naen, nasufan, ma napunin. ²⁹ Karu maak ee namnatu te, in tuan ee suma neem he noun goah. Uisneno In Apreent ii on naan amsa'. Are' saa'-saa' ii, Uisneno es re' anmeup sin.”☆

Reta' anmatoom nok fini re' ana krisi'

(Nai' Mateos 13:31-32,34, Nai' Lukas 13:18-19)

³⁰ Rarit Nai' Yesus na'uab antein am nak, “Au 'fee 'teni' ki reet es on nai. Uisneno Iin na, un-unu' te sin fauk aah, mes na'ko neno neu neno, sin nma'baab ok piut ma amfau reu'f ein. ³¹ Naan namnees on re' fini re' ana krisi' nbi po'on. ³² Karu hit tseen fua ana krisi' naan, in na'nae njair hau kou' re'uf nbi po'on naan. Tar antea koorn ein neman ma namin mafo' anbin naan, ma nakuun ein.”

³³ Nai' Yesus nanoni' sin anpake cara on re' naan, natai nok sin hinit. ³⁴ In biasa npaek reta' karu In nanoni' tuaf bian sin. Mes karu In nok In atoup noin' ein, In natoon are' reta' naan sin a'moufk ein.

Usif Yesus nasnasab ain ko'u

(Nai' Mateos 8:23-27, Nai' Lukas 8:22-25)

³⁵ Maans ii nmaeb jen, mes Nai' Yesus anbi koof' ee tuun ee fe'. Ma In nreun In atoup noin' ein am nak, “Iim arkit atraak teu neof goe panin.”

³⁶ Rarit sin nsaen kofa' bu'-bua' nok Nai' Yesus. Ma sin nnao nasaitan too mfaun ein anbin naan. Mes bian ansaen nbin kofa' 'teta'. ³⁷⁻³⁸ Oras naan

☆ **4:29** Nai' Joel 3:13

Nai' Yesus antao In a'nakan anbi aka'nunu' ma ntuup anfiin anbi koof' ee in kotin nanan. Sin annaon ka 'roo fa te, ain kou' goe neem. Ma oikn ein anpesan sin, ma oe je ntaam anbi Nai' Yesus sin kofa', tar antea aar akre'o te naheun. Onaim atoup noin' ein namtau nmaten. Ma sin neem anpoo' nafeen Ee mnak, "Aam! Amfeen fe'! Hit he treem atmaet jen! Mes Ho ka mfairoir kit fa!"

³⁹ Anneen on naan ate, Nai' Yesus anfeen ma ntaar anin am nak, "Musnaas nai!" Rarit In naprenat oikn ein naan am nak, "Mi'tena' nai!" Oras naan, anin naan nasnaas nain, ma oikn ein naan na'teen ein nanin. ⁴⁰ Rarit Nai' Yesus nakain In atoup noin' ein am nak, "Nansaa' am es hi mimtau baiseke' on naan? Hi ka mmui' fa rasi fnekat meu Kau, oo?"

⁴¹ Sin arsin namtaun ma nsanmakan. Ma sin na'uab ein am nak, "In re' ia, sekau? Tar antea anin ma oikn ein sin natuin In aprenat!"

5

Usif Yesus nareko' atoni' re' niut reu'f ein ansaen ee

(Nai' Mateos 8:28-34, Nai' Lukas 8:26-39)

¹ Rarit Nai' Yesus nok In atoup noin' ein antean nefe Galilea in panin, anbi baer jes re' anteek ee te, nak Gerasa. ²⁻⁶ Anbi naan, anmui' naan atoin es anniut sae tar in namaun. In natua nbi faut naetf ein. Fai-manas in na'oin neu-mneem nok ao afa' nkoon anbi are' knete' ma 'noonf ein, ma nhunun ka natfeek fa. In ntuut napapa' in aon neik fatu. In ma'tain re'uf. Ka tiit fa es, re' bisa nfuut goe, maski npaken korenit amsa'. Sin nfuut in haen-niman fani-fani npaken korenit,

mes in nafeek koreent ein naan, ma niit besin naan in na'iup sin na'kon in haek ein. In ro ma'tain re'uf, tar antea ka tiit fa tuaf es, re' bisa ntahan naan ee.

Oras Nai' Yesus sin ansanun na'kon kofa', aniut saes naan niit sin na'ko a'roo. In npoi na'ko faut naetf ein, ma in naen an'ain Nai' Yesus ma nri'tuu nbi In matan. ⁷⁻⁸ Oras Nai' Yesus niit atoni' naan ate, In na'uab am nak, "Hoi! Niut re'uf! Ampoi nai mu'ko atoni' ia!"

Rarit atoni' naan anhunun naher-heer am nak, "Hoi! Ho he munsaa' kau? Au uhiin 'ak Ho re' ia Nai' Yesus, Uisneno Akuasat In Anah. Au 'toit Ko he Ho kaisa' mha'mui' kau, joo!"

⁹ Rarit Nai' Yesus nataan ee mnak, "Ho kaanm ii sekau?"

In nataah am nak, "Au kaank ii nai' *Legion*, natuin hai mfau re'uf, on re' sorarus batalion-batalion ein!"

¹⁰ Niut reu'f ein anpaek atoni' naan he ntoit Nai' Yesus he kaisa' nreun sin he npoin na'kon bare naan.

¹¹ Anhaumaak bare naan, atoni' fauk antitun fafi pukan kou' goes. Fafin re' naan sin of oni' nifun nua. Sin namin amnahat anbin a'to'ef naan in abnapan. ¹² Rarit niut reu'f ein antotin am nak, "Amreun kai he hai mnao mtaam meu fafin nee, tua."

¹³ Nai' Yesus antoup sin haan totis naan. Es naan ate, are' niut reu'f ein naan anpoin ma antaman neun fafin naan. Fafi pukan naan, naen ansiksakn ok, ma nasroro nsanun npe'on aisanut ma nmoufun ntean niuf goe nanan. Ma sin nreem anmaten ok-oke'.

14 Ankius nitan on naan ate, atiut faifn ein namtaun nmaten. Sin naenan nfuun am natefan kuan-kuan mapaumaak ein, ma natonan are' too mfaun ein. Es naan ate, too mfaun ein anpoi neman he nkius nitan kuuk saa' re' anjarin nrair anbi naan. 15 Sin neem natefan nok Nai' Yesus, ma sin niit atoin aniut saes naan antook anbi naan. Mes in teenb ee nareko nrair, ma in anpaek tais. Ma oras sin niit rasi naan sin arsin namtaun, fin sin nahinin nak sekau es re' nabei' he nriu' napoitana niut reu'f ein na'kon atoni' naan, ro in atoin ma'tain re'uf. 16 Rarit sin arsin anmaktoon ein nak sin niit nok sin maatk ein nak, atoin aniut saes naan nareko nrair, ma faifn ein anreman nmaten. 17 Rarit sin ntotin teb-tebe he Nai' Yesus annao nasaitan sin pah.

18 Oras Nai' Yesus he nsae nfain neu kofa' naan ate, atoin aniut saes re' nareko nrair naan neem ma ntoit he in bisa nnao nabua nok Nai' Yesus.

19 Mes Nai' Yesus anpeen. In na'uab neu atoni' naan am nak, “Reko nneis ho mfain nai meu ho noont ein. Mutoon meu sin are' kanan rasi re' Uisneno nmo'e nrair sin neu ko. Mutoon meu sin am mak, Uisneno nneek ma nkasian ko!”

20 Rarit atoni' naan annao nfuun am nateef pah es nok nain in koat ein bo'es, re' anteek ee te, nak 'Dekapolis'. In nsaksii ma natoon are' kanan rasi re' Nai' Yesus anmoe' nrair sin neu ne. Ma are' tuaf-tuaf re' anneen in uaban naan ansanmakan ma na'uab ein nak, “Ro ma'tani', oo!”

Usif Yesus namonib nafani' nai' Yairus in aan fetu. Ma bifee ameen naa' anreo' Usif Yesus In baru mnanu'

(Nai' Mateos 9:18-26, Nai' Lukas 8:40-56)

21 Rarit Nai' Yesus sin ansaen kofa' ma anraak anfanin neun neof goe in panin. Oras sin ansanun na'ko kofa' naan, too mfaun ein neman ma nauban naan Ee. 22 Anbi kota naan, anmui' naan atoin es, in kaan ee nai' Yairus. In es re' a'nakat anbi uim onen kota naan. Oras in niit Nai' Yesus, in nri'tuu nbi Nai' Yesus In matan, 23 ma ntoit Je mnak, “Koi, Aam! Au aan feot goe fe' toon bo'es am nua. In nameen ma he noi nmaet jen. Ho mkoen Om uum he mturun mureko' maan au anah naan, tua!”*

24 Onaim Nai' Yesus annao natuin nai' Yairus neu in umi.

Oras sin annaon on naan ate, too mfaun ein nokan ma anbeu' Goe.

25 Anbi too mfaun ein naan, anmui' bifee jes re' napein funan re' nroni kre'o-kre'o ka natfeek niit fa oni' toon bo'es am nua goen. 26 In narair roit nok in a'mui'k ein he nbaen areko' meens ein. Mes ka tiit fa tuaf es bisa nareko' in menas naan. In naa' ii ka nheut niit fa, tar in menas naan ma'fena'. 27-29 Bifee naan anneen fani-fani anmatoom nok Nai' Yesus. Es naan ate, in nbeu' too mfaun ein naan, he npaumak-maak anbi Nai' Yesus In kotin. In natenab am nak, “Asar au 'reo' 'aan ahaa In baru mnanu', au of ureok.”

Oras in nreo' Nai' Yesus In baur goe te, nok askeken, naa' naan anheut. In nnaben ate in nareok goen.

* 5:23 Suur Akninu' uab Yunani ntui mnak, “Ama', amkoen om uum he mtao ho 'nimam meu na, maut he in nareko nfain, ma nmoin.” Anbi naan amsa', “tao 'nimaf” in a'moufn ii nak, “mturun he mureko”. Aan feto naan in toon re' nmoin naan ii, matu'i et era' 42.

³⁰ Nateef oras naan amsa', Nai' Yesus annaben ate anmui' nenuf re' anpoi na'ko In tuan. Es naan ate, In nabani' ma nkiaus neu too mfaun ein naan. Rarit In nataan sin am nak, “Sekau es re' anreo' Au baru?”

³¹ In atoup noin' ein natahan am nak, “Ho mkiaus Kuum. Too mfaun sin anmabe'un es nok es ate, Ho mutaan am mak, ‘Sekau es re' anreo' Au baru?’”

³² Nai' Yesus ankius sin mese'-mese' he naim tuaf re' anreo' In baur goe. ³³ Anneen Nai' Yesus nataan on naan ate, bifee re' naan namtau ma na'ta'i. Rarit in nri'tuu nbi Nai' Yesus In human ma In matan, ma nmanaku' mnak, “Koi, Aam! Au es re' a'reo' ho baru naan, tua.”

³⁴ Ma Nai' Yesus antoin bifee naan am nak, “Ain! Natuin ho nekam na'teeb batur neu Kau, es naan ate ho mureok. Ho mfain nai nok neek marinet, fin ho susat naan namsoup goen.”

³⁵ Oras Nai' Yesus na'uab fe' on naan ate, tuaf neman na'kon nai' Yairus in umi, ma natoon am nak, “Eee, kasian! Ho aan feot goe, ain ee oek' ein, tua. Kaisa' muhaeba' Uis tungguru mtein!”

³⁶ Mes Nai' Yesus ka nfairor fa tuaf ein naan sin uabk ein. Onaim In na'uab neu nai' Yairus am nak, “Kais mumtau! Ampirsai meu Uisneno!”

³⁷ Rarit Nai' Yesus anreun too mfaun ein ok-oke' he namaik antaahn ein nbin naan. Mes In nok ahaa nai' Petrus, nai' Yakobus ma in orif nai' Yohanis, he sin annaon nkonon. ³⁸ Oras sin antean nai' Yairus in umi, sin niit too mfaun an'uurs ein biru ma tainaunus huma'-huma', bian ankaen, ma bian nainin. ³⁹ Nai' Yesus antaam anbi naan. In nataan sin am nak, “Nansaa' am es hi mtaisiub ma mkae on re' ia? Ri'ana' re' ia ka nmaet fa. In suma ntuup kuun.”

⁴⁰ Oras sin neen Nai' Yesus na'uab on naan ate, sin nmanin nfaer Ee.

Rarit In nreun sin he npoin ok-oke'. In no'en ri'ana' naan in ainaf-amaf, ma nok In atoup noni' tuaf teun, rarit sin arsin antaman anbin ri'ana' naan in ke'en. ⁴¹ Onaim Nai' Yesus annaa' ri'ana' naan in a'niman, rarit In npaek sin uab Aram am nak, “*Talita kum!*” (Re' neik hit uab ii te nak, “Aan feto! Amfeen nai!”)

⁴²⁻⁴³ Nok askeken ate, ri'aan feto naan anfeen ma anhaek. Nai' Yesus anreek aan feto naan in ainf ee nak, “Amfee ne he naah!”

Are' too mfaun ein re' niit rasi naan ansanmakan. Mes Nai' Yesus antaar sin nok haan ma'tani' mnak, “Kaisa' mitonan es-es mak Au umonib ufani' ri'aan feot amates re' ia!”

6

Abitan Nasaret antorak Usif Yesus

(Nai' Mateos 13:53-58, Nai' Lukas 4:16-30)

¹ Rarit Nai' Yesus nok In atoup noin' ein annaon nfanin neun In kuan Nasaret. ² Nateef nok atoin Yahudis sin neon onen, Nai' Yesus antaam anbi uim onen he nfee noni'. Neno naan, too mfaun ein neman he n'oen ein. Oras sin arsin anneen In noin' ein ate, sin nshanmakan ma na'uab ein am nak, “Atoni' ia mahiin ii ma'tani'! In anmui' kuasat amsa'! Nok ranan mee m'es In bisa on re' ia? ³ Amneon ii, In suma tukan hau. Hit tahiin In ainaf bi Maria, nok are' In oirf ein, esan re': nai' Yakobus, nai' Yoses, nai' Judas nok nai' Simon. Hit tahiin In feotf ein amsa'. Hit tok Ne arkit tatua kuan mese'!” Onaim sin nsaekn Ee ma ka nnenan ntein Ee fa.

4 Rarit Nai' Yesus na'uab am nak, “Tebe! Atoni' anhormaat mafefa' kninu' Uisneno re' anao-amnemat, anneis na'ko mafefa kninu' kua tuaf.”✧

5-6a Too mfaun ein, sin neek manun baiseke', tar sin ka nromin fa he npirsain neun Nai' Yesus. Es naan ate, In nsanmaak, tar antea In ka nmo'e nteni' fa rais sanmakat anbi naan. In suma anreo' nareko' naan ahaa amenat fauk aah.

Usif Yesus anreek haefan In atoup noin' ein tuaf bo'es am nua

(Nai' Mateos 10:5-15, Nai' Lukas 9:1-6)

6b Rarit Nai' Yesus annao neu kuan-kuan re' anmapaumaakn ein anbi naan, ma nfee sin noni' anmatoom nok Uisneno In romin. ⁷ In no'en naan atoup noni' tuaf bo'es am nua, ma nreun sin tuaf nu-nua, he nnaon ma natoon Uisneno In Rais Reko. In nfee kuasat amsa' neu sin he nri'un niut re'uf. ⁸⁻⁹ In nba'an sin am nak, “Kaisa' meik brua' amfaun ambi ranan, fin Uisneno of es re' an'ator hi perluut ein. Hi kais meik beti', noni-roit, ma 'kapi'. Hi meiki haa teas, 'pein haef, ma mpaek maan ahaa baru mese'. ¹⁰ Karu sekau ntoup ki he mtaam meu in umi, mimaika' ambi naan tar antea hi mnao mkoon meu bare bian. ¹¹ Mes karu nbi bare mee sin ka ntoup ki fa, ma sin ka natniin ki fa, ampoi mi'ko bare naan. Ma mitonan sin am mak, 'Natuin hi ka mroim he mitniin fa, es naan ate maut he hi msutai kiim

✧ 6:4 Nai' Yohanis 4:44

in amre'un!'"*

¹² Rarit sin nnaon ma natoon Rais Reko naan. Sin nak, "Are' mansian arki ro he misaitan hi sanat ma penu sin, ma mtebi mfain he mmoin mituin Uisneno In romin." ¹³ Onaim sin anriu' napoitana niut reu'f ein amfaun. On naan amsa', sin naronip mina' neu atoin amenat sin a'naak ein, ma n'oen ein he nareko' sin. Onaim sin narekon. ☆

*Sin na'maet nai' Yohanis Asranit
(Nai' Mateos 14:1-12, Nai' Lukas 9:7-9)*

¹⁴ Oras naan, too nbi bare-bare anneen anrair anmatoom nok Nai' Yesus. Reta' anmatoom nok Nai' Yesus In kuasan manena' anrair antean usif Herodes amsa'. Tuaf bian na'uab ein am nak, "Nai' Yohanis Asranit anmoni nfain et Nai' Yesus In tuan! Etun In na'bei' he nmoe' are' kanan rais sanmakat."

¹⁵ Mes tuaf bian nak, "Kahaf! In re' ia, mafefa kninu' nai' Elia es re' anmoni nfain et In tuan." Bian amsa' nak, "In re' naan, Uisneno In mafefa kninu' tuaf es na'ko ahuunt ein." ☆

¹⁶ Mes oras Usif Herodes anneen rasi naan ate, in nak, "Ia nai' Yohanis Asranit, re' neon goes ii au 'reek tuaf he n'oet nafeek in a'nakan. Oras ia in nmoin anfain jen."

¹⁷⁻¹⁸ Usif Herodes anreun on re' naan, natuin in nmaka'rasi' nok nai' Yohanis. Rasi naan na'uub on, on nai: usif nai' Herodes nasiik naan in orif

* **6:11** Anbi Suur Akninu' uab Yunani, ntui mnak, "antekar afu skuku' na'ko sin haek ein". Anbi naan, oras naan, atoni' biasa ntekar afu skuku' na'ko sin haek ein he njair tanar nak, tuaf re' ka nroim fa he nneen ate, ansutai kuun in amre'un. Amrees ambi nai' Lukas 10:4-11; *Haef ein sin Reta'* 13:51 amsa'. ☆ **6:13** Nai' Yakobus 5:14 ☆ **6:15** Nai' Mateos 16:14, Nai' Markus 8:28, Nai' Lukas 9:19

nai' Felipus in fee, kaan ee bi Herodias. Amneon ii, nai' Felipus nok bi Herodias ka nmanpoirn ein fa fe'. Natuin rasi naan am es, nai' Yohanis nakain ee fani-fani mnak, "Aam Usi'! Ka nabei' fa he ho mait ho ori' in fee. Natuin rasi naan antanhai hit harat atoin Yahudis." Mes nai' Herodes in nsao ru'-ruu'. Ma in nreek tuaf he nheek nai' Yohanis ma nataam ee neu bui.☆

¹⁹ Natuin nai' Yohanis nakain ee fani-fani on re' naan, es naan ate bifee naan natunu' neek menas he nroor niis ne. Mes in ka napein mainuan fa fe', fin nai' Herodes nataam anrair nai' Yohanis anbi bui, ²⁰ ma nreek soraurs ein he npao goe rek-reko.

Nai' Herodes anmanu'hain nai' Yohanis. In nahiin nak Uiseno es re' anreek haefan nai' Yohanis. Ma nai' Yohanis naan atoin neek reko. Nai' Herodes anroim he nneen nai' Yohanis in uaban. Mes neot es-neot es ate, in npenan nai' Yohanis in uaban.

²¹ Neot es, fenai Herodias napein mainuan he nateaba' in neek menas naan. Oras naan, sin nfeest ein neun nai' Herodes in neon mahonin. Sin naskau a'naet ein he nokan nbukaen anbin fesat naan. Amnookt ein, sin esan re' anaa' aprenat, a'naak sorarus, ma mnasi-mnasi' pah Galilea. ²² Oras feest ii ntainua goen, fenai Herodias in aan feot goe antaam neem ma nabsoo'. In absoo'n ii reokn ii kah een, tar antea nmoe' Usif Herodes nok are' taumn ein fesat naan anmariin anmaten. Es naan ate, Nai' Herodes no'en ri'feot abso'ot naan ma nak ee mnak, "Ho mroim he mtoit saa' ate, mutoon! Au ro he 'fee ko. ²³ Maski ho mtoit tar antea nbait

☆ **6:17-18** Nai' Lukas 3:19-20

nua au preent ii msa', au 'fee ko goe. Au 'suup 'eik Uisneno In kanan!"

²⁴ Ri'aan feto naan annao ma nataan in ainf ee mnak, "Ain! Ho mroim he au 'toit saa' re' reko nneis na'ko ama'?"

Ma in ainf ee nataah ee nak, "Hau, oo! Reko! Amnao nai ma mtoit maan nai' Yohanis in a'nakan."

²⁵ Rarit ri'aan feto naan neem rabah neu nai' Herodes in matan am nak, "Aam! Au 'toit he mfee kau nai' Yohanis in a'nakan. Amtao maan ee mbi dulang es. Rabah!"

²⁶ Oras nai' Herodes anneen haan totis naan ate, in neekn ii namneuk. In ka nabei' fa he nheer nafani' in haan supat, natuin are' too mfaun ein anneen narair haan supat naan.

²⁷ Rarit in naprenat naan a'naak soraurs es ma nnao n'oet neik nai' Yohanis in a'nakan na'ko uim bui. ²⁸ Rarit sin n'oet naan nai' Yohanis in a'nakan, ma ntao goe nbi dulang es. Rarit sin annao naat ee neu ri'aan feto naan. Ri'aan feto naan antoup goe, ma nnao nfee je neu in ainaf.

²⁹ Oras nai' Yohanis in atoup noin' ein annenan nak, an'ote nrair nai' Yohanis in a'nakan, sin neman ma nait neik nai' Yohanis in aon, ma annaon nsuub ee.

Reta' anmatoom nok nai' Yohanis in a'maetn ii antuu' ma nheu' on re' naan.

Usif Yesus antuthae too nifu niim anneis

(Nai' Mateos 14:13-21, Nai' Lukas 9:10-17, Nai' Yohanis 6:1-14)

³⁰ Neot es, Nai' Yesus In atoup noin' ein re' In nreek haefan sin neon goes ii, sin nfain neman ma nabuan nok Ne. Sin natoon are' kanan rasi re' sin nmo'e nrair sin, nok are' saa' re' sin

nanoni' nrair sin neu too mfaun ein. ³¹ Oras naan, too mfaun ein annao na'onin neu-mneman he naim Nai' Yesus. Tar antea In nok In atoup noin' ein ka napenin fa mainuan he nbukaen. Nai' Yesus na'uab nok In atoup noin' ein am nak, “Iim he tnao taim baer ma'koro', he tapein mainuan he tasnaas akre'o.”

³² Onaim sin arsin nsaen anbin kofa', ma sin nnao namin baer ma'koro', na'roo na'ko kuan.

³³ Mes too mfaun ein niit kofa' naan nnao nabnoon anpeo' nefo naan in ninin. Rarit sin natuin ein anpe'on raan meto', ma sin ntean nahunun Nai' Yesus nok atoup noin' ein. ³⁴ Oras Nai' Yesus ansaun na'ko kofa' naan, In niit too mfaun ein anpao nain Je. Rarit In nkasian sin, natuin sin ka nahinin fa he nmo'en saa', nahuum on re' a'bib-kasen re' ka nmu'in fa atukus. Rarit In nanoni' sin Uiseno In romin[☆] ³⁵⁻³⁶ na'ko oras maans ii na'puup tar antea maans ii nmaeb. Onaim In atoup noin' ein na'uab neu Ne mnak, “Aam! Reko nneis Ho mreun too mfaun ein ok-oke', he nnao nsosan mnahat anbi are' kua paumaka' nbi ia. Fin maans ii he noi nmouf goen, ma ka tiit fa mnahat et bare ia.”

³⁷ Mes Nai' Yesus nataah sin am nak, “Anbain! Ro hi es re' he mfeen sin he nbukaen.”

Mes sin nataan Ee mnak, “Airoo! Karu hit ttuthae too mfaun ein ia, hit ro he tapoina' roit ii ko'u! Namnees nok ameupt es in kai nbi toon

☆ **6:34** Surat Sensus 27:17, 1 Uisf ein sin Reta' 22:17, 2 Mape'o 'Naof Pah Isra'el ma Pah Yahuda 18:16, Nai' Yeskial 34:5, Nai' Sakarias 10:2, Nai' Mateos 9:36

es!† Hit he tapein roit amfaun naan ta'ko mee?”

³⁸ Mes Nai' Yesus nataah sin am nak, “Hi mnao maim miit fe', sekau es amneik beti'.”

Rarit sin nnao natanan ma nfain neem nato-
nan am nak, “Anmui' utunu' fua' niim, nok ika'
fua' nua goah.”

³⁹ Rarit Nai' Yesus anreun too mfaun ein naan
he ntokon pukan-pukan anbin huun. ⁴⁰ Onaim
sin ntokon puukn ok. Pukan bian nabuan nat-
natun, ma pukan bian anteni' bo' nim-niim.

⁴¹ Rarit Nai' Yesus nait naan utunu' fua' niim
ma ika' fua' nua. Onaim In nbaiseun neu neon
goe tunan ma ntoit makasi neu Uisneno. Rarit
In nteib utunu' naan pisa'-pisa', ma anfee sin
neu In atoup noin' ein, he nnao nbatin too
mfaun ein naan ok-oke'. Ika' fua' nua' ein naan
amsa', In nbait sin neu sin arsin. ⁴² Onaim sin
arsin anbuken tar antea namsenan. ⁴³ Oras
sin anbuken nrarin on naan ate, atoup noin'
ein nabuab nafani' mnaah nesif naan, naheun
a'kora' bo'es am nua.

⁴⁴ Sin arsin of oni' too nifun niim. Naan sin
nsoi' naan ahaa atoin ein. Bifee ma ri'ana' ka
maso'ik fa.

Usif Yesus annao npeo' oe je fafon

(Nai' Mateos 14:22-33, Nai' Yohanis 6:16-21)

⁴⁵ Rarit Nai' Yesus anreun In atoup noin' ein he
nnao nsaen kofa' he nnao nahunun neun kuan
Betsaida et neof goe panin. Mes In namaika' nbi
nana fe', he nreun too mfaun ein he nnao nfanin.

⁴⁶ Oras sin arsin nfanin ate, In nsae neu 'toe'f es
ma n'onen.

† **6:37** Suur Akninu' uab Yunani ntui mnak, “roi muti'*dinari*
natun nua”. *Dinari* es, roi muit unu', namnees nok ameput tuaf
es in kai nbi neon goes.

47-50 Oras maans ii nmabe nrari te, Nai' Yesus ansanu nfain. In niit atoup noin' ein sin koof' ee ntea nrair neof goe tnanan. Mes sin anseopn ok ma'tani', natuin kofa' naan annao nraban nok ain ko'u. Oras neis noi nmeu te, Nai' Yesus annao natuin sin. Mes In nnao npe'o haa oe je fafon. Oras In he nnao nahunun kofa' naan ate, sin nkius niit Ee. Sin namtaun nmaten. Onaim sin maktaan ein es nok es am nak, "Hoe! Saa' na es re' nee? Niut goa oo?"

Mes Nai' Yesus na'uab am nak, "Hoe! Hi kaisa' mimtau! Au es re' ia."

51 Oras Nai' Yesus antaam neu kofa' naan, anin naan nasnaas nain. In atoup noin' ein ansanmakan batuur-batuur. 52 Sin fe' niit Nai' Yesus In npaek kuasat ma ntuthae too nifu niim anneis, mes sin ka nahiin namneo fa fe' In kuasat naan, natuin sin neek manun.

Are' amenat na'kon Genesaret sin annaon neun Usif Yesus

(Nai' Mateos 14:34-36)

53 Oras sin antean nefo naan in panin, sin nsanun anbi kota Genesaret in ninin. 54 Oras sin nsanun na'kon kofa' naan, too mfaun ein niit sin. Ma sin anmakoa' ein am nak, "Hoe! Nai' Yesus neem een, oo!" 55-56 Sin arsin naenan ma nmaktoon ein nfuun am nateef, tar antea sin nroi neik are' kanan ameent ein.

Teik uab para', asar sin nnenan nak Nai' Yesus et bare mee, sin arsin nroi neik are' kanan ameent ein, ma natupa' sin anbi mnera' huu sona'. Sin nateenb ein am nak, "Asar ameent ein anreo' naan Nai' Yesus In baru mnaun ee in tuukn ee te, sin of narekon." Sin nmo'en on naan ate, sin nareok nanin.

7

*Atoran mansian kaisa' naneuk Uisneno In atoran**(Nai' Mateos 15:1-9)*

¹ Anmui' naan atoin Farisis puukn es ma tunggur agama Yahudi fauk re' neman na'kon Yerusalem he natefan nok Nai' Yesus. ²⁻⁵ Atoin Farisis sin annaa' naher-heran sin harat atoin Yahudis. Tait i'tope' on re': karu atoni' he nbukae, ro he nafaun in a'niman natuin haart ii in romin. On naan amsa', karu nfain neem na'ko 'masa', sin ro he naniun fe'. Tar antea sin bare' umi 'haan ee msa', on re' 'pika', kraas, pois oe, ro he nsaef sin natuin haart ii in romin, hena' bisa npaek sin he nbukaen.

Karu anmui' atoin Yahudis bian re' ka natuin fa haart ein naan, atoin Farisis sin nato'on.

Es naan ate, sin nato'on oras sin niit Nai' Yesus In atoup noin' ein nbukaen, mes ka nafaun fa sin a'niimk ein natuin haart ii in romin. Rarit sin neman ma nasaan Nai' Yesus am nak, "Nansaa' am es ho atoup noin' ein nbukaen mes sin ka nafaun fa sin a'niimk ein? Naan, sin nraban hit atoran harat na'ko atoni mnais uun ein!"

⁶⁻⁷ Mes Nai' Yesus nataah sin im nak, "Hi re' ia on re' atoni' re' na'uab ate, a'teta', mes hi mmo'e te, a'teta'! Nahunu te, ka'o Yesaya antui nain Uisneno In kabin am nak,

'Sin npures ma nbo'is Kau,

npaekn ahaa sin ruruk koitk ein, mes ka npoin fa na'kon sin neek ein.

Sin a'moe'k ein on re' naan ruum am parsuum aah.

Sin ka nfairair fa Au romik,

mes sin natuin ahaa mansian ii in romin.'

Hi huma' mese' on re' sin imsa'.[☆] 8-9 Hi misaitan amrair Uisneno In aprenat ma mituin ahaa mansian ii in harat. Hi mahinim ma manoem ein ma'tain re'uf!

¹⁰ Nahunu te, ka'o Musa natoon anrair Uisneno In aprenat am nak, 'Amhormaat hi mahoint ein.' Antuut antein am nak, 'Karu tuaf es naseku' in ainaf ai' in amaf, ro he thukun tiis ne.'[☆] ¹¹⁻¹² Uisneno nanoni' ki on naan, mes hi minoni' 'teta' na'ko naan. Hi mak, 'Karu tuaf es anba'an anrair he nfee saa' es neu Uisneno, maski in ainaf-amaf ansuus anmaten, mes bare' naan ka bisa npaek je fa he nturun sin, natuin anba'an anrair he nfee je neu Uisneno.' ¹³ Es naan ate, fe'e na Au 'ak ki m'ak, hi mporin main Uisneno In romin, ma hi mseek ee meik atoran mansian. Anmui' atoran amfaun re' hi mseek ee nahuum on re' naan."

*Rais re'uf re' anpoi na'ko atoni' in nekan
(Nai' Mateos 15:10-20)*

¹⁴ Rarit Nai' Yesus no'en tuaf bian anbin naan, ma na'uab am nak, "Amneen mirek-reko', he hi mihiin. ¹⁵ Are' saa' re' antaman neu atoni' in tain ka nhai'niis fa in tuan. Mes saa' re' anpoi nfain, es re' neik hai'nisit neu in tuan. ¹⁶ [Sekau he mneen ate, amneen he muhiin!"]*

¹⁷ Rarit Nai' Yesus nok In atoup noin' ein anaon nasaitan too mfaun ein naan, ma antaman

[☆] **7:6-7** Nai' Yesaya 29:13 [☆] **7:10** Anpoin na'kon Pah Masir 20:12, 21:17, A'naak Rais Pirsait ein sin Atoran 20:9, Surat re' Nareta' Nafani' Raan A'honis 5:16 * **7:16** Suur Akninu' uab Yunani re' manasik anneis ka ntui fa era' 16.

neun uim jes. In atoup noin' ein nataan reta' naan in a'moufun. ¹⁸⁻¹⁹ Nai' Yesus nataah sin am nak, “Hi ka mihiin fa msa', aa oo? In a'moufn ii on nai: saa' re' atoni' nbukae je, naan in reko kuun. Mes saa' re' anpoi nfain naan, in es ka reko fa. Saa' re' hit tbukae je, antaam neu hit taik, rarit anpoi nfain. (Usif Yesus In sairt ii nak, atoni' bole nbukae saa'-saa' aah. Ka taras fa.)

²⁰ Mes saa' re' anpoi na'ko atoni' in nekan, naan es re' neik hai'nisit, tar antea Uiseno nmai'niisn ee, ma ka nroim fa he nabua nok ne. ²¹ Rais re'uf namfau anpoi na'ko atoni' in nekan, on re': tenab amre'ut, rais makonit, rais bakan, rais marorot, ²² rais paru', rais makaket, moe' re'uf, puta-kriut huma'-huma', sinmakat, mantinus, na'uab na're'uf es, nabeo', ka nahiin fa atoran, ma na'naak-faut.

²³ Are' 'moe' reu'f ein on re' naan anpoin na'kon atoni' in nekan. Naan es re' nareu' nafani' in tuan. Ma Uiseno nmai'niisn ee msa'.”

Usif Yesus anturun bifee mnais es re' ka atoin Yahudis fa

(Nai' Mateos 15:21-28)

²⁴ Rarit Nai' Yesus sin nasaitan bare naan, ma nnaon neun kota es, kaan ee Tirus. Antean bare naan, sin ntaman anbin uim jes, natuin Nai' Yesus In ka nroim fa he biak ein nahinin nak In et re' naan. Mes In ka bisa na'koro' fa.

²⁵⁻²⁶ Anbi naan, anmui' naan bifee mnais es, re' ka atoin Yahudis fa, re' nahoins ee nbi pah Fenesia et propinsi Siria. Oras in nneen nak Nai' Yesus neem ate, in nnao ma ntoit Je he nriu' napoitian niut re'uf na'ko in aan fetu.

²⁷ Nai' Yesus na'uab manporin am nak, “Ri'aan ein sin ro he nbukaen nahunun, rarit na' an'okar amnaah neisf ein neun asun.” [Nok sarit ma'nifa' nak, Nai' Yesus ro he nturun In atoin Yahudis sin fe', na' anturun atoin sona'.]

²⁸ Mes bifee naan nataah am nak, “Namneo, tua! Mes asun naan sin etan mei je nupun. Onaim sin nahan amnaah amouft ein na'ko ri'aan ein sin a'piik ein.” [Nok sarit nak, oras ri'aan ein anbukaen, asun naan napenin amnahat amsa'. Maski Nai' Yesus anturun Iin na kuun, In ro he nkius atoin sona' amsa'.]

²⁹ Anneen on naan ate, Nai' Yesus na'uab am nak, “Wee, bifee ia fe'! Ho uabam naan ro namneo! Es naan ate ho mfain nai, natuin niut re'uf ee anpoi nrair na'ko ho anah.”

³⁰ Rarit bifee naan antebi nfain. Antea in umi te, in anah naan antuup anfiin. Niut re'uf naan anpoi nrair.

Usif Yesus nareko' amuut es, ma ankoos nok amsa'

³¹ Rarit Nai' Yesus sin nasaitan kota Tirus, ma nnaon nabnonon npe'on ranan re' et tais je ninin, nkoon kota Sidon. Na'ko naan, sin nnaon nkonon tar antean nefo Galilea. Rarit sin nnaon neu pah es nok kota bo'es, re' sin nteek nain je mnak, ‘Dekapolis’.† ³² Anbi bare naan, anmui' atoin amuut es, re' ankoos nok. In aok-bian sin neik je nnao neu Nai' Yesus. Sin ntotin he Nai' Yesus antao In a'niman neu amenat naan, he nareok' ee. ³³ Onaim Nai' Yesus nasaitan too mfaun ein, ma nnao nmees nok atoni' naan. Nai' Yesus nataam In akrurun neu atoni' naan

† **7:31** ‘Dekapolis’ in a'moufn ii es re' ‘Kota Bo'es’.

in ruikn ein nua sin. Rarit In ntao hape nbi In akrurun naan ma anreo' atoni' naan in maan. ³⁴ Nai' Yesus anbaiseun neu neon goe ma nheer In asnasan, rarit naprenat anpaek sin uab am nak, “*Efata!*” (In a'moufn ii nak, “Mutfe'i nai!”)

³⁵ In na'uab on ahaa re' naan, mes amenat naan in ruik ein anneen nain oras naan. Ma in maan re' ka na'uab nahiin fa naan, anma'nuur nain amsa', onaim in nmurai na'uab nok reko.

³⁶ Rarit sin nua sin annao nfanin neun too mfaun. Nai' Yesus antaar sin am nak, “Amneen, oo! Kaisa' mitoon meu sekau-sekau mak, Au ureko' urair atoni' re' ia.” Maski Nai' Yesus antaar sin nok ma'tani' amsa', mes sin na'uab ein piut anbin bare-bare. ³⁷ Too mfaun ein re' anneen uab mantonas naan, ansanmakan. Sin na'uab ein am nak, “Ma'tain re'uf! Atoni' re' ia anmoe' are' saa' ii ro reko oke'. Akoost ate, anneen. Amuut ate, na'uab.”

8

Nai' Yesus antuthae atoni' nifun haa (Nai' Mateos 15:32-39)

¹⁻³ Ka 'roo fa on naan ate, anmui' too mfaun neem nabuan he nneen Nai' Yesus In uaban. Sin natuin Ee tar antea neno teun goen. Onaim sin nararin beti'. Rarit Nai' Yesus no'en In atoup noin' ein am nak, “Au 'kasion too mfaun ein ia. Bian neman na'ko bare 'roo, ma nabuan nok kit neno teun goen, tar antea sin nararin beti'. Reko nneis sin kais annaon nfanin nok tai ruman. Kais-kaisa' sin ntuamafun anbin raan atnana'.”

⁴ Nai' Yesus In atoup noin' ein nataahn am nak, “Aam! Bare ia na'roo na'ko kuan. Onaim hit ka neu fa he ntuthae taan too mfaun ein re' ia!”

⁵ Nai' Yesus nataan sin am nak, “Hi mmui' utunu' fua' fauk?”

Sin natahan am nak, “Hai mmu'i haa utunu' fua' hiut, tua.”

⁶ Rarit Nai' Yesus anreun too mfaun ein naan he ntokon anbin afu. Rarit In nait utunu' fua' hiut ein re' naan, ma ntoit makasi neu Uisneno. Rarit In anteib sin pisa'-pisa', ma nfee sin neu In atoup noin' ein. Sin nnaon ma nbatin neun too mfaun ein ok-oke'. ⁷ Ma sin napenin ika' fak-fauk amsa'. Rarit Nai' Yesus antoit makasi nteni' neu Uisneno anmatoom nok iik' ein naan. Rarit In nreun In atoup noin' ein, he nnaon nbatin nteni' neu too mfaun ein. ⁸⁻⁹ Sin arsin ok-oke' of oni' atoni' nifun haa. Sin nbukaen tar namsenan. Nbukaen nrarin on naan ate, atoup noin' ein nabuab amnaah neisf ein naheun 'poni hiut. Rarit Nai' Yesus anreek sin he nfanin ok-oke'. ¹⁰ Ma oras sin nnaon nfanin on naan ate, Nai' Yesus nok In atoup noin' ein ansaen neu kofa', ma nnaon nabnonon npe'on nefo naan in ninin, neun baer jes, kaan ee Dalmanuta.

*Atoin Farisis sin namin ranan he namouf Usif
Yesus*

(Nai' Mateos 16:1-4)

¹¹ Oras Nai' Yesus sin antean Dalmanuta, anmui' tuaf na'ko partei pirsait Farisi neman he natefan nok Ne. Sin nataan na'kee't Ee, ma sin ntoit Je mnak, “Aam! Mukrira' rais sanmakat he anjari 'tope' re' mamnita' nak, Ho mupein Ho ma'tanim mu'ko Uisneno.”[☆]

¹² Nai' Yesus anheer In asnasan, onaim In nak, “Karu Au 'neen hi uab ein naan, Au 'mei' jok!

[☆] **8:11** Nai' Mateos 12:38, Nai' Lukas 11:16

Nansaa' am es hi mtoit rais sanmakat? Kais on naan! Rais sanmakat ro nmu'i msa', mes Au ka 'mo'e 'fee ki fa.'*[☆]

¹³ Rarit Nai' Yesus annao nasaitan sin, ma ansae nfanin nbi kofa' nabua nok In atoup noin' ein. Ma sin nrakan neun nefo naan in panin.

Usif Yesus nanoni' nak, ampanat mirek-reko' atoin Farisis sin rais makopo'

(Nai' Mateos 16:5-12)

¹⁴ Oras Nai' Yesus sin antean nefo naan in atnanan, na' atoup noin' ein namnaun nak, sin nnikan nanin nak, sin ka neik ein fa beti'. Suma sin neik utunu' fua' mese'. ¹⁵ Anneen sin na'uab ein anteek utunu' on naan ate, Nai' Yesus nak sin am nak, “Hi ro he mpanat mirek-reko'! Kais hi mtoe mituin usif Herodes ma atoin Farisis sin rais makopo' amre'ut. Sin rais kopo' naan, nahuum on re' muur ii ankumu nseor goe nok uut, he uut naan nasraat ansae.”*[☆]

¹⁶ Anneen In na'uab on naan ate, In atoup noin' ein antaka'naan ein. Ma sin na'uab ein nak, “A'naef ee na'uab rais saa'? Of oni' In na'uab on naan, natuin hit ka teik fa utunu'.”

¹⁷ Mes Nai' Yesus nahiin sin neek tenab. Es naan ate, In na'uab am nak, “Nansaa' am es hi mi'uab ahaa utunu'? Hi ka mheek maan fa Au sairt ii, oo? Hi roenm ein ro nbufun nmaten!

¹⁸ Hi miit amrair meik hi maatm ein, mes hi ka mihiin fa in a'moufun! On re' hi ka miit miit fa fe'! Hi mneen meik hi ruikm ein, mes hi ka mihiin fa saa'-saa'. On re' hi ka mneen miit fa msa'! Hi mnikan main*[☆] ¹⁹ utunu' fua' niim re'

* **8:12** Nai' Mateos 12:39, Nai' Lukas 11:29 * **8:15** Nai' Lukas 12:1 * **8:18** Nai' Yeremias 5:21, Nai' Yeskial 12:2, Nai' Markus 4:12

Au 'teib sin pisa'-pisa' ma 'tuthae too nifun niim, ai'? Neno naan hi mibuab maan utuun anesit 'kora' fauk?"

Sin natahan am nak, "'Kora' bo'es am nua, tua."

²⁰ Nai' Yesus natahan anteni' sin am nak, "Hi mimnau, ai' kaah, neon goes ii, oras Au 'tebi 'bait utunu' ma 'tuthae too nifun haa? Hi mibuab maan utuun neisf ein naan 'poni fauk?"

Sin natahan am nak, "'Poni hiut, tua!"

²¹ Onaim Nai' Yesus nak, "Namneo! Hi miit nok hi matam. Mes nansaa' am es hi ka mihiin fa, Au ma'taink ii in amneemn ii na'ko mee?"

Usif Yesus nareko' aforot tuaf es anbi Betsaida

²² Rarit Nai' Yesus sin antean kuan Betsaida. Anbi naan, anmui' tuaf neik atoin aforot es neu Nai' Yesus. Sin ntoit Je he nreo' nareko' atoin aforot naan. ²³ Onaim Nai' Yesus annaa' atoni' naan in a'niman ma neik je npoi neu kuan ee in kotin. Rarit In npuran hape neu atoni' naan in matan, ma In nreo' goe. In natahan am nak, "On mee? Ho bisa miit, ai' kaah?"

²⁴ Atoni' naan na'aiti in matan, ma nkius a'rii-'ne'u, ma in nataah am nak, "Tua! Au 'iit mansian ein anbaknaon ein. Mes huumn ee on re' au 'iit hau ngguin esan re' anaot ein!"

²⁵ Ma Nai' Yesus antao nteni' In a'niman neu atoni' naan in matan. Ma atoni' naan ankius naher-heer anteni', ma in nahiin nak in niit reok goen. Oras ia in bisa niit nok akninu'. ²⁶ Rarit Nai' Yesus anreun atoni' naan he nnao nfain, ma namnaub ee mnak, "Ho mfain nai, mes amnao mutuin raan 'teta'! Kaisa' amnao mfain meu Betsaida."

Nai' Petrus anmanaku' nak, Usif Yesus naan Kristus, Tuaf re' Uisneno anruur nain Je na'ko unu'

(Nai' Mateos 16:13-20, Nai' Lukas 9:18-21)

²⁷ Rarit Nai' Yesus sin annaon nfuun am natefan kuan-kuan anbin Kaisarea Filipi. Anbin raan atnana' te, Nai' Yesus nataan sin am nak, “Karu tatuin too mfaun ein sin uabk ein, sin nak Au re' ia, sekau?”

²⁸ Sin natahan am nak, “Bian sin nak ‘nai' Yohanis Asranit’. Bian sin nak, ‘ka'o Elia, mafefa kninu' Uisneno unu' naan’. Ma bian antein nak, Ho re' ia tuaf es na'ko Uisneno In mafefa kniun ahuunt ein.”[☆]

²⁹ Ma Nai' Yesus nataan anteni' neu sin nak, “Mes natuin hi mahiinm ein ite, Au re' ia, sekau?”

Nai' Petrus nataah am nak, “Ho re' ia Kristus, re' Uisneno anruur nain Je na'ko unu'.”[☆]

³⁰ Mes Nai' Yesus antaar sin mates nak, “Ka nabei' fa he hi mitonan sekau-sekau saa' re' nai' Petrus na'uab ee re' ia!”

Usif Yesus natoon In ma'ne'at ma In a'maten

(Nai' Mateos 16:21-28, Nai' Lukas 9:22-27)

³¹ Rarit Nai' Yesus anmurai na'uab neu In atoup noin' ein am nak, “Au re' ia, Mansian Batuur-Batuur Kau. Au of upein rais ha'mu'it amfaun, natuin a'naak haart ein, a'naak rais pirsait Yahudis sin a'naakt ein, ma tunggur

[☆] **8:28** Nai' Markus 6:14-15, Nai' Lukas 9:7-8 [☆] **8:29** Nai' Yohanis 6:68-69

agaam ein ok-oke' of antorak Kau. Sin of anroor niis Kau, mes nmeu te,* Au 'moni 'fain.”

³² Nai' Yesus natoon maat-maat on naan, on-aim nai' Petrus anheer napaisb Ee, ma nakain Ee mnak, “Aam! Kaisa' mu'uab on naan! Au ka neu he 'konan sin fa, he nniman Ko.”

³³ Mes nai' Petrus in uaban naan ka natuin fa Uisneno In romin. Es naan ate, Nai' Yesus nabani' ma nkus In atoup noni' bian ein. Rarit In nakaina' nai' Petrus nok haan ma'tani' mnak, “Hoe! Naan niut reu'f ein sin a'naak kou' goe in uaban! Mu'roo mu'ko ia! Ho suma mutenab meik tenab mansian, mes tenab naan ka natuin fa Uisneno In romin!”

³⁴ Rarit Nai' Yesus no'en too mfaun he neem nabuan nok In atoup noin' ein. Ma In nanoni' sin am nak, “Atoni' re' anroim he natuin Kau, ro in he naran ma natuin Kau neno-neno! In ro he nnikan nain in roimn ein kuun, ma natuin ahaa neu Uisneno In romin. Maski atoni' he nroor goe msa', mes in natuin piut, on re' atoni' nasaah in hau nehe he nnao neu in bare 'maten.✧

³⁵ Fin atoni' re' anmoin arahaa neu in tuan, of in a'moin ii namneuk on ahaa re' naan! Mes atoni' re' nabarab in tuan he nmaet natuin in njair Au ngguin ma natoon Uisneno In raan a'honis, in of

* **8:31** Anbi uab Yunani, sin nmurai nso'in na'ko: neno ia (= 1), noka' (= 2), nmeu (= 3), esah (=4). Onaim anbi uab Yunani, μετὰ τρεῖς ἡμέρας (*meta treis hēmeras*) “anbi neno no teun ii” in oten anbi uab Amarasi es re' “in nmeun ii”. Mimnau, Usif Yesus anmaet nok neon nima' (msoi' es). Noka' te, es re' neon ne'e (msoi' nua), Usif Yesus anbi noup goe nanan. Nmeu te, es re' neno kre'i (msoi' teun), Usif Yesus anmoni nfain. Onaim natuin hit tsoi' neno, In nmaet fai nua, rarit In nmoni nfain. ✧ **8:34** Nai' Mateos 10:38, Nai' Lukas 9:23, 14:27

anmoin nabar-baar nok Uisneno.☆ 36 Amneen, oo! Karu ho mpaar pah-pinan ia in aafn ii oke', mes Uisneno antorak ko, ho mupein saa'? 37 Maski nak ho mroi meik pah-pinan in aafn ii oke' msa', mu'if naan ka neu he ntuik naan fa ho smaannm aan!

38 Mimnau! Mansian batan muni' ia, anmo'en re'uf huma'-huma'. Sin ka nfairoir fa he natuina' Uisneno. Es naan ate, sekau re' namaeb on he natuin Kau, ai' namaeb on he natuin Au noin' ein, Au of umaeb ok amsa' he 'manaku' in tuan a'bi Uisneno In human ma In matan. Fin Au, Mansian Batuur-Batuur re' ia, of Au 'fain 'uum u'ko neno tunan. Ma Uisneno In ameupt ein na'kon neno tunan of naub naan Kau. Oras hai msaun iim mi'ko sonaf neno tunan meik Ama' In pinan ma krahan, of mansian ii na' nahinin nak, amneon ii Au re' ia sekau.

9

1 Hi kaisa' mnikan Au uabk ein re' ia. Na'ko hi arki ok-oke' re' ia, of anmui' tuaf re' anmonin fe', tar sin niit Uisneno ntook ma naprenat neik kuasat ma'tani'."

Usif Yesus na'bani', ma In tai-pake nariim anbi 'to'ef

(Nai' Mateos 17:1-13, Nai' Lukas 9:28-36)

2 Neno nee nkono te, Nai' Yesus antoit nai' Petrus, nai' Yakobus, ma nai' Yohanis, he nnaon nsaen bu'-bua' on 'to'e mnanu' es, re' ka nmui' fa tuaf. Oras sin antean in tunan, sin nkius niit Nai' Yesus na'bani'. 3 Ma In tai-pake naan anjair

☆ 8:35 Nai' Mateos 10:39, Nai' Lukas 17:33, Nai' Yohanis 12:25

muti' ma nariim. Ka nmui' fa bare' anbi pah-pinan re' ia, muitn ii namnees nok In tai-pake naan. ⁴ Nok askeken, sin niit Nai' Yesus na'uab nok ka'o Elia ma ka'o Musa.

⁵⁻⁶ Sin teun sin namtaun nmaten. Nai' Petrus antaka'nana', tar in na'uab tafi'-tafi'. Rarit in na'uab neu Nai' Yesus am nak, “Aam! Hit tbi ia te, na' reko nneis. Reko te, hit tmoe' ropo teun. Es neu Ko, tua. Es neu ka'o Musa, ma es atfee je neu ka'o Elia.”

⁷ Rarit anmui' nope re' ansaun neem ma n'aum naan sin. Onaim sin anneen hanaf es anpoi neem na'ko nope naan am nak, “Amneen nai, joo! Nai' Yesus re' ia, Au Aan neka'. Hi mneen ma mituin Ee rek-reko!”[☆]

⁸ Oras nai' Petrus sin nneen niit hanaf naan, sin ankisun nfuun am nateef, mes nok askeken sin ka niit anteni' fa tua nua' ein naan. Suma Nai' Yesus anmees.

⁹ Rarit Nai' Yesus nok In atoup noin' ein ansanun nfanin na'kon 'to'ef naan. Ma Nai' Yesus antaar sin am nak, “Saa' re' hi miit amrair je fe'e na, hi kaisa' mitoon meu sekau-sekau. Au re' ia, Mansian Batur-Batur, Au ro he 'maet fe'. Karu Au 'moni 'fain, na' hi mitoon rasi naan meu too mfaun ein.”

¹⁰ Sin nnaa' naheran Nai' Yesus In rais manba'an naan, ma sin ka natoon ee fa neu tuaf es amsa'. Mes sin teun sin anmaktaan ein es nok es am nak, “In sairt ii, on mee, es na' In nak, In he nmoni nfain na'ko In a'maten re' naan? On mee?”

[☆] **9:7** 2 Nai' Petrus 1:17-18, Nai' Mateos 3:17, Nai' Markus 1:11, Nai' Lukas 3:22

11 Ma sin nataan Ee mnak, “Tunggur agaam ein nak, ka'o Elia ro he neem nahuun fe', rarit na' Kristus neem. Mes anbi Ho teenb ii te, on mee?”✧

12 Nai' Yesus nataah am nak, “Namneo on naan. Ka'o Elia ro he neem nahuun fe', he nfei ranan neu Kristus, Tuaf re' Uisneno anruur nain Je na'ko un-unu'. Mes on mee? Hi ka mihiin fa saa' re' sin ntui nain je et Uisneno In Suur Akninu' anmatoom nok Mansian Batu-Batu? Fin sin ntui nrair Je mnak, karu In neem antea te, atoni' of anha'mui' Je ma sin of anroor niis Ne.

13 Ma hi ro he mtakan hi ruikm ein rek-reko, joo! Ka'o Elia neem anrair jen. Ma atoni' nha'mui' je, natuin sin roimk ein. Rasi naan namnees nok saa' re' unu' te, sin na'i antui nain je.”

*Usif Yesus nareko' ri'aan es, re' anniut sae
(Nai' Mateos 17:14-21, Nai' Lukas 9:37-43a)*

14 Oras Nai' Yesus nok In atoup noni' tua teun ein natefan nfanin nok atoup noni' bian, sin niit too mfaun ein nabuan. Too mfaun ein naan neman he niit atoup noni' bian sin anmatoen nok tunggur agaam ein. 15 Oras too mfaun ein niit Nai' Yesus on nai te, sin naskeken, fin sin teenb ein nak of oni' In nabaar fe' et a'toe'f ee in tunan. Ma sin naen anseun Goe.

16 Rarit Nai' Yesus nataan sin am nak, “Hi mmatoen rais saa' mok sin?”

17 Anmui' atoin es neem na'uab am nak, “Aam, karu reko te, amneen maan kau, tua! Au 'eik au aan mone he Ho mureko' maan ee. In nmuu ma ka bisa na'uaba' fa, fin niut reu'f es ansaen ee.

18 Karu niut re'uf naan ansaen ee, in nbeosn ee neu afu. Rarit ri'ana' naan in haepn ee na'furi',

✧ 9:11 Nai' Meliaki 4:5, Nai' Mateos 11:14

ma in neuk in niisn ein. Rarit in aon aan anruur goah on re' hau noon es. Au 'toit 'iit Ho atoup noin' ein, he sin nriu' niut re'uf naan. Mes sin ka nabei' je fa, tua.”

¹⁹ Anneen on naan ate, Nai' Yesus naskara' sin am nak, “Hoe! Ro hi bainesi' ki! Au unoni' ki fani-fani, mes hi ka mheek-heek maan fa. Ma hi ka mpirsai Kau fa batuur-batuur! Au he 'sabaar 'eu ki 'tea reka'! Meik Kau ri'ana' naan neem neu ia!” ²⁰ Rarit sin natnaat neik ri'ana' naan neem neu Nai' Yesus. Oras niut re'uf naan nkius niit Nai' Yesus on naan ate, in nbonan ri'ana' naan ma nriut ee nbi afu, ma in haep bua-neorn ee nsae.

²¹ Rarit Nai' Yesus nataan ri'ana' naan in aamf ee mnak, “Ho aanh ii in meens ii na'ko rek-reek ii?”

In aamf ee nataah am nak, “Na'ko in aan'-ana' fe', tua. ²² Niut re'uf naan he na'maet au aanh ii 'roo-'roo goen. In nbeson au aanh ii fani-fani nbi ai, ma nareem ee nbi oe. Onaim amturun maan kai, tua! Karu reko te, amneek kai, he mureko' maan au anah re' ia.”

²³ Nai' Yesus nataah am nak, “Nansaa' am es ho mak 'karu reko te'? Namneo Au bisa 'moe' are' saa'-saa', asar atoni' ro he npirsai fe'!”

²⁴ Rarit atoni mnasi naan nataah ma nkae nok am nak, “Aam! Namneo, au 'pirsai 'rair. Mes amturun kau he au 'neek a'tebes re' ia, ma'tani' ntein!”

²⁵ Oras naan, Nai' Yesus nkius too mfaun ein nmurain neem nauban sin. Onaim In naprenat niut re'uf naan am nak, “Hoi! Niut aburarut! Ho mpoi nai mu'ko ri'ana' re' ia, he in bisa nneen, ma in bisa na'uaba'. Ho kais amtaam amfain uum!”

26 Anneen Nai' Yesus na'uab on naan ate, niut re'uf naan anhunun naher-heer. In nmoe' ri'ana' naan antaikoib ma npaiteetk on, rarit na' anpoi nasaitn ee. Ma ri'ana' naan antuamauf on re' anmate nrair. Tar too mfaun ein re' anbin naan na'uab ein am nak, "Ooo! In nmate nrair!"

27 Mes Nai' Yesus annaa' ri'ana' naan in a'niman, ma nfiit nafeen ee. Onaim ri'ana' naan anfeen nain oras naan.

28 Rarit Nai' Yesus nok In atoup noin' ein nnao nasaitan bare naan, ma ntaman neun uim jes. Anbi naan sin nataan Nai' Yesus am nak, "Aam! Nansaa' am es fe'e na hai ka bisa mriu' maan fa niut re'uf naan?"

29 Ma Nai' Yesus na'uab neu sin am nak, "Amneen mirek-reko! Niut reu'f ein ro amaufiunt ein. Es naan ate, karu hi ka m'onen he mtoit fa Uisneno, hi ka mibei' fa he mriu' niut re'uf on re' naan."

Usif Yesus natoon anteni' In a'maten

(Nai' Mateos 17:22-23, Nai' Lukas 9:43b-45)

30 Rarit Nai' Yesus nok In atoup noin' ein nnaon nasaitan bare naan, ma antaman neu propinsi Galilea. Oras naan, Nai' Yesus ka nroim fa he atoni' nahiin nak In et bare naan. ³¹ Mes In arahaa he nanoni' In atoup noin' ein. In na'uab neu sin am nak, "Ka 'roo fa heen, sin of na'sosa' Kau neu atoin sona'. Rarit sin nroor niis Kau, Mansian Batur-Batur re' ia. Namneo Au ro he

'maet, mes anbi nmeu te,* Au ro 'moni 'fain.”

³² Nai' Yesus na'uab on naan, ma In atoup noin' ein naskeken ntaka'naan ein aah. Sin ka nabranin fa he nataan anteni' Nai' Yesus In teenb ii on mee.

Usif Yesus In atoup noin' ein anmatoen nak sekau es re' ko'u nneis

(Nai' Mateos 18:1-5, Nai' Lukas 9:46-48)

³³ Rarit Nai' Yesus sin annaon ntean Kaper-naum. Oras sin antaman anbin umi, In nataan neu In atoup noin' ein am nak, “Fe'e na hi mmatoena' rais saa' anbi ranan?”

³⁴ Mes ka tiit fa tuaf es he nataah, fin anbi raan atnana', sin nmatoen am nak, sekau es re' ko'u nneis na'ko sin.✠

³⁵ Rarit Nai' Yesus antook ma nanoni' sin am nak, “Sekau es re' anroim he njair atoin ko'u, in a'moin ee ro he batuur-batuur on re' atoin neek a'baut, he ntuthae are' too mfaun ein.”✠

³⁶ Rarit Nai' Yesus naskau naan ri'aan es anbi naan, ma nfain neu sin atnaank ein. Onaim In na'uab am nak, ³⁷ “Sekau re' natuina' Kau ma ntuthae tau a'baut ein on re' ri'aan a'baut re' ia, tuaf re' naan on re' antuthae Kau msa'. Ma in

* **9:31** Anbi uab Yunani, sin nmurai nso'in na'ko: neno ia (= 1), noka' (= 2), nmeu (= 3), esah (=4). Onaim anbi uab Yunani, μετὰ τρεῖς ἡμέρας (*meta treis hēmeras*) “anbi neno no teun ii” in oten anbi uab Amaras es re' “in nmeun ii”. Mimnau, Usif Yesus anmaet nok neon nima' (msoi' es). Noka' te, es re' neon ne'e (msoi' nua), Usif Yesus anbi noup goe nanan. Nmeu te, es re' neno krei (msoi' teun), Usif Yesus anmoni nfain. Onaim natuin hit tsoi' neno, In nmaet fai nua, rarit In nmoni nfain. ✠ **9:34** Nai' Lukas 22:24 ✠ **9:35** Nai' Mateos 20:26-27, 23:11, Nai' Markus 10:43-44, Nai' Lukas 22:26

ntuthae Au Ama' re' anreek haefan Kau he 'taam 'uum a'bi pah-pinan ia msa'."✠

Sekau es re' anjair hit tuaf ein?

(Nai' Lukas 9:49-50)

³⁸ Rarit Nai' Yesus In atoup noni' nai' Yohanis, natraak am nak, "Aam! Anbi oors es, hai miit atoin es anpaek Ho kanam ma nriu' niut reu'f ein. Mes hai mtaar ee, natuin hit ka hit ja fa."

³⁹ Mes Nai' Yesus nataah am nak, "Hoe! Hi kaisa' mikain ee. Fin sekau es anpaek Au kanak he nmoe' rais sanmakat, in of ka neu na'uab na're'uf fa Au kanak. ⁴⁰ Karu in ka nrahan kit fa, on naan ate in re' naan hit ja amsa'.✠ ⁴¹ Es naan ate, mimnau mirek-reko! Karu anmui' tuaf re' nahiin nak hi mituina' Kristus, rarit in nturun ki, Uiseno ka neu nnikan fa in haet naan. Maski in suma na'inu' ki neik oe ruman kraas es amsa', Uiseno ka neu nniikn ee fa."✠

Kais amkua'noon mok sanat

(Nai' Mateos 18:6-9, Nai' Lukas 17:1-2)

⁴² Rarit Nai' Yesus na'uab nteni' neu sin am nak, "Karu atoin es anmo'e nsaan neu ri'aan es, tar in ka npirsai nteni' Kau fa, ampaant om, oo! Reko nneis, nait faut kou' goes,† ma nfuut nakfiirt ee neu in neon, ma nporin nataam ee neu tais je tnanan.

⁴³ Karu ho musanab meik ho 'nimam, mketu mporin ho 'nimam naan! Fin reko neis ho mtaam meu sonaf neno tunan meik ho 'nimam

✠ **9:37** Nai' Mateos 10:40, Nai' Lukas 10:16, Nai' Yohanis 13:20

✠ **9:40** Nai' Mateos 12:30, Nai' Lukas 11:23 ✠ **9:41** Nai' Mateos 10:42 † **9:42** Suur Akninu' uab Yunani ntui mnak, 'fatu 'fore' re' sin npaek je he nfoer maak-gandum.

mese', na'ko sin anporin nataam ko neu ai maputu' ma ai marara' abar-barat meik ho 'nimam nua.☆ 44 [Ai marara' naan, namneo-namneo baer nana'renat. In ai ji ka nmaet niit fa. Ma are' kauna' soe' ji nsoe nareu' ka nasnaas fa.]‡ 45 Karu ho musanab meik ho haem, mketu mporin ho haem aan. Fin reko neis ho mtaam meu sonaf neno tunan meik ho haem mese', na'ko sin anporin nataam ko neu ai maputu' ma ai marara' abar-barat meik ho haem nua. 46 [Ai marara' naan, namneo-namneo baer nana'renat. In ai ji ka nmaet niit fa. Ma are' kauna' soe' ji nsoe nareu' ka nasnaas fa.]§ 47 Ma karu ho musanab meik ho matam, mro'i mporin ho matam naan. Fin reko neis ho mtaam meu sonaf neno tunan meik ho matam fua' mese', na'ko sin anporin nataam ko neu ai maputu' ma ai marara' abar-barat meik ho matam fua' nua.☆

48 'Ai marara' naan, namneo-namneo baer nana'renat.

In ai ji ka nmaet niit fa.

Ma are' kauna' soe' ji nsoe nareu' ka nasnaas fa.'☆

49 Au 'fee noni' re' ia, ro ma'fena'. Es naan ate, sekau es re' he natuina' Kau te, ro in he ntahan he nok Kau piut, on re' siis se'ik ro he npaek masik, hena' sisi naan antahan a'roo.

50 Masik naan, ro reko. Hit tpaek je he taminab amnahat. Mes karu masik naan ka miin masik fa heen ate, he tpaek je neu saa' antein? Ro hit tait

☆ 9:43 Nai' Mateos 5:30 † 9:44 Suur Akninu' uab Yunani sin tuis ein re' manasik anneis, ka ntui fa era' 44. § 9:46 Suur Akninu' uab Yunani sin tuis ein re' manasik anneis, ka ntui fa era' 46. ☆ 9:47 Nai' Mateos 5:29 ☆ 9:48 Nai' Yesaya 66:24

itpoirn aah ee. Hi ro he mjair on re' masik amsa', he mmoni mbi manekat mok are' too mfaun ein. [Onaim hi kais ammatoe mtein nai, mak sekau es re' kou' gui, ma sekau es aan ii.][☆]

10

Atoin Farisis sin he namouf Usif Yesus anpaken rais matsaos ma manporin

(Nai' Mateos 19:1-12, Nai' Lukas 16:18)

¹ Rarit Nai' Yesus sin nnaon nfuun am nateef anbin propinsi Yudea, ma nbin bare bian antein et noe Yarden in panin, pasa' neon-saet. Anbi mee-mee, too mfaun ein neman ma naub naan Ee. Ma Nai' Yesus nanoni' sin on re' biasa.

² Atoin Farisis tuaf fauk neman he namouf Goe. Sin natanan am nak, “Natuin hit atoran rais pirsait, atoin amatsaos es bisa nporin in fee, ai' kaah?”

³ Mes Nai' Yesus nataah sin am nak, “Mimnau miit fe'! Atoran anmatoom nok matsaos fee-mone re' ka'o Musa nba'an nain je neu ki naan, nak on mee?”

⁴ Sin natahan am nak, “Ka'o Musa in atoorn ii nak, atoni' bisa nporin in fee, mes ro he ntui surat manporin nahuun ma nnona' surat naan neu in fee.”[☆]

⁵ Mes Nai' Yesus nataah sin am nak, “Amneen Kau fe'! Ka'o Musa antui on naan, natuin hi mi'naak-faut bainesi'! ⁶ Hi kaisa' mnikan reta' un-unu' oras Uisneno anmoe' neno tunan ma pah-pinan! Fin matu'i et Suur Akninu' mnak, 'Uisneno nmoe' mansian ein, atoni' ma bifee.”[☆]

[☆] **9:50** Nai' Mateos 5:13, Nai' Lukas 14:34-35 [☆] **10:4** Surat re' Nareta' Nafani' Raan A'honis 24:1-4, Nai' Mateos 5:31 [☆] **10:6** Reta' Ahun-hunut 1:27, 5:2

⁷ Es naan ate, atoin es ro he nnao nasaitan
in ainaf ma in amaf,

he nmoin nabuan nekaf mese' ma
ansaof mese' nok in fee,

⁸ henati' sin nua sin njarin mese'.'☆

⁹ Karu Uisneno neikn On na'mese' sin, ka bole
fa he mansian ii nbatis sin!"

¹⁰ Rarit Nai' Yesus nok In atoup noin' ein
antaman nmesen nbin uim jes. Anbi naan, sin
nataan Nai' Yesus anmatoom nok In nonin re'
fe'e na.

¹¹ Nai' Yesus nataah sin am nak, "Sekau re'
anporin in fee, ma nsao nteni' bifee 'teta', naan
antaam rais makaket amsa'! ¹² On naan amsa'
bifee! Karu in nporin in mone, rarit in nsao
nteni' atoni' teta', naan antaam rais makaket
amsa'!"☆

*Usif Yesus na'uab ma nfee tetus neu ri'aan ein
(Nai' Mateos 19:13-15, Nai' Lukas 18:15-17)*

¹³ Anbi oors es, sin neik sin aanh ein neman
neu Nai' Yesus, ma ntotin he In na'uab anfeen sin
tetus. Mes Nai' Yesus In atoup noin' ein nakaina'
sin.

¹⁴ Oras Nai' Yesus niit rasi naan ate, In nato'on
In atoup noin' ein. In na'uab am nak, "Mifetin
ri'aan' ein naan he neman ntean Kau! Kaisa'
mikaina' sin! Natuin atoni' re' nahuumb on,
on re' sin re' naan, es re' anjarin Uisneno Iin
na. ¹⁵ Mimnau mirek-reko'! Sekau re' anroim
he neem anhaumaak Uisneno, sin ro he namnau
niis Ne, on re' ri'aan ein namnau sin ainaf-amaf.
Karu ka on naan fa te, ka nabei' fa he tteek sin

☆ **10:8** Reta' Ahun-hunut 2:24 ☆ **10:12** Nai' Mateos 5:32, 1
Korintus 7:10-11

tak Uisneno Iin na.”☆ 16 Rarit Nai' Yesus anhood naan ri'aan ein naan, ma ntao In a'niman neu sin mese'-mese' he na'uab anfeen sin tetus.

Atoin amu'it naim ranan he nmoin nabar-baar nok Uisneno

(Nai' Mateos 19:16-30, Nai' Lukas 18:18-30)

17 Oras Nai' Yesus sin he nnaon nkonon, anmui' atoin amui't es naen neem he nateef nok Ne. In na'ruri' anbi Nai' Yesus In matan, ma nataan Ee mnak, “Aam tungguru re' au 'hormaat 'ain je! Au he utaan akre'o. On nai, Aam. Of au he 'moe' on mee, henati' au bisa 'taam 'eu sonaf neno tunan, he 'moin ubar-baar 'ok Uisneno?”

18 Nai' Yesus nataah am nak, “Nansaa' am es ho mteek Kau mmak, 're' au 'hormaat 'ain je'? Ka tiit fa es re' he thormaat tain je, mes Uisneno nmees Kuun. 19 Ho muhiin murair prenat ahunut na'ko Uisneno re' nak,

‘Kais amroor atoni';

kais ammakaek;

kais mubaak;

kais amsaksii mipoi;

kais amputa-kriu atoni' in bare';

ma mhormaat meu ho aina' ma ho ama'.”☆

20 Atoni' naan nataah am nak, “Namneo, Aam tungguru! Au unaoba' are' kanan atoorn ein naan 'murai u'ko oras au fe' munif kau, tua.”

21 Nai' Yesus na'uab rais manekat neu atoni' naan am nak, “Namneo! Mes anmui' rais jes anteni'. Ho mfain nai ma mu'sosa' main are' kanan ho 'mui'm ein. Rarit meik roit ein re' ho mupein sin naan ma mnao he mbait main sin

☆ 10:15 Nai' Mateos 18:3 ☆ 10:19 Anpoin na'kon Pah Masir 20:12-16, Surat re' Nareta' Nafani' Raan A'honis 5:16-20

meu ama'mui't ein. Rarit ho mtebi mfain uum nai he mutuina' Kau. Uisneno of anseun baran ko npake 'mu'if neno tunan.”

²² Oras in neen Nai' Yesus In uaban naan ate, in neekn ii krati'-krati'. Ma in nfain nok neek susat ma'tani', natuin atoni' re' naan, amu'it batuur-batuur.

²³ Ma Nai' Yesus ankisu nfuun am nateef ma na'uab neu In atoup noin' ein am nak, “Amneen, oo! Amui't ii na' neu goah he ntaam neu sonaf neno tunan!”

²⁴ Anneen rasi naan ate, In atoup noin' ein anmukekun. Ma Nai' Yesus na'uab antein am nak, “Amneen mirek-reko'! He tjair Uisneno Iin na, suust ii ka aan'-ana' fa! Kaisa' mitenab am mak ma'kaf-kafa'. ²⁵ Atoin amui't es he ntaam neu sonaf neno tunan ma njair Uisneno In aanh ate, in suust ii huma' mese' on re' bikaes unta he ntaam neu in o'of, annao ntaam anpeo' aent es in konan.”

²⁶ Nai' Yesus In uaban naan anmoe' sin anjarin ntaka'naan ein antein. Ma sin nmaktaan ein am nak, “Karu namneo on naan ate, sekau es re' bisa napeni 'honis nabar-baar?”

²⁷ Nai' Yesus ankius sin mese'-mese', rarit na'uab am nak, “Natuin mahinif ma manoef mansian ii te, of ka njair fa saa' es. Mes mimnau, natuin mahinif ma manoef Uisneno, ka tiit fa saa' es, re' of ka njair fa.”

²⁸ Rarit nai' Petrus anmurai na'uab am nak, “Aam! Hai mnikan main are' kanan saa'-saa' he mituina' Ko. Onaim hai of mipein saa', tua?”

²⁹⁻³⁰ Nai' Yesus nataah am nak, “Au he utoon ki m'ak on nai: sekau es re' natuina' Kau, ma annao na'roo na'ko in ainaf-amaf, in orif-tataf,

in aanh ein, in rene, in mepu, nok are' in uim je nanan, he nnao natoon Uisneno In Rais Reko nbi mee-mee, in of antoup nafani' no nautn es. Are' saa'-saa' re' in nasaitan sin naan, of napein nafani' sin anneisi ntein na'ko naan. In of napein ha'mu'it amsa', natuin in natuina' Kau. Mes oras pah-piin ii namre'u te, in of anmoin nabarbaar nok Uisneno. Rasi re' naan, es re' anjair seun baran neu ne! ³¹ Mimnau, joo! Natuin Uisneno In teenb ete, sekau na'naeba' in tuan ii te, of na'bauna'. Ma sekau na'paran in tuan ii te, natuin Uisneno In tenab, of na'raatn ee.”✧

Ia haan tonas nfain era' teun anmatoom nok Usif Yesus In a'maten

(Nai' Mateos 20:17-19, Nai' Lukas 18:31-34)

³² Oras naan, Nai' Yesus sin nnaon neun Yerusalem. Anbi pukan re' naan, Nai' Yesus es re' ahunut. Ma In atoup noin' ein nok tuaf bian antein anbin In kotin. Sin namnau In uaban neon goes ii re' nak, biak ein of na'maet Je nbi Yerusalem. Onaim sin nmukekun ma namtaun amsa'. Anneen on naan ate, Nai' Yesus no'en naan In atoup noin' ein anmesen, ma na'uab antein saa' re' biak ein of anmoe' Je nbi Yerusalem. ³³ In na'uab am nak, “Hi mneen, oo! Oras ia, hit tnao teu Yerusalem. Au re' ia, Mansian Batuur-Batuur. Mes anbi Yerusalem sin of na'sosa' Kau neu a'naak rais pirsait Yahudi sin a'naakt ein ma tunggur agaam ein. Rarit sin of anhukun niis Kau. Ma sin nnona' Kau neu tua sona' re' ka nahiin fa Uisneno. ³⁴ Rarit sin na'akan Kau re'uf-re'uf. Sin naroon Kau. Sin

✧ **10:31** Nai' Mateos 20:16, Nai' Lukas 13:30

nbeos Au aok ii tar papa' oke'. Rarit sin nroor niis Kau. Namneo, Au 'maet. Ma nmeu te, Au 'moni 'fain.”*

Nai' Yakobus ma nai' Yohanis antotin he njarin kaes ko'u

(Nai' Mateos 20:20-28)

³⁵ Rarit Nai' Sebedius in aanh ein, esan re' nai' Yakobus ma nai' Yohanis, sin neman neu Nai' Yesus. Sin ntotin am nak, “Aam tungguru! Hai he mi'uab maan akre'o, tua!”

³⁶ Nai' Yesus nataan sin am nak, “Hi he mi'uab saa'?”

³⁷ Sin natahan am nak, “On nai, Aam! Nati' karu Ho mtook ma mnaa' aprenat ate, hai mtoit he Ho mutoko' kai, tuaf es anbi Ho 'nimam a'rii, ma tuaf es anteni' anbi Ho 'nimam a'ne'u, he hai mnaa' mok aprenat amsa'.”

³⁸ Nai' Yesus nataah sin am nak, “Hi nua ki ka mihiin main fa saa' re' hi mtoti. Au re' ia, of upein susat ma nana'renat amfaun. Onaim on mee? Anbi hi teenb ii te, hi mak, hi mibei' he mnaben susat ma nana'renat tar ammaet mok Kau, oo?”✠

³⁹ Sin natahan am nak, “Hai mibei', tua!”

Nai' Yesus na'uab antein sin am nak, “Namneo. Hi of amnaben susat ma nana'renat amsa' on re'

* **10:34** Anbi uab Yunani, sin nmurai nso'in na'ko: neno ia (= 1), noka' (= 2), nmeu (= 3), esah (=4). Onaim anbi uab Yunani, μετὰ τρεῖς ἡμέρας (meta treis hēmeras) “anbi neno no teun ii” in oten anbi uab Amarasi es re' “in nmeun ii”. Mimnau, Usif Yesus anmaet nok neon nima' (msoi' es). Noka' te, es re' neon ne'e (msoi' nua), Usif Yesus anbi noup goe nanan. Nmeu te, es re' neno krei (msoi' teun), Usif Yesus anmoni nfain. Onaim natuin hit tsoi' neno, In nmaet fai nua, rarit In nmoni nfain. ✠ **10:38** Nai' Lukas 12:50

Au. ⁴⁰ Mes sekau es re' antoko nbi Au 'nimak a'rii ai' a'ne'u, Au ka 'seor Ok fa 'bi rasi naan. Natuin rasi naan, Uisneno es re' nafeek. Ma In nafeek anrair sekau-sekau es re' he ntoko nbin bare naan.”

⁴¹ Oras atoup noni' bian sin annenan nai' Yakobus ma nai' Yohanis sin haan totis on naan ate, sin nato'on ma'tani'. ⁴² Rarit Nai' Yesus no'en sin ok-oke' ma na'uab am nak, “On nai! Hi mihini mrair jen, ai' kaah? Kaes ko'u re' anna'an aprenat, sin esan re' nati' te anha'mui' too gui. Tar antea too gui ka nakbeor ein reko fa. Ma 'nakaf-a'nakaf anbi pah-pah re' ka nahiin fa Uisneno, sin nanaoba' atoran ma prenatal huma'-huma', tar sin too gui ka bisa nait fa sin a'naak ein. ⁴³ Mes ka nabei' fa he hi mmoe' on re' naan! Sekau na'ko ki re' anroim he njair kaes ko'u, in ro he njair on re' a'baut he ntuthae in aok-bian ein.✧ ⁴⁴ Ma sekau es re' anroim he njair a'nakat, in ro he nmoe' in tuan aan on re' ate ma nmeup neno-neno on re' naan.✧ ⁴⁵ Fin Au, Mansian Bataur-Bataur, es re' ia. Au ka 'uum fa he atoni' ntuthae Kau, mes Au 'uum he 'tuthae too mfaun ein. Au 'uum he 'nona' Au 'moink ii 'teme-teme, he 'soi 'aan too mfaun ein na'kon sin sanat ma penu sin.”

Usif Yesus nareko' atoin aforot

(Nai' Mateos 20:29-34, Nai' Lukas 18:35-43)

⁴⁶ Nai' Yesus nok In atoup noin' ein ma too mfaun ein neem antean kota Yeriko. Oras sin he nnaon nkonon, sin niit atoin aforot tuaf es antook ma ntoit piut-piut anbi raan ee ninin. In

✧ **10:43** Nai' Lukas 22:25-26 ✧ **10:44** Nai' Mateos 23:11, Nai' Markus 9:35, Nai' Lukas 22:26

kaan ee, nai' Bartimeus, nai' Timeus in anah.
⁴⁷ Oras in nneen nak, akonot naan Nai' Yesus na'ko Nasaret te, in nhunun naher-heer am nak, “Yesus! Ho re' naan, sufa'-ka'uf na'ko nai' Daut! Hai mpao Ko 'roo'-roo goen, tua! Amturun maan kau, tua!”

⁴⁸ Anneen in hanan naan ate, too mfaun ein nakain ee mnak, “Hoe! Mumninu!”

Mes in nhunun naheer antein am nak, “Yesus! Nai' Daut in sufan! Mumnau maan kau, tua!”

⁴⁹ Ma Nai' Yesus anhake mnak, “Hi meik je neem!”

Rarit sin nnaon neun ee mnak, “Noo goah nai! Aam tungguru no'en ko. Uum nai!”

⁵⁰ Anneen on naan ate, nai' Bartimeus anporin nain in tai nusat, rarit anfeen ma nnao rab-raab he nateef nok Nai' Yesus.

⁵¹ Rarit Nai' Yesus nataan ee mnak, “Ho mroim saa' he Au 'moe' je 'eu ko?”

Atoin aforot naan nataah am nak, “Koi, Aam! Au 'toits ii es re' karu reko te, au 'iit, tua.”

⁵² Nai' Yesus na'uab antein am nak, “Natuin ho mpirsai mrair mak, Au bisa ureko' ko, es naan ate oras ia ho mureok nai! Amkoen om amfain nai!”

Rarit nai' Bartimeos in matan afoort ein naan nareok nanin. Onaim in nok annao naat Nai' Yesus.

11

Usif Yesus sin antaman neun Yerusalem, ma too mfaun ein anboi's Ee on re' kaes ko'u

(Nai' Mateos 21:1-11, Nai' Lukas 19:28-40, Nai' Yohanis 12:12-19)

¹ Oras sin nhaumaak kota Yerusalem, sin ntean kuan Betfage ma Betania, et a'to'ef Saitun in abnapan bian.* Anbi bare naan, Nai' Yesus sin nasnasan akre'o. Rarit In nreun In atoup noin' ein tuaf nua he nnao nahunun. ² In nbasan sin am nak, “Hi nua ki mnao mihuun meu kuan re' nee. Oras hi mtaam, hi of miit bikaes keledai tipu' es, re' ka masaena' fa fe', mafutu' et bare naan. Hi mnao mseif in tani ma mheer meik je neem. ³ Karu atoni' nataan ki mnak, ‘Nansaa' am es hi mheer meik bikaes keledai naan?’ On naan ate, hi mitaah am mak, ‘Hai Usi' he npaek je. Ma karu In npake nrair je te, na' hai of meik mifain' ee neem.’”

⁴ Rarit tua nua' ein naan sin nnaon, ma sin niit bikaes keledai tipu' naan mafutu' anbi uim jes in enon, et raan ee ninin. Sin nseif je, he nheer neik je nnao. ⁵ Mes atoni' fauk re' anhaken anbin naan nataan sin am nak, “Hoe! Ba'e! Nansaa' am es hi mseif atoni' in bikase'?”

⁶ Sin natahan am nak, “Hai Usi' he npaek je. Karu npake nrair je te, hai of meik mifain' ee neem, tua.” Onaim tuaf ein re' naan, anfeen sin mainuan he nheer neik bikase' naan. ⁷ Sin nheer neik je nnaon ntean Nai' Yesus. Rarit sin na'peni' bikase' naan npaken tai-muti'. Rarit Nai' Yesus ansae.

⁸ Oras sin he noi ntaman neu kota, too mfaun ein nait sin tai-faof ein ma sin pou'k ein, rarit na'been sin anbin ranan. Anmui' tuaf bian

* **11:1** 'To'ef naan sin nteek ee te nak “To'ef Saitun’, natuin anmui' poo' saitun amfaun anbin naan. Anbi bare naan, sin naes naan mina' na'kon hau saitun in fuan ein. 'To'ef Saitun in a'roon ii of oni' kiur goes na'ko kota Yerusalem.

an'oten on re' pet-no'o[†] nbi raan ee ninin, ma na'been sin anbi raan ee tnanan. Anpaek mo'et naan, sin he natonan ma nakriir ein nak sin nseun Nai' Yesus nok hormaat, nahuum on re' sin nseun kaes ko'u. ⁹ Anmui' tuaf bian re' annao nahunun anbin Nai' Yesus In matan, ma bian namunin. Sin nmurai nsakanan am nak,
 “*Hosana!* Hai mpures ma mbo'is Uisneno![‡]

Uisneno nfee tetus-athoen neu amnemat re' neem ma neik Uisneno In kanan,
 natuin Uisneno es re' anrenu nrair Je![☆]

¹⁰ *Hosana!* Hai mpures ma mbo'is Uisneno!
 Natuin Uisneno he nahake' nafani' usif nai' Daut in aprenat!

Hosana! Hai mpures ma mbo'is Uisneno!
 Natuin Uisneno naprenat nan-nain et neno 'raat re'uf!”

¹¹ Oras sin ntean kota naan in nanan, Nai' Yesus sin nnaon ntaman anbin Uisneno In Uim Onen Uuf ee in a'fe'on. Rarit Nai' Yesus ankius natef-tefan bare naan. Mes, natuin oors ii ka nanokab fa, es naan ate sin ntebi nfanin neun kuan Betania.

Usif Yesus naprenat hau roet uu' goes he kais nafua nteni'

(Nai' Mateos 21:18-19)

¹² Kiuk ana' te, sin npoin na'kon Betania he ntaam anfanin neun kota Yerusalem. Anbin raan

[†] **11:8** Nai' Markus in tuis ahun-hunut nak 'taef ein'. Mes hit tahini trair ta'ko nai' Yohanis 12:13 re' nteek ee te nak 'pet-no'o'.

[‡] **11:9** Sin uab Aram nak '*Hosana*'. In a'moufufun ahun-hunut, nak 'in nsoi nafetin'. Mes anbi oras Nai' Yesus anmoin naan, sin biasa npaek uab tuka' naan he nbo'is Uisneno. [☆] **11:9** Siit Pures-Bo'is sin 118:26

ee tnanan, Nai' Yesus annaben ate In namnaah.
¹³ In niit hau roet uu' goes et raan ee ninin. Biasa sin naah in fuan. § Onaim Nai' Yesus anhaumaak hau roet naan he nkius niit, kar-karu in nafua, ai' kaah. Mes oras In ntea hau roet naan in uun ii te, In ka niit fa saa'-saa', natuin hau naan in oors ee ka ntea fa fe' he nafua. In fe' he nanoo.
¹⁴ Es naan ate, Nai' Yesus na'uab neu hau roet naan am nak, "Natuin ho ka mufua fa meu Kau, es naan ate anmurai na'ko oras ia, ho ka mufua mtein fa. Ma of ka tiit fa tuaf es he naah antein ho fuam."

In atoup noin' ein annenan In uaban naan ma'fena' msa'.

Usif Yesus antaam anbi Uisneno in Uim Onen Uuf, ma nait inporin bare' sosa' anbi naan (Nai' Mateos 21:12-17, Nai' Lukas 19:45-48, Nai' Yohanis 2:13-22)

¹⁵ Rarit sin nnaon nkonon tar antean Yerusalem, ma Nai' Yesus antaam antein anbi Uisneno in Uim Onen Uuf. Anbi Uim Onen naan in a'fe'on, too mfaun ein anmo'en a'masa' ma na'soos ein kor-kefi, re' biasa sin npaek sin he nfeen fua'-turu'. Oras Nai' Yesus niit sin on naan ate, In nnao ma nriu' napoitan sin. In nbeso nsisa'en mei ngguin re' sin npaek sin he ntuukr ein roit, ma nbeso nsiksakan hau 'been ein re'

§ **11:13** Hau roet naan, anteek ee neik uab Yunani nak, *sukei*. Suur Akninu' natuin uab rabbit Indonesia nak 'pohon ara'. Mes Suur Akninu' uab Yunani nruru n'ain hau roet uu' goes re' in fuan ee nati' te sin naahn ee. Anbi pah Indonesia pasa' neon-saet, atoni' ka bisa naah fa 'pohon ara' in fuan. In noon ee msa' huma' teta'. Onaim 'pohon ara' anbi Suur Akninu' ka huma' mese' fa nok 'pohon ara' anbi Pah Meto'.

sin npaek sin he na'soos ein koron naan. ¹⁶ In ntaar too mfaun ein he sin kais neik ein bare' ma nnaon refin ntenin npe'on Uim Onen naan in a'fe'on. ¹⁷ Rarit In nanoni' sin am nak, “Hi mihini mrair saa'-saa' re' Uisneno In mafefa kninu' ntui nain je mnak, ‘Au ufena' Au Uim ji, he tuaf-tuaf na'ko are' pah ma uuf neman he n'oen ein nbin bare naan.’ Mes hi mmoe' Umi naan anjair baer buat neu abaakt ein!”[✧]

¹⁸ Oras a'naak rais pirsait Yahudi sin a'naakt ein ma tunggur agaam ein annenan nak Nai' Yesus anmoe' rasi naan ate, sin nato'on ma nek-neuk niisk ein. Rarit sin namin ranan he nroor niis Ne. Mes sin namtausn Ee msa', natuin too mfaun ein nroim niis In nonin.

¹⁹ Ma oras maans ii nmaeb on naan ate, Nai' Yesus sin anpoin na'kon kota Yerusalem, ma ntebin nfanin he ntupan nbin kuan Betania.

Karu hit tpirsai batuur-batuur teu Uisneno, In of anfee saa'-saa' re' hit ttoit je

(Nai' Mateos 21:20-22)

²⁰⁻²¹ Kik-kiku te, sin nnaon nfanin neun Yerusalem. Anbi raan atnana', sin nnaon npe'on hau roet re' afi naa Nai' Yesus na'uab neu ne. In atoup noin' ein ansanmakan, natuin hau roet naan anmate nrair tar in a'baa'n ee msa' anmeto nmaet. Rarit nai' Petrus namnau niit Nai' Yesus In uaban afi naa. Rarit in na'uab am nak, “Aam! Amkius miit! Hau roet re' afi naa Ama' mtaar ee ji, nmate nrair!”

²² Onaim Nai' Yesus nataah am nak, “Namneo! Ro hi he mpirsai Uisneno on re' naan. ²³ Karu hi mpirsai batuur-batuur, hi of amreun 'toe'f es he

✧ 11:17 Nai' Yesaya 56:7, Nai' Yeremias 7:11

nanani' bare neu tasi. Rarit Uisneno of nanani' 'to'ef naan, asar hi kaisa' mpirsai mi'ba'-ba'e! Hi ro he mpirsai batuur-batuur meu Uisneno. ☆

²⁴ Kais amnikan! Asar hi mpirsai batuur-batuur mak Uisneno bisa nfee saa'-saa' re' hi mtoit je, In of anfee ki on naan. ²⁵ Mes karu m'onen, ma mmui' neek ma'fena' mok es fe'e te, hi ro he mnao he mmarama' mok ne. Nok ranan naan ate, na' hi Ama' abit sonaf neno tunan he nsaok nain hi saant ein. ²⁶ [Mes karu na'ko ki, anmui' neek menas, ma ka mroim fa he msaok hi aombian in sanat, ro tebes hi Ama' abit sonaf neno tunan ka nsaok fa hi saant ein amsa'.]”* ☆

Sin nmaktaan ein anmatoom nok Usif Yesus in hak

(Nai' Mateos 21:23-27, Nai' Lukas 20:1-8)

²⁷ Rarit sin nnaon nkonon. Oras sin ntean Yerusalem, sin ntaman ntenin anbin Uisneno In Uim Onen Uuf. Oras sin ntaman ntean in a'fe'on, a'naak rais pirsait Yahudi sin a'naakt ein, tunggur agaam ein, ma amnais harat Yahudi sin neman ²⁸ ma nataan Nai' Yesus am nak, “Afi naa sekau es re' anreun ko he uum meik taisibu mbi bare ia? Sekau es re' anfee ko hak!”

²⁹ Nai' Yesus nahiin nak sin namin ranan he namouf Goe. Rarit In nataah sin am nak, “Au he utaan ki msa'. Hi mitaah Kau fe', hena' Au 'utaah ki. ³⁰ Au he utaan ki on nai: hi arki mihiin nai' Yohanis Asranit re' naan, aa oo? Sekau es re' anreek ee he nasrain? Uisneno oo, ai' mansian?”

³¹ Onaim sin nateenb ein neu-mneman, ma na'uab ein am nak, “Amoo! Hit tarair beti'! Karu

☆ **11:23** Nai' Mateos 17:20, 1 Korintus 13:2 * **11:26** Tuis uab Yunani re' manasik anneis, ka ntui nataam fa era' 26. ☆ **11:26** Nai' Mateos 6:14-15

hit tataah am tak, 'Uisneno es re' anreun goe te,' In of nataah kit am nak, 'Karu on naan ate, neu saa' am es hi ka mpirsai fa nai' Yohanis!?' ³² Mes karu hit tataah am tak, 'Mansian ee es re' anreun goe.' Of are' too mfaun ein antaisibun, natuin sin npirsain am nak, nai' Yohanis re' naan Uisneno In mafefa kninu'."

³³ Onaim sin nataan am nak, "Ma neu! Hai ka mihiin fa, tua."

Rarit Nai' Yesus nataah neu sin am nak, "Naa! Karu on naan ate, Au ka utoon ki fa msa', sekau es re' anreun Kau."

12

Usif Yesus nareta' anmatoom nok amep poo' anggur

(Nai' Mateos 21:33-46, Nai' Lukas 20:9-19)

¹ Rarit Nai' Yesus na'uab anteni' nok a'naak rais pirsait Yahudi sin a'naakt ein, tunggur agaam ein, ma atoni mnais harat Yahudi sin. In nareta' am nak, "Anmui' atoin es ankaun nais fe'u he nroe anggur anbi naan. Rarit in nbaik po'on naan anfuun am nateef. Ma in nmoe' bak he ntoro' fua anggur in oen. In nmoe' tobe msa'. Rarit in na'seba' po'on naan neu tuaf bian, he sin nmeup po'on naan, he napein in aafn ee te, anbatin. Rarit in nnao neu pah a'teta'.[☆]

² Antea oras he nseib anggur in fuan, auf tuaf naan anreun in ameput tuaf es, he nnao neu amep po'on naan he nait in sapaan. ³ Mes oras in ntea te, amep poo'n ein naan anheek ma nbeos goe. Rarit sin nreun goe he nfain ruum-ruum.

[☆] **12:1** Nai' Yesaya 5:1-2

⁴ Rarit auf tuaf naan anrenu nteni' in ameupt es. Mes ameup poo'n ein naan na'tutu' in a'naak ne tar papa'-papa'. Rarit sin namae je, ma nriu' na'aenb ee. ⁵ Rarit auf tuaf naan anrenu nteni' in ameput tuaf es a'teta'. Mes sin anroor niis ne. Maski sin nmoe' on mee-on mee msa', mes auf tuaf naan anreun in ameupt ein piut. Mes ameup poo'n ein naan anbeos bian, ma nroor niis bian. ⁶ Namuni te, auf tuaf ee anmu'i haa tuaf mese'. Tua mese' naan, es re' auf tuaf ee in aan moen mese' re' in neek niis ne. Natuin ka tiit attein fa ranan bian, es na' in nreun in aan mone naan. In natenab am nak, 'Karu au 'reek au aan moen ji neikn on, sin of antoup goe nok rek-reko, ma sin of natniin ee msa'.'

⁷ Onaim in anreek haefan in aan mone naan he nnao. Mes oras ameup poo'n ein naan niit ri'ana' naan neem ate, sin na'uab ein am nak, 'Hoe! Hi mkius miit fe'! A'naef ee anreek haefan in aan hoin ee neikn on neem! Karu 'naef ee nmate te, in re' ia of es re' antoup are' baer pusaak ein. Onaim iim he troor tiis ne, he hit tpaar tain are' kanan in a'mui'n ein!' ⁸ Rarit sin arsin anheek je, ma anroor niis ne. Ma sin nporin in aon amates naan anbi poo'n ee in kotin. Reta' naan antuu' ma namsoup on re' naan, tua."

⁹ Rarit Nai' Yesus nataan are' kaes ko'un naan am nak, "Natuin hi teenb ein ate, of auf tuaf naan anmoe' saa' neu ameup poo'n ein naan? Natuin Au teenb ii te, in of neem ma nroor niis are' ameupt ein naan ok-oke'. Rarit in na'seba' poo' anggur naan neu atoin sona'.

¹⁰ Hit arkit atrees tiit atbi Uisneno in Suur Akninu' mnak,

'Anmui' faut goes re' nahunu te tuukn ein nait inporin.

Mes oras ia, fatu naan anjair fatu 'sukif neu nii ainaf.

¹¹ Uisneno es re' anpiir nain Kuun ee, ma nateek fatu naan.

Onaim hit tiit atrair in masan arekon!"*[☆]

¹² Kaes ko'un naan nahinin nak, Nai' Yesus ansair sin neik reta' re' naan. Sin huma' mese' nok atoin ameup poo' anggur sin. Es naan ate, sin nmurai namin ranan he nheek Je. Mes sin namtausan too mfaun ein re' anromin he natniin Nai' Yesus In nonin. Onaim sin nnaon nasaitn aah Ee.

Atoni' namin ranan he nakreo Usif Yesus neik rasi baen beo

(Nai' Mateos 22:15-22, Nai' Lukas 20:20-26)

¹³ Rarit atoin Yahudis sin a'naakt ein anreun tuaf fauk na'kon partei pirsait Farisi ma na'kon partei purtik Herodes neman he nataan Nai' Yesus he namouf Goe. ¹⁴ Sin neman ntean ate, sin nataan Ee mnak, "Aam tungguru! Hai arkai mihini mmak, Ho neek maan ro amneot, ma ka mputa-kriu miit fa. Ho mkisu haa atoni' in nekan. Ho mutoon munoon Uisneno In romin, natuin Ho ka mpiir fa humaf. Onaim oras ia, hai he mitaan uab es. Tatuin hit atoran pirsait Yahudi te, of hit he tbaena' beo teu uis ko'u pah Roma,* ai' kaah?"

¹⁵ Mes Nai' Yesus nahini nrair nak, sin namin ranan he nkoop Ee, he nranan aprenat pah Roma. Onaim Nai' Yesus nataah neik haan

[☆] **12:11** Siit Pures-Bo'is sin 118:22-23 * **12:14** Uis ko'u nbi prenat pah Roma, sin nteek ee te nak 'Keser'.

ma'fena' am nak, “Nansaa' am es hi he mkopo' Kau meik rasi naan? Mikrira' miit Kau roit fua es!”

¹⁶ Rarit sin nnona' roit fua' es neu Nai' Yesus. In ntoup ma ntae roit naan. Rarit In nataan sin am nak, “Sekau in humn ii es re' ia? Sekau kaan ee es re' matu'i re' ia?”

Sin natahan am nak, “Re' naan uis ko'u pah Roma.”

¹⁷ Rarit Nai' Yesus na'uab am nak, “Karu on naan ate, meik meu prenat saa' re' anjair preent ii in hak. Ma meik meu Uisneno saa' re' anjair Uisneno In hak.”

Anneen In haan tahas on naan ate, sin arsin ansanmakan, natuin In uaban naan namneo. Onaim sin ka bisa namouf Goe fa.

Anmatoom nok amates anmoni nfain, ma anmui' rais matsaos anbi neno tunan, ai' kaah?
(Nai' Mateos 22:23-33, Nai' Lukas 20:27-40)

¹⁸ Rarit atoni' fauk na'kon pukan pirsait bian neman he namouf Nai' Yesus. (Sin na'kon pukan pirsait Saduki re' nanoin ein am nak, amaets ii ka nmonin nfain niit fa).[☆] ¹⁹ Sin na'uab ein nok Nai' Yesus am nak, “Aam tungguru! Ka'o Musa antui hit atoran harat es am nak: karu atoin es nmaet nasaitan in fee, ma ka nmui' fa anah, atoin amates naan in orif ro he nsao bifee banu' naan, maut he nahoni nfee sufa'-ka'uf neu in tataf re' anmate nrair naan.[☆] ²⁰ Namneo, ka'o Musa nanoni' kit on re' naan. Onaim hai he mitaan miit Ko, tua. Anmui' atoni' hiut anma'ori-taatain ein. Moen unu, ansao nahuun, rarit in nmaet, mes ka nahoni' fa. ²¹ Onaim in orif re'

☆ **12:18** Haef ein sin Reta' 23:8 ☆ **12:19** Surat re' Nareta' Nafani' Raan A'honis 25:5

natuin ee ji ansao bifee banu' naan. Mes ka 'roo fa te, in nmaet ma ka nahoni' fa. On naan amsa', in orif re' natuin ee ji, ansao bifee banu' naan, ma in nmate msa', mes ka nahoni' fa. ²² Ma rasi naan anjari msa' neu amuint ein, tar antea aheit suus goe nmate msa'. Rarit banu' naan anmate msa'.

²³ Onaim oras ia, hai he mitaan on nai: bifee naan ansao niit atoni' hiut! Karu pah-piin ii namsopu te, ma Uisneno namonib nafani' amaets ein, of sekau es re' anjair mone neu bifee naan?"

²⁴ Ma Nai' Yesus nataah sin am nak, "Karu hi mitaan on naan, hi ka mihiin namneo fa Uisneno In Suur Akniun ii in afan. Ma hi ka mihiin fa Uisneno In kuasat amsa'. Onaim hi msaan amrair!

²⁵ Amneen! Ka tiit fa rais matsaos et sonaf neno tunan. Are' amates re' Uisneno namonib nafani' sin, ka nmatsaon ntenin fa. On naan amsa' Uisneno In ameupt ein na'kon sonaf neno tunan ka nmatsaon fa. ²⁶ Onaim anmatoom nok are' amates he nmoni nfain, ai' kaah, Au he utoon ki on nai: of oni' hi fe' ka mitenab maan fa reta' anmatoom nok ai re' nout hau uu' aan es, mes ka npuut fa. Reta' naan nak, Uisneno na'uab neu ka'o Musa mnak, 'Ho nai'-ka'o sin Uisneon goe es re' Au. Sin esan re' ka'o Abraham, ka'o Isak, ma ka'o Yakop. Sin arsin na'ruir ein ma na'besan piut neu Kau, tar antea oras ia.'[☆] ²⁷ Onaim hit tahini mtak sin nai'-ka'o sin anmaten nrarin oras ahunut. Mes, natuin Uisneno nak, In anjair sin Uisneon goa fe', es naan ate hit tahiin tak, sin nmonin

☆ 12:26 Anpoin na'kon Pah Masir 3:6

nfanin. Onaim maski sin anmaten nrarin, mes sin nmonin nfanin amsa'. Namneo, amoint ii es re' na'ruri' ma na'bees neu Uisneno. Mes atoin amaets ii, kaah fa ai'? Onaim karu hi mnaa' miheran noni' re' nak, amaets ein ka nmonin nfanin fa, ro hi msaan teb-tebe!”

*Atneek Uisneno ma hit aok-bian amsa'
(Nai' Mateos 22:34-40, Nai' Lukas 10:25-28)*

²⁸ Anbi oras naan, anmui' naan tunggur agama tuaf es nok antook ma nneen Nai' Yesus na'uab nok atoni' pukan Saduki sin. Tunggur agama naan natenab nak, Nai' Yesus nataah sin haan tanas sin nok reko. Rarit in nataan Nai' Yesus am nak, “Aam! Au he utaan Ko on nai: hit atoran harat ma prenat rais pirsait ein amfau re'uf. Na'ko are' kanan prenat ka'o Musa, prenat mee es re' pentiing anneis ji?”

²⁹ Nai' Yesus nataah am nak, “Prenat re' pentiing anneis anbi Uisneno In Suur Akninu' nak on nai:
'Are' kanan atoin Israelas ki, amneen mirek-reko'!

Uisneno ro hit Usif,
ma hit A'nakat.

Ka tiit fa bian anteni', In nmees Kuun!

³⁰ Onaim hi ro he mneek Ee *anneis* na'ko are' bian sin.

Es naan ate, hi ro he mimnau Goe piut-piut,
mihiiin Je batuur-batuur,
ma mmeup ma'tani' he mituin In romin.'☆

³¹ Ma prenat no nua ii nak:

'Ho ro he mneek ho aok-bian, namnees on re' ho mneek ho tuam aan kuum.'

☆ **12:30** Surat re' Nareta' Nafani' Raan A'honis 6:4-5

Prenat noon nua' ein re' ia, esan re' pentiing anneis. Ka nmui' fa prenat bian re' pentiing anneis na'kon preen nua' ein re' ia.”✧

32 Rarit tunggur agama naan na'uab antein neu Nai' Yesus am nak, “Namneo! Re' Ho mu'uab ee naan, namneo. Uisneno anjair hit Usif, ma ka tiit fa Uisneno 'teta'.✧ 33 Hit ro he tneek Ee anneis na'ko are' kanan saa'-saa', ma tamnau Goe piut, tahiin Je, ma tmeup ma'tani' he tatuin In romin, ma hit ro he tneek hit aok-bian ein namnees on re' hit tneek hit tuak. Nok ranan naan ate, na' Uisneno anmariin anneis, na'ko hit arahaa he tatuin atoran rais pirsait annees. Naan reko nneis na'ko hit arahaa he troor mu'it he ta'turu', ai' atfee bare' bian neu Ne.”✧

34 Anneen in haan tahas naan ate, Nai' Yesus natenab nak tunggur agama naan nahiin In sarit naan nok reko. Onaim Nai' Yesus nak, “Aar akre'o te, ho he noi mjair Uisneno Iin na.”

Rarit, ka nmui' fa tuaf es anteni' re' he nroim he nataan Nai' Yesus, fin ka tiit fa es re' nabei' Je te.✧

Kristus naan, usif nai' Daut in sufan, mes in njair nai' Daut in Usin amsa'

(Nai' Mateos 22:41-46, Nai' Lukas 20:41-44)

35 Rarit Nai' Yesus nanoni' too mfaun ein anbi Uisneno In Uim Onen Uuf. In nataan sin am nak, “Natuin hi teenb ii te, on mee? Tunggur agaam ein nanoin ein am nak, Kristus re' naan es re' Tuaf re' Uisneno nruur nain Je na'ko afi unu. Ma sin natenab nak, In suma sufaf na'ko usif nai'

✧ 12:31 A'naak Rais Pirsait ein sin Atoran 19:18 ✧ 12:32 Surat re' Nareta' Nafani' Raan A'honis 4:35 ✧ 12:33 Nai' Hosea 6:6

✧ 12:34 Nai' Lukas 10:25-28

Daut. Mes tenab naan ka namneo fa. ³⁶ Natuun afi unu' Uisneno In Asmaan Akninu' anpaek nai' Daut he ntui mnak,

‘Uisneno natoon anrair au usi' mnak,

“Uum he mtook meu baer amasat et Au 'nimak a'ne'u.

Au of a'moe' are' ho muusn ein, tar sin na'ruir ein neu ko.”[☆]

^{37a} Na'ko naan ate, hit tahiin tak usif nai' Daut anteek Kristus nak ‘Usif’. In a'moufn ii nak, karu sin nteek ee nak Kristus naan suma usif nai' Daut in sufan-ka'un, naan ka nanokab fa fe'. Fin In anjair usif nai' Daut in Usin amsa'.”

Usif Yesus nak, ampaant om mi'ko tunggur agaam ein sin puta-kriuk ein

(Nai' Mateos 23:1-36, Nai' Lukas 20:45-47)

^{37b} Oras Nai' Yesus na'uab on naan ate, too mfaun ein anromin he nneen Ee. ³⁸ Rarit In na'uab antein neu sin am nak, “Hi ro he mpaant om mi'ko tunggur agaam ein. Sin nromin he npairiurs ok neik sin baru mnaun ein, he nnao nateef nok too mfaun ein, he sin niit sin am nak, ‘Hoe! Sin ro kaes ko'u batuur!’ ³⁹ Karu sin antaman anbin uim onen, ai' nokan nbin fesat, sin namin a'took arekot he too mfaun ein niit sin. ⁴⁰ Mes mpaant om! Fin sin re' naan nputa-kriu bifee baun ein, he nasiik ma ntoup naan sin uimn ein. Mes anbi too mfaun ein sin maatk ein, sin na'koro' sin 'moe' reu'f ein naan nok sin onen amnanu-mnanu'. Sin nromin he biak ein nahinin nak sin neek ein kniun' ein. Mes Uisneno of anfee kasat ma'fena' neu sin.”

[☆] **12:36** Siit Pures-Bo'is sin 110:1

Bifee banu' ama'mu'it na'turu' roi kolekte nneis-neis

(Nai' Lukas 21:1-4)

⁴¹ Rarit Nai' Yesus antoko nbani' neu peti 'turu', anbi Uisneno In Uim Onen Uuf. In niit tuaf amfaun neman ma ntao sin roi kolekte nbin peti 'turu' naan. In niit atoin amu'it sin neman ma nataam sin roit ko'u nbin naan. ⁴² Rarit bifee banu' ama'mu'it tuaf es neem ma n'onen nok. In nataam roit sen nua nbi peti naan. Roit naan in oosn ii aan'-ana'.

⁴³ Onaim Nai' Yesus annapen In atoup noin' ein ma na'uab neu sin am nak, “Hi mkius mirek-reko' meu bifee banu' ama'mu'it nee. In nataam roit suma sen nua goah, mes in nfee nneis na'ko are' kanan afeet ein. ⁴⁴ Sin arsin anfeen kolekte na'ko roi nesif. Mes bifee banu' ia, anfee nain in roit ein oke' neu Uisneno.”

13

Usif Yesus natoon nain anmatoom nok Uisneno In Uim Onen Uuf ee in atseran

(Nai' Mateos 24:1-2, Nai' Lukas 21:5-6)

¹ Rarit Nai' Yesus nok In atoup noin' ein anpoin na'kon Uim Onen Uuf. Oras sin npoin, In atoup noni' tuaf es naruur Ee Uim Onen Uuf naan, ma na'uab am nak, “Bait Ho mkius miit ia fe'! Umi ia reokn ii kaah! Sin nbakin in faut kou'n ii reko 'maten!”

² Mes Nai' Yesus nataah ee mnak “Uim Onen ia, ro namaas! Mes ka 'roo fa te, sin of anpukai natserab are' fatun re' ia.”

Neon amsoupt ein sin taanr ein

(Nai' Mateos 24:3-14, Nai' Lukas 21:7-19)

³ Rarit Nai' Yesus sin nnaon neun a'to'ef Saitun, ma ntokon nbain ein an'anin Uisneno In Uim Onen Uuf. Rarit In atoup noin' ein tuaf haa, neman ma na'uab nok Ne. Sin esan re' nai' Petrus, nai' Yakobus, nai' Yohanis, ma nai' Anderias. ⁴ Sin nataan Ee mnak, "Aam! Bait Ho mutoon mufani' miit kai Ho uabam fe'e na. Reka' te in oors ii ntea? Ma in taanr ein, onan re' mee?"

⁵ Rarit Nai' Yesus nataah am nak, "Asar hi mpanat mirek-reko', he kais napoi naan ki. ⁶ Natuin of anmui' tuaf amfaun re' neman ma npaas sin a'baask ein am nak, 'Au re' ia, Kristus, Atoni' re' Uisneno nba'an nain Je na'ko unu.' Onaim sin napoi naan tuaf amfaun. ⁷ Karu hi miit atoni' anmakenan, ai' hi mneen uab anin nak anmui' makenat et mee-mee, hi kais mimtau. Natuin are' rasin naan ro he nboran, mes neon amsoupt ein ka ntea fa fe'. ⁸ Fin uuf es of anfeen ma nmaraban uuf es. Ma pah es of anmakeen nok pah es. Tainuuns ii anhasu' anbi mee-mee. Amnaahs ii of ma'tani' msa'. Are' rasin re' ia anjarin tanar namnees on re' bifee ma'apu' re' nnaben meen mahoni'.

⁹ Onaim hi arki ro he mpanat mirek-reko'. Sin of neman ma nheek ki, rarit anheer neik ki neu umi feek rais pirsait. Ma sin of anbeos ki nbi uim oen ein sin naank ein. Ma sin of anfuut neik ki neu are' anaa' apreent ein, natuin hi mituina' Kau. Mes rasin naan amsa', anjarin asraak he hi mitonan sin are' rasi anmatoom nok Kau. ¹⁰ Fin Uisneno In aanh ein ro he nnaon ma natoon nahunun Au Rais Reko neun are' uuf-uuf anbin pah-pinan ia, rarit na' neon amsoupt ein antean. ¹¹ Mimnau! Karu sin nfuut neik ki neu umi feek rasi, hi kais mimtau ma mitenab am mak, 'Au he

u'uab 'ak saa'? Ai' au he utaah 'ak saa'? Karu in oors ii antea, hi mi'uab mituina' saa' re' Uisneno In Asmaan Akninu' natoon ee neu ki.✧

¹² Anbi uim jes in nanan, karu tuaf es anpirsai neu Kau, of in orif-tataf sin es re' namin ranan he nroor niis ne. Karu aanh ee es re' anpirsai, of in aamf ee kuun es re' neikn on anroor niis ne. Ma karu in ainaf-amaf anpirsai Kau, of sin aanh ein es re' anroor niis sin. ¹³ Onaim of biak ein nsaken niis ki, natuin hi mpirsai meu Kau. Mes sekau es re' naran tar antea namsoup, Uisneno ro nafeitn ee ma nfee ne 'honis.'✧

Ampanat mirek-reko' natuin neon amsoupt ein anpaumaakn een

(Nai' Mateos 24:15-28, Nai' Lukas 21:20-24)

¹⁴ Nai' Yesus na'uab ankono mnak, "Tuaf es re' neik amre'ut of he neem. In ntaam ma nhake nbi baer nuni nbi Uisneno In Uim Onen Uuf, re' ka pantas fa neu ne, tar in nhai'niis bare naan. Es naan ate, Uisneno annao nasaitan bare naan. Karu hi miit rasi naan, hi mpanat mirek-reko'! (Sekau es re' anrees re' ia te, ro he npaant on!) Naan anjair tanar nak neon suust ein anpaumakan re'-reu'f een. Karu hi miit on naan ate, abitan propinsi Yudea amfeen maen nai meu 'toe'f ein.✧ ¹⁵ Ma hi ro he maen rab-raab, he kais amsiraak om. Karu tuaf mee npoi nrair na'ko in umi, kais antebi nfain he nait bare' bian antein. ¹⁶ Ma tuaf re' anbi rene, kais antebi nfain he nait tai nusat antein. Ro in naen ankoon!✧ ¹⁷ Re' ansuus anneis-neis ji, es re' bifee ma'apu',

✧ **13:11** Nai' Mateos 10:17-20, Nai' Lukas 12:11-12 ✧ **13:13** Nai' Mateos 10:22 ✧ **13:14** Nai' Danial 9:27, 11:31, 12:11 ✧ **13:16** Nai' Lukas 17:31

ma bifee re' nasuus ri'ana'. Fin sin ka bisa naen nanan fa. ¹⁸ Onaim reko nneis hi m'onen ma amtoit he rais amre'ut naan kais neem nateef nok oras uran-anin. ¹⁹ Fin oras naan, ma'nuuk ii kou' re'uf! Anmurai na'ko Uisneno nmoe' pah-pinan ia tar antea neno ia, ka tiit fa suust es kou'n ii on re' naan. Ma atoni' of ka niit anteni' fa susat nahuum on re' naan.☆ ²⁰ Karu Uisneno ka na'paran fa neon suust ein naan, ka tiit fa tuaf he nmoni nkoon. Mes natuin Uisneno nneek niis In aan piir ein, es naan ate In na'paran neon suust ein naan.

²¹ Karu nenon naan antean ate, hi of amneen biak ein na'uab ein am nak, 'Amkius nai! Kristus es ia!' Mes tuaf bian nak, 'Kristus et nee!' Mes nati' hi kais amneen, oo! ²² Ma of anmui' atoni' re' anpoi ma npaas in a'basan am nak, 'Au re' ia, Kristus!' Bian anteni' nak, 'Au re' ia, Uisneno In mafefa kninu'.' Sin of anmo'en rais sanmakat huma'-huma' neik kuasat na'kon niut re'uf he nputa-kriiu. Sin namin ranan huma'-huma' he karu reko te, sin nasekeb Uisneno Iin na. ²³ Hi ro he mpanat mirek-reko'! Neon suust ein naan ka ntean fa fe', mes Au umnaub 'ain ki sin!"

*Mansian Batuur-Batuur In amneman
(Nai' Mateos 24:29-31, Nai' Lukas 21:25-28)*

²⁴ Rarit Nai' Yesus antaru ntein In uaban neu In atoup noin' ein am nak, "Karu neon suust ein ankonon ate,

'Maans ii of nameis'ook,
ma fuun ii of nasab-saab amsa'.☆

☆ **13:19** Nai' Danial 12:1, Rasi Mnitass neu nai' Yohanis 7:14

☆ **13:24** Nai' Yesaya 13:10, Nai' Yeskial 32:7, Nai' Joel 2:10,31, 3:15, Rasi Mnitass neu nai' Yohanis 6:12

25 Akfuun ein of anbamoufun na'kon neon goe tnanan,
 ma are' kuasat abitan neon goe tnanan
 anrikraakn ok.'☆

26 Rarit na' are' mansian of niit Kau, Mansian Batuur-Batuur re' ia. Of Au 'uum u'ko neon goe tunan. Ma are' too mfaun ein of niit Au kuasak, ma Au pinak ma krahak ok-oke'.☆ 27 Rarit Au of a'reun Uisneno In ameupt ein na'kon sonaf neno tunan, he nnaon nabuaba' are' tuaf ein re' Au 'piri 'rair sin, na'kon pah-piin ii tuuk am tuuk, na'kon pasa' neon-saet tar antea pasa' neon-teas, na'kon pasa' ponain tar antea pasa' haa'-nuu."

Neon suust ein anjarin tanar neu Usif Yesus In amneman

(Nai' Mateos 24:32-35, Nai' Lukas 21:29-33)

28 Nai' Yesus antaru ntein In uaban am nak, "Au 'ait reta' u'ko hau. Karu hau naan in nook ein nmurai namnatun, naan anjarin tanar nak oras fauk-nais ii anpaumaak een. 29 On naan amsa', karu hi miit neon suust ein naan neman, on re' saa' re' Au utoon a'rair ki naan, naan anjarin tanar nak anpaumaak he Au 'uum een. 30 Oras ia, amneen mirek-reko'! Na'ko hi ar-arki re' ia, of anmui' tuaf re' anmoin fe', oras neon suust ein naan antean. 31 Maski neno tunan ma pah-pinan namneuk, mes Au uabk ii of antahan nabar-baar."

Usif Yesus In amneman naan ma'nifa'

(Nai' Mateos 24:36-44)

☆ 13:25 Nai' Yesaya 34:4, Nai' Joel 2:10, Rasi Mnitaa neu nai' Yohanis 6:13 ☆ 13:26 Nai' Danial 7:13, Rasi Mnitaa neu nai' Yohanis 1:7

³² Nai' Yesus antaru ntein am nak, “Ka tiit fa tuaf es, re' nahiin neno mee, ai' anreuk fauk ate, of Au 'fain 'uum. Uisneno In ameupt ein sonaf neno tunan amsa' ka nahinin fa. Au Tuak ii msa', ka uhiin fa. Suma Au Ama' anmees nahiin.✧
³³ Natuin rasi naan ate, hi ro he mpanat mirek-reko', natuin hi ka mihiin maan fa reka' te in oors ii ntea.

³⁴ Ka 'roo fa te, Au 'nao usaitan ki. Mes of Au 'fain 'uum. Namnees on re' tuaf re' annao nporin in umi neu bare 'roo-'roo. In nreun in ameupt ein he npao in umi naan rek-reko. Ma in nbati nfeen sin es am es ate nok in mepu. In naprenat apao eno' he npanat narek-reko' tar antea in nfain neem.✧ ³⁵ Hi ro he mpao fai-manas amsa', natuin hi ka mihiin fa oras mee te, uim tuaf naan of anfain neem. He maans ii nmabe, oo, fai tnana', oo, maans ii na'pupu', oo, ai' maans ii fe'e nsae. Hi ka mihiin maan fa neu he reka'. ³⁶ Kais-kaisa' in neem nok askeken ate, in napein ki amtuup amfin ma mikoon fe'.

³⁷ Onaim saa' re' Au utoon 'eu ki ia, Au utoon 'eu bian sin amsa' am 'ak, ‘Hi ro he mpanat mirek-reko' he mseun Kau.’”

[Nok rasi naan ate, Usif Yesus na'tu'ub In uaban nok In atoup noin' ein nbin a'to'ef Saitun.]

14

A'naakt ein namin raan ma'nifa' he nheek Usif Yesus

(Nai' Mateos 26:1-5, Nai' Lukas 22:1-2, Nai' Yohanis 11:45-53)

✧ 13:32 Nai' Mateos 24:36 ✧ 13:34 Nai' Lukas 12:36-38

1-2 Rarit a'naak rais pirsait Yahudi sin a'naakt ein ma tunggur agaam ein namin raan ma'nifa' fe' he nheek Nai' Yesus. Fin sin he nroor Goe. Ma sin an'aotr ein asraak am nak, "Kaisa' fe'! Kais atmanaap he theek Je, fin neon kou'n ii anhaumaakn een. Kais-kaisa' too mfaun ein napoitr ein taisibu."

Sin na'uab ein on naan, natuin anmeu te, atoin Yahudis sin nateef nok neon ko'u 'Paska', ma 'Fesat Utunu' ka Maseor Muur fa'. Anbin nenon re' naan, sin feest ein he namnau nafani' oras ahunut, re' Uisneno napoitan sin be'i-na'i sin na'kon pah Masir.☆

Bifée re' naronib miin foo meni' re' ma'osa' neu Usif Yesus

(Nai' Mateos 26:6-13, Nai' Yohanis 12:1-8)

³ Anbi kuan Betania, anmui' atoin es, kaan ee nai' Simon. Nahunu te, atoni' anmai'niisn ee, natuin in ameen nui-atroki'. Mes oras ia, in nareko nrair.

Onaim oras neon kou' gui ka ntea fa fe', Nai' Yesus sin annaon ma nbukaen anbin nai' Simon in umi. Oras sin nbukaen, bifee jes neem nateef nok Nai' Yesus. In nnaa' neik boot faut goes, re'

☆ 14:1-2 Anpoin na'kon Pah Masir 12:1-27

narai je nok miin foo meni' re' ma'osa'.* Rarit bifee naan an'ipu nporin botor naan in neon. Ma in naronib akre'o-kre'o neu Nai' Yesus In a'nakan he anjair tanar nak in nhormaat Nai' Yesus.

⁴ Mes anbi naan, anmui' atoni' fauk re' an-bukaen nokan amsa'. Oras sin niit bifee naan anmoe' on re' naan, sin nato'on ma na'uab ein nok haan be'o mnak, “Huu! Bifee saa' na es re' ia, es na' in nporin nareu' miin foo meni' ma'osa' re' ia!? ⁵ Reko nneis in na'sosa' mina' re' naan! Rarit in nbait roit ein naan neu ama'mui't ein! Natuin miin foo meni' naan in oosn ii namnees nok kai tuaf es anbi toon es.” Rarit sin nakain ee nok ma'tani'.

⁶ Mes Nai' Yesus nataah sin am nak, “Hi kais misusab bifee re' ia! Amkonan! Au 'mariin, natuin in n'oop anrair miin foo meni' neu Au aok. ⁷ Ama'mui't ein nok ki neno-neno. Onaim hi bisa mturun ma mbaab sin ansuun oras. Mes ka 'roo fa te, Au ka neu he ubua 'teni' fa 'ok ki.✧ ⁸ Au 'moink ii ka 'roo fa goen. Ma bifee re' naronib mina' neu Kau, in npairoir nain Au aok ii, on re' in nkaki' nain fubona' neu Au aok-ta'uk. ⁹ Mimnau mirek-reko! Uisneno In Rais Reko of

* **14:3** Miin foo meni' naan in oosn ii namnees nok kai tuaf es anbi toon es. Suur Akninu' uab Yunani ntui mnak mina' naan in oosn ii '*denari*' natun teun, ma mina' naan in kaan ee '*nardos*', re' nahunu te atoni' nmoe' je na'ko hau 'ba'at re' foo bona'. Suur Akninu' uab Indonesia nak 'narwastu'. Botor naan, sin nmoe' je na'ko fatu re' atoni' anpaah aah ee. Botor naan amsa' ate, ma'osa'. Suur Akninu' uab Yunani nak botor naan sin nmoe' je na'ko fatu re' in kaan ee '*alabastros*'. Suur Akninu' uab Indonesia nak fatu naan in kaan ee 'batu pualam'. Amrees *nai' Lukas 7:37-38* amsa'. ✧ **14:7** Surat re' Nareta' Nafani' Raan A'honis 15:11

nanaob on anbi mee-mee nbi pah-pinan ia, ma tuaf of nareta' anmatoom nok bifee ia in a'mo'en arekot. Maut he are' mansian ein namnau goe.”

*Nai' Judas naim ranan he na'sosa' Usif Yesus
(Nai' Mateos 26:14-16, Nai' Lukas 22:3-6)*

¹⁰ Rarit anmui' tuaf es na'ko atoup noni' tuaf bo'es am nua, kaan ee nai' Judas Iskariot. In npoi nnao ma naim a'naak rais pirsait Yahudi sin a'naakt ein, he na'sosa' Nai' Yesus neu sin. Oras in nateef nok sin, in nateaba' in sarit. ¹¹ Oras a'naakt ein anneen nai' Judas in uaban naan, sin nmarinan nmaten. Ma sin nbaasn ee mnak, “Karu ho he mu'sosa' Nai' Yesus meu kai, hai of ambaen ko.” Rarit nai' Judas anpoi ma nmurai naim ranan he nana'at Nai' Yesus neu sin.

*Usif Yesus anbukae nbi fesat Paska nok In
atoup noin' ein*

(Nai' Mateos 26:17-25, Nai' Lukas 22:7-14,21-23, Nai' Yohanis 13:21-30)

¹² Neno naan, neon ahunut na'ko neon ko'un atoin Yahudis sin. Anbi neno naan, sin biasa ntunun utunu' re' ka mamuur fa, ma sin nroron 'bib-kase msa'. Onaim Nai' Yesus In atoup noin' ein neman ma nataan Ee mnak, “Aam! Neno ia, hit neon ko'u Paska. Onaim Ho roim ii he hai mnao mibarab baer fesat Paska meu mee?”

¹³ Rarit Nai' Yesus anreun In atoup noni' tuaf nua mnak, “Hi mnao mihuun nai meu kota. Anbi naan, of hi miteef mok atoin es re' nasaah oe nbi kuis aan es. Hi mnao mituin ee. ¹⁴ Karu in nnao ntaam neu umi mee te, hi mtaam mituin ee. Rarit hi mitoon meu uim tuaf naan am mak, ‘Aam! Hai Tungguur goe ntoit bare he nmoe' fesat Paska nok In atoup noin' ein.’ ¹⁵ Fin atoni'

naan of naruru' ki ke'en mainuan es, et umi ktuta' naan in fafon. In nkikin anrair ke'en naan. Onaim hi nua ki mibarab bukaet ambi naan.”

¹⁶ Rarit sin nua sin annaon neun kota. Anbi naan, sin nateef nok are' saa'-saa' re' Nai' Yesus natoon anrair sin. Onaim sin nabarab he Nai' Yesus sin nbukaen fesat Paska anbi naan. Rarit sin nua sin annao naskau Nai' Yesus nok In atoup noni' bian.

¹⁷ Oras maans ii he noi nmouf, Nai' Yesus nok In atoup noni' bo'es am nua nnaon ntaman neun bare naan. ¹⁸ Anbin bare naan, sin ntokon ma nbukaen nabu-buan. Oras sin nbukaen, Nai' Yesus na'uab am nak, “Hi mneen! Anmui' tuaf es na'ko ki re' of na'sosa' Kau neu atoin sona'.”*

¹⁹ Oras sin nnenan on naan ate, sin neek ein na'uun ein. Rarit sin es-es ate nataan Nai' Yesus am nak, “Aam! Re' Ho mteek ee naan, ka au fa, oo?”

²⁰ Nai' Yesus nataah am nak, “Tuaf re' narepa' utunu' nok Kau nbi 'pik-oef ia, of in es re' na'sosa' Kau. ²¹ Mimnau, joo! Au, Mansian Batuur-Batuur re' ia, ro he 'maet, on re' matu'i nrair et Uisneno In Suur Akninu'. Onaim ampaant om! Atoni' re' na'sosa' Kau naan, of in nsutai kuun in amre'un! Reko nneis bait in ainf ee kais nahoins ee.”

Usif Yesus na'uab am nak, utunu' ma tua min-kase anjair tanar he tamnau Goe

(Nai' Mateos 26:26-30, Nai' Lukas 22:14-20, 1 Korintus 11:23-25)

²² Oras sin nbukaen, Nai' Yesus nait naan utunu' fua es, ma ntoit makasi neu Uisneno. Rarit In nteib utunu' naan pisa'-pisa', ma nfee

* **14:18** Siit Pures-Bo'is sin 41:10

sin neu In atoup noin' ein. Rarit In na'uab am nak, “Utunu' re' ia, Au aok. Mait ma mbukae nai, tua.”

²³ Rarit In nait naan kraa mninut re' matua' tua min-kase. Ma In ntoit makasi neu Uisneno. Rarit In nnona' kraas naan neu In atoup noin' ein, he sin nbukaen. ²⁴ Ma In na'uab am nak, “Tua min-kase ia, Au naa'. In of nat'oop he nsoi nafetin too mfaun. Naa' re' ia, anjair tanar re' namnaub kit nak, saa' re' Uisneno nba'an anrair sin naan, anjarin esan re' ia. Mait ma mbukaen nai. ✧ ²⁵ Amneen mirek-reko'! Anmurai mabe' ia, Au ka neu he 'bukae 'teni' fa tua min-kase on re' ia. Tar Au 'ok Au Ama' amtuun Om ma miprenat mibu-bua mbi sonaf neno tunan, na' Au 'bukae 'teni'.”

²⁶ Rarit sin nsii siit es, he nbo'is Uisneno. Rarit sin nпойn oras fai, ma nnaon neun a'to'ef Saitun.

Usif Yesus natoon nahuun nak, nai' Petrus of nasuan Ee

(Nai' Mateos 26:31-35, Nai' Lukas 22:31-34, Nai' Yohanis 13:36-38)

²⁷ Oras sin nnaon nabuan naan, Nai' Yesus natoon nanin sin am nak, “Mabe' ia, hi arki of maen misaitan Kau. Fin matu'i nrair et Uisneno In Suur Akninu' nak,

'Uisneno of na'maet atukus,

ma in 'bib-kaesn ein naen ansiksaakn ok.’ ✧

²⁸ Namneo, Au ro he 'maet. Mes karu Au 'moni 'fain jen ate, Au of a'nao uhunun ki 'eu propinsi Galilea.” ✧

✧ **14:24** Anпойn na'kon Pah Masir 24:8, Nai' Yeremias 31:31-34

✧ **14:27** Nai' Sakarias 13:7 ✧ **14:28** Nai' Mateos 28:16

29 Rarit nai' Petrus anprotees am nak, “Aam! Maski sin naen nasaitan Ko, mes au ka neu fa he 'aen, tua!”

30 Nai' Yesus nataah am nak, “Pe'u! Nati' mumnau! Mabe' ia, nahuun na'ko maun ii nkokre'on hana' nua, ho musuan amrair Kau era' teun goen mak, ho ka muhiin Kau fa!”

31 Mes nai' Petrus haan ii nsae mnak, “Kaah fa, tua! Karu Ho mmate te, au 'maet 'ok. Au ka neu fa he 'aen usaitan Ko, tua!”

Nai' Petrus in aok-bian sin es-es ate na'uab on naan amsa'.

Usif Yesus an'onen anbi po'on Getsemani

(Nai' Mateos 26:36-46, Nai' Lukas 22:39-46)

32 Rarit Nai' Yesus nok sin annaon nkonon ma ntean poo'n es et a'to'ef Saitun, kaan ee 'Getsemani'. Onaim Nai' Yesus na'uab neu sin am nak, “Amtoko mpao Kau mbi re' ia. Au he 'nao 'onen 'eu re' nee.”

33 Ma In nhaman neik nai' Petrus, nai' Yakobus, ma nai' Yohanis, he nnao nabua nok Ne. Anmurai na'ko oras naan, In neekn ii nsuus ma ka ntainina' fa. 34 In na'uab neu sin am nak, “Au neek ii nsuus anmaet! Au 'naben ate Au he 'maet jen. Hi mtook ma mpao mbi re' ia.”

35-36 Rarit In nnao nteni' kre'o, rarit anri'tuu ma n'onen am nak, “Ama' amanekat! Karu Ho mromi te, Au kais a'sutai nana'renat naan tar a'tea he 'maet on re' ia. Au uhiin urair 'ak, ka tiit tain fa saa' re' Ho ka bisa mmoe' maan ee fa. Onaim karu reko te, Ho mait mu'roba' rais ha'mu'it re' ia na'ko Kau. Mes kaisa' mutuin Au romik; maut nai he mutuin Ho romim, tua.”

37 Rarit In nfain neu In atoup noni' tua teun ein naan, mes sin ntupan nfinin. Onaim In npoo'

na'fena' sin, ma na'uab neu nai' Petrus am nak, “Hoe! Pe'ul† Ho mtuup kuum, oo? Au 'bi nee rabah. Mes hi he mpao kre'o msa', hi ka mibei' fa! ³⁸ Mumeu maاتم ein naan fe'. Rarit amfeen he mpao mok Kau! Hi neekm ein anromin he hi mmoe' rais reko, mes hi aom ein an'oren. Onaim reko nneis hi m'onen, he karu 'suu' te neem ate, kais niis ki.”☆

³⁹ Rarit Nai' Yesus annao n'onen anteni' haef es. In ntoit antein he Uisneno nait na'roba' rais ha'mu'it re' naan na'ko In tuan. ⁴⁰ Rarit In nfain neem neu In atoup noni' tua teun ein naan. Mes sin ntupan nfinin, fin sin maatk ein nma'fenan re'-re'uf. Onaim In npoo' nafena' ntein sin. Mes sin ka nahini ntein-tein' ein fa, he nataah Ee nak saa'.

⁴¹ Rarit Nai' Yesus annao nasaitan sin he n'onen hae' teun ii. Rarit In nfain neem, ma anpoo' nafena' antein sin. In na'uab am nak, “Airoo! Hi mtuup-tuup fe', oo? Noo goah nai! Amfeen nai! Fin atoni' re' na'sosa' Kau, Mansian Batuur-Batuur re' ia, anpaumaak een. Oras ia, sin he nheek ma nnona' Kau neu atoin amoe' saant ein. ⁴² Amfeen nai ma mkius nai! Atoni' re' na'sosa' Kau, neem een. Iim he tnao tateef tok sin!”

Anheek Usif Yesus

(Nai' Mateos 26:47-56, Nai' Lukas 22:47-53, Nai' Yohanis 18:3-12)

⁴³ Oras Nai' Yesus na'uab on naan fe'e te, nok askeken nai' Judas nok atoni mfaun ein neman. Sin neik suin tuka' nok hau tuka', he nheek Nai'

† **14:37** Suur Akninu' uab Yunani ntui nak 'Simon' anbi era' ia. Nai' Simon naan, nai' Petrus in kanan bian. ☆ **14:38** 1 Korintus 10:13

Yesus. Sin nmoe' rasi naan, fin sin napenin aprenat na'ko atoin Yahudis sin a'naakt ein. Sin arsin esan re' a'nakat rasi pirsait Yahudi sin a'naakt ein, tunggur agaam ein, ma mnais harat Yahudi sin. ⁴⁴ Nai' Judas ansenen nain sin am nak, “Amkius mirek-reko! Au 'neek sekau te, mheek Je nai! In es re' hi mam-mami!”

⁴⁵ Onaim oras nai' Judas nok sin antean bare naan, in neem anhake nbi Nai' Yesus In matan. Ma in nasee Je mnak, “Aam Tungguru!” Onaim nai' Judas anhoo ma nneek Ee. ⁴⁶ Rarit too mfaun ein neman he nheek Nai' Yesus.

⁴⁷ Mes Nai' Yesus In atoup noni' tuaf es anfaik in benas, ma nsaip namouf atoin es in rugin noon. Atoin ruik papa' naan, a'naak rais pirsait Yahudi sin a'naak kou' goe in ate. ⁴⁸ Rarit Nai' Yesus na'uab nok tuaf ein re' he nheek Je naan am nak, “On mee? Hi mak Au re' ia, atoin aburart Kau, oo? Es na' hi iim he mheek Kau meik suni' ma hau tuka'?” ⁴⁹ Neno-neno te, Au unoni' ki a'bi Uisneno In Uim Onen Uuf, mes ka tiit fa tuaf es, re' neem he nheek Kau. Iim he mheek Kau nai! Fin rasi naan matu'i nrair na'ko unu' et Uisneno In Suur Akninu'.”[☆]

⁵⁰ Nai' Yesus In atoup noin' ein namtau nmaten. Onaim sin naen nasaitn Ee nmees.

⁵¹ Anbi naan, anmui' atoin muinf es, annao natuina' Nai' Yesus. In tainuus tai tuuk es. Atoni mfaun sin he nheek je msa', ⁵² mes sin nnaa' naan ahaa in tais. Onaim in naen aaf-aaf aah, natuin in namtau nmaet.

[☆] **14:49** Nai' Lukas 19:47, 21:37

Sin neik Usif Yesus annao neu afeek rais pirsait ein

(Nai' Mateos 26:57-68, Nai' Lukas 22:54-55,63-71, Nai' Yohanis 18:13-14,19-24)

⁵³ Rarit sin neik Nai' Yesus annao neu a'naak rais pirsait Yahudi sin a'naak kou' goe in umi. Anbi naan, kaes kou'n ein nabuan nrarin. Sin arsin esan re' a'naak rais pirsait Yahudi sin a'naakt ein, tunggur agaam ein, ma atoni mnais harat Yahudi sin. ⁵⁴ Oras sin nheek neik Nai' Yesus ate, nai' Petrus natuin nok a'kor-koro', tar antea a'naak rais pirsait Yahudi sin a'naak kou' goe in umi. In ntaam anbi umi naan in kintal, ma in ntook nok araar ai ngguin.

⁵⁵ Anbi umi naan in nanan, a'naak rais pirsait Yahudi sin a'naakt ein na'uab ein nok afeek rais pirsait ein. Sin arsin namin bukti he nasaan Nai' Yesus, fin sin he nhukun na'maet Je. Mes sin ka napenin fa bukti saa'-saa'. ⁵⁶ Rarit sin no'en saksii namfau, he namouf Nai' Yesus. Mes sin uabk ein nasurin es nok es.

⁵⁷ Rarit anmui' saksii bian re' anfeen anhaken ma na'uab ein puta-kriu mnak, ⁵⁸ “Hai mneen atoni' ia na'uab am nak, ‘Au of useer Uim Onen Uuf, re' nafeen ee neik 'nimaf mansian. Ma neno tenu nteni' te, Au ufena ufani' Umi naan, mes ka 'paek fa 'nimaf mansian.’”⁵⁹ Mes sin uabk ein nasurin es nok es.

⁶⁰ Rarit a'naak rais pirsait Yahudi sin a'naak kou' goe nfeen anhaek anbi are' afeek rasin naan sin maatk ein. In nataan Nai' Yesus am nak, “Too mfaun ii natraak Ko. Mes nansaa' am es Ho mtaa' kuum?”

☆ **14:58** Nai' Yohanis 2:19

⁶¹ Mes Nai' Yesus ka ntoin fa fefa' mese msa'. Onaim a'naak rais pirsait Yahudi sin a'naak kou' goe nataan Ee mnak, “Ho mutoon miit! In amneon ii, Ho re' ia, batuur-batuur Kristus, Uisneno In Anah re' In nba'an nain Je na'ko ununu'?”

⁶² Nai' Yesus nataah am nak, “Namneo! In es re' Au re' ia. Hi arki of miit Kau, Mansian Batuur-Batuur re' ia, a'toko 'bi sonaf neno tunan, a'bi Uisneno In abnapan a'ne'u. Uisneno anmui' kuasat ma'tani' nneis! Au of 'ok Ne mnaa' aprenat mibu-bua. Namuni te, Au 'saun 'uum a'bi nope u'ko sonaf neno tunan.”✧

⁶³ Anneen Nai' Yesus In uaban naan ate, a'naak rais pirsait Yahudi sin a'naak kou' goe natoo' ma'tani', tar antea in npius nakrati' in baru mnanu'. Rarit in nkoa' ma na'uab neu are' afeek raisn ein am nak, “Hit kais taim atteni' saksii!

⁶⁴ Hi mneen meik hi ruikm ein kiim. In es neikn on na'uab on naan. In nait In tuan ii njair Uisneno in Anah. In na're'uf Uisneno! Tatuin hit atoran rais pirsait, karu tuaf es nanees on nok Uisneno, in ro he nmaet! Onaim oras ia, hi he mifeek mak saa'?”

Onaim sin nafekan ok-oke' mnak, “Namneo, atoni' ia nsaan! Onaim ro he thukun tiis ne!”✧

⁶⁵ Rarit tuaf fauk neiki ntaman ma naroon Nai' Yesus. Sin n'aum naan In maatk ein, rarit sin nbeos Goe. Onaim sin nataan Ee mnak, “Ho mtakseer miit, sekau es re' antuuf ko?” Rarit sin no'en apao Uim Onen Uuf ein, he neem ma neik Nai' Yesus. Oras sin neik Je nnao, sin npaas nafan-fain' Ee.

✧ **14:62** Nai' Danial 7:13

✧ **14:64** A'naak Rais Pirsait ein sin

Atoran 24:16

*Nai' Petrus nasuan Usif Yesus no teun
(Nai' Mateos 26:69-75, Nai' Lukas 22:56-62,
Nai' Yohannis 18:15-18,25-27)*

⁶⁶⁻⁶⁷ Oras naan, nai' Petrus antoko nbi kintal fe'. Rarit aet bifee tuaf es na'ko a'naak rais pirsait Yahudi sin a'naak kou' goe, neem niit nai' Petrus anraar ai. In nnano' narek-reko' nai' Petrus in human, ma in na'uab am nak, “Fe'e na, ho mubua mok Nai' Yesus, atoin Nasaretas naan. Tebe, oo?”

⁶⁸ Mes nai' Petrus nataah am nak, “Kaah fa, tua! Nansaa' am es ho mutaan on naan? Au ka uhiin Je fa!” Rarit nai' Petrus anpoi ma nhaek anbi eno' 'kono'. [Nateef oras naan, maun goe ankokreo'.]‡

⁶⁹ Rarit ate naan niit anteni' nai' Petrus. Ma in natonan atoni mfaun nbin naan am nak, “In re' ia, tuaf es na'ko sin amsa'.”

⁷⁰ Mes nai' Petrus anprotees am nak, “Of oni' ho mumaun! Au ka uhiin Je fa!”

Ka 'roo fa te, tua 'teta' es, re' anhake nbi naan na'uab anteni' nai' Petrus am nak, “Hoe! Ho he mputa-kriu mak ho ka mubua mok sin fa! Hi arki atoin Galileas!”

⁷¹ Mes nai' Petrus anraban ma'tani' am nak, “Au 'suup! Au ka uhiin fa atoni' naan, tua!”

⁷² Nateef oras in na'uab on naan ate, maun goe nkokreo' no nua. Onaim nai' Petrus namnau niit Nai' Yesus In uaban fe'e na nak, “Nahuun na'ko maun ii ankokre'on no nua te, ho musuan Kau era' teun goen.”

Oras namnau niit on naan ate, nai' Petrus ankae nme'-me'ur.

‡ **14:68** Tuis uab Yunani bian ka ntui fa era' re' ia.

15

Sin neik Usif Yesus he nateef nok gubernur Pilatus

(Nai' Mateos 27:1-2, Nai' Mateos 11—14, Nai' Lukas 23:1-5, Nai' Yohanis 18:28-38)

¹ Neis noi nmeu te, afeek raisn ein sin nneek mesen he na'maet Nai' Yesus. Onaim sin nfuut neik Je he nateef nok gubernur Pilatus. ² Oras sin ntean gubernur ee, in nataan Nai' Yesus am nak, “On mee? Namneo ho re' ia atoin Yahudis sin Usif?”

Nai' Yesus nataah am nak, “Batuur! Ama' gubernur ho uabam naan, baatuur.”

³ Rarit a'naak rais pirsait Yahudi sin a'naakt ein na'uab ein nok gubernur ee mnak, “Atoni' ia In saant ii mfau re'uf!” Onaim sin nsoi' In saant ein mese'-mese'. ⁴ Rarit gubernur naan nataan antein Nai' Yesus am nak, “Ho ka mneen fa sin uabk ein naan, aa oo? Sin nasaeb ko sanat amfaun. Bait ho mutaah miit fe'!”

⁵ Mes Nai' Yesus ka ntoin fa fefa' mese' amsa', tar antea gubernur ee nsanmaak.

Gubernur Pilatus nafeek hukun a'maten neu Usif Yesus

(Nai' Mateos 27:15-26, Nai' Lukas 23:13-25, Nai' Yohanis 18:39—19:16)

⁶ Toon-toon ate, karu atoin Yahudis sin anmo'en fesat Paska, biasa too mfaun ein anpiir naan atoin bui tuaf es, he gubernur ee nafeitn ee na'ko bui. ⁷ Oras naan, anmui' atoin bui tuaf es, kaan ee nai' Barabas. Nahunu te, sin nheek je natuin in nraban anaa' aprenat pah Roma, ma in nroor atoni' msa'. ⁸ Natuin fesat Paska naan anpaumaak een, es na' atoni mfaun ein nnaon

neun gubernur Pilatus ma nhuun ein am nak, “Ama' gubernur! Neon ko'u Paska anpaumaak een. Karu reko te, mufetin atoin bui tuaf es, on re' toon-toon.”

⁹ Rarit gubernur ee ntoin sin am nak, “On naan ate, au he ufetin ki sekau? Karu au ufetin ki atoin Yahudis sin Usif re' ia te, hi mromi, oo?”

¹⁰ Gubernur ee na'uab on naan, amneon ii in nahiin anrair nak, a'naak rais pirsait Yahudi sin a'naakt ein neik Nai' Yesus neu ne, natuin sin neek ein namenanan nmaten neu Nai' Yesus.

¹¹ Mes are' a'naak rais pirsait Yahudi sin a'naakt ein anhuitan too mfaun ein he sin ntoit neu gubernur ee mnak, “Hai ka mrom-roim main Je fa! Mufetin kai nai' Barabas, tua!”

¹² Rarit gubernur ee nataan anteni' sin am nak, “Karu on naan ate, au he 'moe' saa' 'eu Nai' Yesus, re' sin nteek nain Je mnak 'atoin Yahudis sin Usif' ia?”

¹³ Onaim sin nhuun ein ok-oke' am nak, “Mu'mate He! Amkuus mu'peit Ee meu hau neeh je, tua!”

¹⁴ Rarit gubernur ee nataan am nak, “In saant ii saa'? Au uprikas urair Je, mes au ka upein fa sanat mese' msa'!”

Mes sin arsin anhuun ein naher-heran ntein' ein am nak, “Mu'mate He! Amkuus Ee nai meu hau neeh je, tua!”

¹⁵ Natuin gubernur ee he nharineb too mfaun ein sin neek ein, onaim in nafetin nai' Barabas natuin sin roimk ein. Rarit in naprenat atoin

apaot ein he sin nnao nbeos* Nai' Yesus anpaken a'kauboe. Anbeso nrair Je te, soraurs ein neik Nai' Yesus anpoi nnaon he nkuus niis Ne nbi hau nehe.

*Soraurs ein anbeos nafan-fani' Usif Yesus
(Nai' Mateos 27:27-31, Nai' Yohanis 19:2-3)*

¹⁶ Rarit soraurs ein anheer neik Nai' Yesus neu sin koat ee in kintal.† Anbi naan, sin no'en nabuab sorarus puukn es, of oni' tuaf natun niim. ¹⁷ Ma sin nabaur Nai' Yesus neik baru mnanu' masnaa mee-umub, on re' uisf ein biasa npake. Rarit sin nait noon ma'aika' ma sin nrii' 'soeb es. Ma sin ntuma'nii' nataam 'soeb ma'aika' naan neu Nai' Yesus In a'nakan, he sin na'raur ein on re' he nasaeba' 'piru'-baru neu uis feu' goes.

¹⁸ Rarit sin na'ruir ein ma na'besan, rarit nakree't Ee mnak, “Tabe, Aam Usi' Yahudi!” ¹⁹ Ma sin na'ruir ein napo-poin anbi Nai' Yesus In matan. Ma sin npuurn ein hape fani-fani neu In human. Rarit sin ntee' nafan-faink Ee neikin hau. ²⁰ Sin nakre'et narair Je on naan ate, sin npuu' nain baru mnanu' naan. Ma sin napakeb nafani' In paken. Rarit sin neik Je npoi na'ko kota Yerusalem, he nkuus na'peit Ee nbi hau nehe tar anmaet.

* **15:15** Sorarus Roma sin npaek a'kauboe re' anmoe' je na'ko tain pasu nono' fak-fauk. Rarit sin nfutun nui ma'aika' ai' atnoop ma'aika' anbi 'kauboe je sin paank ein. Karu nbeosn ee fani-fani te, hit paus ki nathoo' nain. † **15:16** Soraurs ein sin bare re' naan, antek ee neik uab Latin ate nak *praetorium*. Soraurs ein sin bare naan nabuan et pukan uim a'nakat sin.

*Sin nkuus na'peti' Usif Yesus anbi hau nehe
(Nai' Mateos 27:32-44, Nai' Lukas 23:26-43,
Nai' Yohanis 19:17-27)*

²¹ Oras sin npoin nnaon na'kon Yerusalem, sin nateef nok atoin es anbi raan atnana'. Atoni' naan na'ko kota Kirene, kaan ee nai' Simon. In re' naan, nai' Aleksander ma nai' Rufus sin amaf. In fe' he ntaam neu kota Yerusalem ate, soraurs ein anheer naan ee, ma na'seek ee he nasaah Nai' Yesus In hau nehe. ✧ ²² Sin nheer neik Nai' Yesus antea baer jes, kaan ee Golgota. (In a'moufn ii 'bare 'naak nuif'.) ²³ Anbi naan, sin he na'inu' Nai' Yesus neik raur mai'ninu' maseor re'u, he In bisa naran menas. Mes In ka nroim fa he niun. ²⁴⁻²⁵ Rarit sin nkuus natneneb Nai' Yesus anbi hau nehe. Onaim sin nahake' hau nehe naan, of oni' fe' anreuk seo. Rarit soraurs ein anheran suur ana' he napara' sekau es re' napein Nai' Yesus In paken. ✧ ²⁶ Rarit sin ntuin anbi hau pisa' es am nak:

“Atoni' ia, atoin Yahudis sin Usif”

Rarit sin nkuus hau pisa' naan, anbi hau nehe neis faof, anhaumaak Nai' Yesus In a'nakan. Sin npaek rais matu'i naan he nhuukn Ee. ²⁷ Anbi naan, sin nkuus na'maet aburarut tuaf nua msa'. Es anbi Nai' Yesus In abnapan a'ne'u, ma es antein anbi 'rii. ²⁸ [Nok rasi naan ate, sin natuin saa' re' matu'i nain anbi Uisneno In Suur Akninu' re' nak, “Sin nmoe' Je nahuum on re' atoin amoe' re'uf.”] † ✧

✧ **15:21** Roma 16:13 ✧ **15:24-25** Siit Pures-Bo'is sin 22:19

† **15:28** Anbi tuis uab Yunani re' manasik anneis, era' re' ia ka matu'i fa. ✧ **15:28** Nai' Yesaya 53:12

29 Are' atoni mfaun ein re' annaon natuin ranan naan, niit Nai' Yesus makfiri' anbi hau nehe. Onaim sin nkiu'n ein ma nakre'et Nai' Yesus am nak, "Hoe! Ho es re' mak, Ho he mpukai mureu' Uisneno In Uim Onen Uuf, rarit mufena' mufain' ee anbi neno teun in nanan.✧

30 Maut he Ho msaun mu'ko hau nehe naan, he mufetin Ho tuam aan nai! Karu Ho mmoe' on naan ate, na' hai mpirsai mmak Ho re' ia Uisneno In Anah."

31 A'naak rais pirsait Yahudi sin a'naakt ein nok tunggur agaam ein nakre'et Nai' Yesus amsa' am nak, "In nsoi nafetin biak ein, mes In ka bisa nafetin naan fa In tuan. 32 In nteek In tuan ii nak 'Kristus', Atoni' re' Uisneno anba'an nain Je na'ko un-unu'. Bian nak, In re' naan atoin Israelas sin Usif. Karu namneo on naan ate, maut he In nsaun na'ko hau nehe he hai miit fe'. Rarit hai mpirsai meu Ne."

Tua nua' ein re' na'peti' sin bu'-bua' nok Nai' Yesus anbi sin hau nehe mese'-mese', sin nakre'et Nai' Yesus amsa'.

Usif Yesus anmaet

(Nai' Mateos 27:45-56, Nai' Lukas 23:44-49, Nai' Yohanis 19:28-30)

33 Rarit meis'ookn ii n'aum naan bare naan, na'ko maans ii na'puup tar antea nreuk teun maans ii nmaeb. 34 Oras anreuk teun on naan ate, Nai' Yesus anhunun neik uab Aram am nak, "Eloi! Eloi! Lema sabaktani?" (Re' neik hit uab ii te nak, "Koi, Au Usi'! Koi, Au Uisneno! Nansaa' am es Ho mparakan Kau on re' ia?")✧

✧ 15:29 Siit Pures-Bo'is sin 22:8, 109:25, Nai' Markus 14:58, Nai' Yohanis 2:19 ✧ 15:34 Siit Pures-Bo'is sin 22:2

35 Tuaf fauk re' anhaumakan anbin naan, sin nnenan neu Nai' Yesus In hanan naan. Onaim sin na'uab ein am nak, "Hoe! Hi mneen fe! In nkoa' ka'o Elia, Uisneno In mafefa kninu' ununu'." 36 Rarit tuaf es naen nait ani'-tei meto' ma nateep ee nbi raur mai'ninu'. Rarit napuunk ee nbi hau goes in tunan, ma naramib Nai' Yesus he nmuis. Rarit atoni' naan na'uab am nak, "Ampao he hit kius tiit! Kais-kaisa' ka'o Elia neem ma nasaunt Ee na'ko hau nehe."✧

37 Rarit Nai' Yesus anhunun anteni', ma In nmaet.

38 Anbi Uim Onen Uuf ee, anmui' naan tai eon kou' goes, nakfir' ee he nakiin Uisneno In Ke'en Akninu'. Oras Nai' Yesus snaasn ii natfeek, tai eon ko'u naan natpisu' nbait nua na'ko faof tar antea 'piin.✧

39 Anbi Golgota, atoin a'naak paot es anhake nhaumaak Nai' Yesus In hau nehe. Oras in niit Nai' Yesus In a'maten, in naskeek. Rarit in na'uab am nak, "Ai joo! Atoni' ia namneo-namneo Uisneno in Anah!"

40-41 Anmui' naan bifee fauk re' napeen Nai' Yesus In a'maten na'kon a'roo. Sin esan re' nahunu te antuthaen Nai' Yesus nok In atoup noin' ein anbin pah Galilea. Sin esan re' ain Salome, bi Maria na'ko kuan Makdala, nok ain Maria (re' nai' Yakobus muni' nok nai' Yoses§ sin ainaf), ma bifee mfaun bian anteni' re' neem nabu-buan nok Nai' Yesus neun Yerusalem.✧

✧ 15:36 Siit Pures-Bo'is sin 69:22 ✧ 15:38 Anpoin na'kon Pah Masir 26:31-33 § 15:40-41 Tuis uab Yunani bian nak 'nai' Yoses in ainaf', ma bian anteni' nak 'nai' Yosef in ainaf'. ✧ 15:40-41 Nai' Lukas 8:2-3

*Sin nsuub Usif Yesus In ta'un neu noup fatu
(Nai' Mateos 27:57-61, Nai' Lukas 23:50-56,
Nai' Yohannis 19:38-42)*

⁴²⁻⁴³ Rarit atoin es naim ranan he nasanut Nai' Yesus In aon-ta'un amates na'ko hau nehe. Atoni' naan kaan ee, nai' Yusuf. In na'ko kota Arimatea. In re' naan tuaf es na'ko pukan afeek rais pirsait Yahudi. In neekn ee reko. In anpao-pao prenat Uisneno re' he neem.

Nai' Yesus anmaet nok neon nima'. Noka' te nateef nok atoin Yahudis sin neon onen. Es naan ate, anbi neon nima' naan, nai' Yusuf he nasanut nahunun Nai' Yesus In aon. Nai' Yusuf anha'tain in nekan, ma nnao nbaiseun gubernur Pilatus he nasanut Nai' Yesus In aon amates naan. ⁴⁴ Oras gubernur ee anneen nai' Yusuf in haan totis naan ate, in nsanmaak. Onaim in na'uab am nak, "Ai joo! Atoni' naan anmaet rabah, oo! Anbi au teenb ii te, au 'ak oni' ka fe'."

Rarit in nreun tuaf he no'en a'naak paot. Oras in neem antea te, gubernur ee nataan am nak, "On mee? Nai' Yesus anmate nrari oo, ai' kaah fe'?"

⁴⁵ A'naak paot naan nataah am nak, "Namneo! In nmaet jen, tua." Oras gubernur ee nneen on naan ate, in nfee mainuan neu nai' Yusuf he nnao nasanut Nai' Yesus In aon-ta'un naan.

⁴⁶ Rarit nai' Yusuf annao neu Golgota. Ma in nasanut Nai' Yesus In aon na'ko hau nehe. In n'aum uismina' naan neik tai fe'u re' ma'osa'. Neot naan, sin fe' anpahat anrair noup fatu es anbi kneet fatu. Rarit sin nsorot nataam uismina' naan neu noup fatu. Onaim sin naritu' faut been kou' goes, he na'eeek na'maet noup fatu naan. Rarit nai' Yusuf sin anfanin.

⁴⁷ Oras naan, bi Maria na'ko Makdala, ma ain Maria (nai' Yoses in ainaf), sin nokan anbin naan amsa'. Sin nua sin ankius narek-reko' bare re' sin natunu' Nai' Yesus In aon-ta'un naan.

16

Usif Yesus anmoni nfain!

(Nai' Mateos 28:1-8, Nai' Lukas 24:1-12, Nai' Yohanis 20:1-10)

¹ Noka' neon ne'e, atoin Yahudis sin neon onen. Maans ii nmoufu nrari te, bi Maria na'ko kuan Makdala, ma ain Maria (nai' Yakobus in ainaf), nok ain Salome, sin nnao nsosan miin fubona', he noka' te, sin he nnaon nkaik ein neu Nai' Yesus In aon-ta'un natuin sin harat atoin Yahudis. ² Ma noka' snaat ii nsae on naan ate, sin teun sin annaon neun noup fatu naan. ³⁻⁴ Anbi raan atnana' sin na'uab ein am nak, “Amoo! Of sekau es re' ntitar na'roba' kit faut ko'u naan na'ko noup goe in enon? Hit teun kit ka neu ta'bei' je fa. Fatu naan kou' re'uf!”

Mes oras sin ntean bare naan, sin niit fatu naan natnanib anrari. ⁵ Rarit sin ntaman nkonon anbin noup fatu naan. Mes nok askeken, sin niit atoin muinf es anpaek muti' nariim, antook anbi sin abnapak a'ne'u. ⁶ Onaim atoin munif naan na'uab neu sin am nak, “Hi kais mimtau! Au uhiin 'ak hi iim he maim Nai' Yesus, atoin Nasaretas naan, re' sin na'mate nrair Je nbi hau nehe. In ka et fa ia. In nmoni nfain jen! Iim he hi mkius kiim bare re' sin natunu' Nai' Yesus In aon-ta'un naan. Ka tiit Ee fa goen! ⁷ Onaim hi mfain nai rab-raab! Amnao mitoon meu nai' Petrus sin am mak, Nai' Yesus anmoni nfain jen. In nnao nahunun ki neu pah Galilea. Maut he sin

nateef nok Nai' Yesus anbin naan, on re' nahunu te In natonan nrair sin. Onaim hi mfain nai!"☆

⁸ Oras bifeen naan niit noup ruman naan ate, sin naskeken. Onaim sin naen anpoin. Sin nfanin rab-raab. Sin npe'on raan ee te, ma sin ka natonan fa sekau-sekau, natuin sin namtau nmaten.

Usif Yesus nateef nok bi Maria re' na'ko Makdala

(Nai' Mateos 28:9-10, Nai' Yohanis 20:11-18)

⁹ Anbi neno krei kik-kiku te, Nai' Yesus annao nateef nahuun nok bi Maria re' na'ko kuan Makdala. Bi Maria re' naan, nahunu te Nai' Yesus anriu' napoitana niut re'uf hiut na'ko in tuan. ¹⁰ Oras bi Maria nateef anrair nok Nai' Yesus, in nfain ma natoon neu amfaut ein re' nahunu te sin natuin Nai' Yesus. Sin nabu-buan nok susat ma kaet fe', natuin sin namnau Nai' Yesus In a'maten. ¹¹ Rarit bi Maria na'uab neu sin am nak, "Nansaa' am es hi msuus ma mkae fe'? Kais amnana'reen amtein, natuin Nai' Yesus anmoni nfain jen! Fe'e na, au uteef 'ok Ne!"

Mes sin arsin antonin am nak, "Ho mupoi!"

Usif Yesus nakriir On neu tuaf nua

(Nai' Lukas 24:13-35)

¹² Rarit Nai' Yesus In atoup noni' tuaf nua annaon neun kuan es. Anbin raan atnana' te, Nai' Yesus nakriir On neu sin, mes In na'bani'. Mes ka 'roo fa on naan ate, sin nahiin Je. ¹³ Rarit sin nua sin anfanin ma natonan sin aok-bian ein am nak, "Hoe! Hi mneen fe'! Fe'e na hai miteef mok Nai' Yesus anbi ranan!"

☆ **16:7** Nai' Mateos 26:32, Nai' Markus 14:28

Mes sin aok-bian ein antonin am nak, “Heero! Hi kaisa' mipoi on naan!”

Usif Yesus nakriir On neu In atoup noin' ein ok-oke'

(Nai' Mateos 28:16-20, Nai' Lukas 24:36-49, Nai' Yohanis 20:19-23, Haef ein sin Reta' 1:6-8)

¹⁴ Rarit Nai' Yesus nateef nok In atoup noni' tuaf bo'es am mese'. Oras naan, sin ntokon ma nbukaen. In na'uab neu sin am nak, “Hi 'naak-fautm ein ii! Atoni' natoon anrair ki mnak sin niit anrair Kau neik sin matak fuak ein, mes hi ka mpirsai fa joo! Hi mak, sin arsin napoin! Oras ia, Au 'eikn Ok 'uum. Namneo Au 'maet, mes oras ia, Au 'moni 'fain! Hi miit kiim meik hi matam fuam ein.

¹⁵ Onaim oras ia hi ro he mnao mfuun am mitefan pah-pinan ia, he mitonan are' mansian ein ok-oke' Au Rais Reko ia. ¹⁶ Sekau re' anpirsai neu Kau, ma nasrain je, of Uisneno nsoi nafeitn ee, he in natua nabar-baar nok Uisneno nbi sonaf neno tunan. Mes sekau re' ka npirsai fa te, of in napein hukun, ma Uisneno nriu' napoitr ee, rarit natua nabaar anbi mone'. ¹⁷ Ma re' apirsait neu Kau, of sin nmo'en rais sanmakat huma'-huma', he too mfaun ein nahinin nak sin kuasat naan na'uu ma na'baa' na'ko Uisneno. A'tope' on re': sin bisa nriu' niut reu'f ein neik Au kanak. Of Uisneno nmoe' sin he sin na'uab ein neik uab bian re' sin ka nahiin je fa. ¹⁸ Rarit karu sin nnaa' kaun re'uf, ai' sin niun naan raso, sin ka neu he nsiraak ok fa. Karu sin npohon ma n'oen ein neun amenat, amenat naan nareok.”

☆ **16:15** Haef ein sin Reta' 1:8

*Usif Yesus na'ait On neu sonaf neno tunan
(Nai' Lukas 24:50-53, Haef ein sin Reta' 1:9-11)*

¹⁹ Oras In na'uab anrair nok In atoup noin' ein on naan ate, Uisneno nait nasaeba' Nai' Yesus neu sonaf neno tunan. Anbi naan, In njair Uisneno In tua pirsai, he sin nua sin antokon ma napreent ein bu'-bua'.☆

²⁰ Rarit In atoup noin' ein nmoe' natuin In aprenat. Sin nnaon neun bare-bare ma natonan are' too mfaun ein anmatoom nok Nai' Yesus In Rais Reko. Uisneno nfee kuasa neu sin, he sin nmo'en are' rais sanmakat re' Nai' Yesus natoon anrarin sin. Onaim too mfaun anpirsain neu Nai' Yesus, natuin sin nahinin nak Rais Reko naan ro namneo.

☆ **16:19** Haef ein sin Reta' 1:9-11

**Uisneno In Kabin ma Prenat: Rais Manba'an
Fe'u nok Reta' Ahun-hunut
Genesis and the New Testament in the Amarasi
language of Indonesia
Kejadian dan Perjanjian Baru dalam bahasa Amarasi
dari**

copyright © 1999-2014 Unit Bahasa dan Budaya, Kupang NTT, Indonesia

Language: Amarasi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 30 Nov 2021

60603d94-9a14-5831-a729-e3ba7b0ebc25